

宋

會

要

宋會要



元祐令中州從八品下州從九品乾道六年任大猷乞
令司戶專主倉庫職制令糧料院無專監錄事司司戶參
同書慶元四年十一月十一日臣僚言和州見今所管
戶籍較之三十年前已不啻五倍之多自守倅而下除
知錄司理各管獄事外祇有防禦判官一員凡直司簽
廳公事與省司倉穀庫常平財穀盡責於判官一人之
委是官闕事司臣竊惟和之與楚事體一同今楚州已蒙
朝廷與辟置一員亦乞照楚州體例從朝廷添置司戶
一員詔令本路諸司共奏辟一次嘉泰元年八月二十
三日廣東諸司言封州蕞爾山郡不若中州之壯縣紹

興七年廢為德慶之屬邑紹興十年復置而為州方其
復置之初郡縣之官才止十員自復置之後增益曹職
丞簿兵官監當獄廟指使共增一十二員郡計不加於曩
昔廩稍視昔而倍差乞以錄參兼司戶並司法從之四
年二月二日詔無為軍置司戶一員兼司法以前知無
為軍商飛卿奏本軍惟判官一員獄官二員乞增復司
戶故有是詔

宋會要

制置使

高宗建炎元年八月二十六日遂安軍承宣使充殿前都指揮使京城副留守郭仲荀言護衛隆祐太后前去江寧府節制一行軍馬及制置東南捉殺盜賊東南安撫使發運監司州軍等依舊例並聽制置司節制今安撫兼經制使與置制司不相節制恐措置異同不惟州縣無所執守兼軍政不歸於一難以集事乞並聽本司節制從之十一月十六日御營使司都統制充招捉抗州盜賊制置使王淵言大軍日用錢糧草料及鄉道間探人激賞并隨軍火藥箭合用軍器等乞特降指揮施行詔令戶部支銀絹各一萬匹兩應副使用建炎三

年二月四日詔除呂頤浩資政殿大學士充江浙制置使兼知鎮江府劉光世殿前都指揮使檢校太保充行在五軍制置使鎮江府駐劄並專一控扼江口兩司軍馬並同節制仍命楊惟忠節制江東軍馬江寧府駐劄先是黃潛善欲除頤浩資政殿學士上以資政非前執政者恩數止與從官等特除大學士 十日呂頤浩言今來既充江浙制置使專一控扼江口下自江陰軍口上自瓜洲石步宣化渡迤邐向上州軍應干渡口躬親往來點檢及措置防守難以兼知鎮江府自江陵府至池州乞委官總領防守江口及措置戰船詔頤浩往來經制陳彥文程千秋差充制置副使梁永祖知鎮江府

三月十二日詔御營平寇前將軍范瑋為慶遠軍節度使依前職充制湖北路制置使同日詔劉光世為太尉依前奉國軍節度使殿前都指揮使充淮南制置使
六月八日御營使司言防秋在近其沿江至海岸合定地分今措置杭州平江府鎮江府常州秀州常州東至丁塘鎮四十里達大江江陰軍江路與通泰揚州對岸係新西路欲令浙西安撫使康允之帶本路制置使從之二十六日詔右司員外郎劉寧止除直龍圖閣同提領水軍沿江制置副使七月五日詔張自牧差兼京東制置副使八日詔權發遣廬州胡舜陟除徽猷閣待制淮西制置使以舜陟上殿論事慷慨請兵禦寇

以徇國家之急故有是命

八月五日詔浙東西路帥

臣已帶安撫使都總管者並不帶制置使

閏八月一

日詔奉議郎徽猷閣待制淮南西路制置使胡陟除沿

江都制置使知建康府兼江南東路安撫使王義叔沿

江制置副使二十三日臣僚言竊見自今諸州守臣

既帶安撫又兼制置及許便宜權之要重可擬朝廷伏

覩祖宗時所謂安撫者止管機密兵馬邊防等事財計

自有漕使轉輸安撫所不預知蓋有深意存焉今日知

州帶安撫者又兼制置及許便宜是待朝廷生殺之權

若行之於兵馬邊防之間即為大利若便宜奪所隸州

軍財計為害不細契勘南康軍隸屬江州安撫制置於

今年七月內訪聞前江州安撫張澈差官行便宜公文
遍詣本軍場務徵及井竈并上供錢盡搬載上般本軍
帑藏為之一空方欲離岸問幸而張澈被責不曾搬行
萬一席卷本軍既闕絕支費定生變亂伏望止許漕使
轉輸本路財用詔除用兵許依便宜指揮餘並禁止
十一月七日江南東路轉運司言近降指揮令江州建
康府守臣並帶制置使竊詳上件使名止謂制置軍事
不用常法處斷軍兵將校罪名及抽取轄下州軍器甲
兵級今來江州制置司却盡用制置兩字行遣他州事
務如南康軍知軍韓登胃已係提刑司體量其江州制
置司又差官體量如南康軍財賦已係轉運司移用其

江州制置司又差官剋刷立要起錢一萬貫又今年秋
米擅勒南康軍起二萬石具韓登冑既被放罷本軍有
簽判李聞之合權其江州又差制置司幹辦官朱竑前
未權管軍事竊慮其他州郡於刑獄則無所適從於財
賦則泛科難給欲乞只許制置軍事其他刑獄財賦及
差官權州縣職事乞依舊只付提刑轉運司用舊條行
遣從之 四年四月二十八日詔御前右軍都統制張
俊充浙西江東路制置使帶領所部并陳思恭軍馬前
去撫定軍民招收盜賊除劉光世韓世忠人馬外其他
諸軍人馬並聽節制 五月二十七日詔諸路帥臣近
年並帶馬步軍都總管職任事權已自不輕所有制置

使祇是虛名兼朝廷因軍興時暫差充制置使之人名
稱混雜無以區別其諸路帥臣見帶制置使並罷
十月十七日兩浙西路安撫大使劉光世言旦夕起發之
任緣本路見有韓世忠張俊係兩浙西路制置使並聽
節制竊緣本路兵火之後官私凋弊豈任三虜節度呼
索詔韓世忠張俊並依名赴行在自合罷制置使
紹興元年九月二十六日詔江東西湖南路上供錢糧久
失措置夏秋二稅上戶拖欠不催下戶受弊逐路盜賊
尚衆至今招收未盡可差戶部尚書孟庾帶見任充江
東西湖南路宣撫制置使其應干財賦拘催蠲放依係
照敕施行務要寬恤民力其上供錢糧催促依限起發

應賊盜當招收或掩擊者並委相度措置係具聞奏
二年七月二日福建兩浙淮東沿海制置使仇愈言已
被旨制置使叙位依發運使例所有本司屬官亦乞依
發運司屬官條例從之 二十六日呂頤浩言朝廷近
置沿海制置使最為得策然虜舟從海道北來拋大洋
至洋山二孤亘山岱山獵港岑江直至定海縣此海道
一也係浙東路若自通泰州南沙北沙轉入東嶺料角
黃牛垵頭放洋至洋山沿海岸南來至青龍港又沿海
岸轉徘徊頭至金山入海鹽縣澉浦鎮黃灣頭直至臨
安府江岸此海道二也係浙西路萬一有警沿海制置
一司緩急必不能照應兩路事宜欲乞令仇愈掌管浙

西淮南路別差制置使一員管浙東福建路候防秋過日罷從之

宋會要

紹興三年四月二十日福建兩浙淮南東路沿海制置使仇愈言發運轉運使副提刑官遇天申聖節依上供格法各有合發進奉銀絹今來本司係初置所有天申節進奉銀絹即別無條格未審合與不合椿發詔不合椿發六月十六日詔罷沿海制置使司見在定海縣船令明州守臣魚總領張公裕充同總領專在定海縣逐官並同簽書如守臣合詣點檢聽旨將州事交與通判訖前去參謀參議官並罷屬官人吏等裁減數目令

守臣同公裕減定申尚書省仍以總領海船所為名

九月十五日詔江南西路安撫大使趙鼎充江南西路
安撫制置大使十八日樞密院已降指揮除趙鼎江南
西路安撫制置大使岳飛江南西路沿江制置使今措
置事件一令岳飛於江州與國南康軍一帶駐軍其江
西見管諸處軍馬雖隸使司如遇緩急許岳飛抽差使
喚趙鼎發遣應副務要內外相應共濟國事一今來制
置大使趙鼎係洪州置司若江上有軍期急速會議不
及許岳飛一面隨宜措置施行乞報趙鼎照應一江北
對岸係舒蘄兩州可令隸岳飛節制合用錢糧令趙鼎
催督所屬監司州縣應辦如違按劾聞奏當議重賞典

憲詔並依仍劄都督府并淮南宣撫司照會 二十一

日詔岳飛落沿江二字充江南西路制置使江州駐劄

其沿江與國南康軍一帶江面仰多方措置提備及本

路州軍緩急賊馬侵犯去處亦仰分撥軍馬遮護無致

疎虞餘依已降指揮 二十九日樞密院言沿海制置

使郭仲荀乞辟差書寫機宜文字一員并參議幹辦準

備差使人吏等詔置書寫機宜文字一員許差男及之

外其餘屬官使臣令仲荀相度就用總領所見任人如

內有不堪倚伏之人許具名申尚書省替換若非泛合

差官幹事遇闕許本州或所部合差出官內差委 十

月五日侍衛親軍步軍都指揮使武泰軍節度使知明

州兼沿海制置使郭仲荀乞罷軍職事上曰此有故事
兼亦有恩數不當如常制降詔不允令問樞密院吏莫
有知者尋繹故實得舊例詔仲荀罷軍職加檢校少保
十九日詔吳玠已除利州路階成鳳州制置使訪聞
昨來饒風嶺退師蓋緣宣撫處置使司所任官屬聽信
不一今來王似等已委吳玠措置守備所有戰禦之策
臨機制勝尤當委任務出長筭以責成功仍在協和共
濟國事捍賊保境無失機會可劄與王似盧法原吳玠
各具知稟聞奏 四年三月二十六日詔關師古除熙
河蘭廓路安撫制置使 四月十八日鎮南軍承宣使
神武後軍統制充江南西路舒蘄州制置使岳飛言胡

公事

世將除知洪州兼江南西路安撫使兼制置使契勘自
來行移係用狀申江南西路安撫制置大使司今來胡
世將充本路安撫制置使未審依舊用申狀准復用公
牒詔行移文字許用公牒 二十七日江南西路安撫
制置使胡世將言本路先係差除大使合置參謀參議
主管機宜書寫文字各一員幹辦文字三員準備將領
差遣差使各五員遇有闕官去處並許奏辟差權詔幹
辦公事準備差遣差使各減一員餘依趙鼎已得指揮
七月三日樞密院言席益已差知潭州兼湖南安撫
使緣本路見今討捕楊么黃誠賊火王燮見充本路制
置使詔席益特差充荆湖南路安撫制置大使兼知潭

州 八月十六日詔新荆湖南路安撫制置大使益知

潭州席益並依呂頤浩昨任江東安撫大使所得指揮

施行 十八日知樞密院事趙鼎言臣今出使川陝荆

襄其合行事件已得旨依呂頤浩張俊孟庾昨申請到

江淮荆浙都督府并宣撫康置使司已得指揮契勘張

俊下屬官張宗元馮康國並帶出卽官職事所有今來

踏逐辟差到官屬內有見在行在職事人亦欲依例帶

出見任職事從之 十九日江南西路舒蘄州蕪荆南

鄂岳黃復州漢陽軍德安府制置使岳飛奏劾統制官

辛太不聽節制擅自將兵回歸本鎮詔辛太有誤軍期

罪當誅戮特貸命除名勒停令本鎮自効是時岳飛率

將佐王萬收復襄陽府又令萬同平太等於清水河屯
駐掩殺偽齊賊馬而太不聽節制并荆南鎮撫使解潛
不即發遣反妄申收復襄陽為岳飛所劾已責太訖就
令解潛分析因依奏聞故有是命 二十六日樞密院
言襄陽府隨鄆唐鄧金均房州舊係京西南路信陽軍
舊係京西北路除金均房三州見差鎮撫使外欲將襄
陽府隨鄆唐鄧州信陽軍六郡並作襄陽府路本府置
帥司緣收復之初事務不多未差監司止依口一降指
揮委制置使岳飛措置仍隸屬都督府從之 五年二
月十二日詔岳飛除荆湖南北襄陽府路制置使神武
後軍都統制前去荆湖南北路招捕盜賊其錢糧江西

委范振湖南委薛弼湖北委劉延年充隨軍轉運

十

一月十八日樞密院言席益除資政殿學士成都潼川

府夔州利州等路安撫制置大使兼知成都府除逐路

措置邊防調發軍馬隸宣撫司外其應干合行事件並

依江南等路安撫大使司已得指揮詔逐州兵馬自合

並隸安撫制置大使司如遇有邊防緊急大事即令宣

撫司措置六年二月四日詔馬擴兼沿海制置副使

四月四日前湖南路安撫制置大使兼知潭州呂頤浩

言乞置參謀參議主管機宜文字各一員幹辦公事五

員並從本司舉辟今乞辟左朝奉郎提舉洪州玉隆觀

傳崧卿充參謀官降授左朝請郎主管台州崇道觀王

次翁充參議官左朝奉大夫主管台州崇道觀范醇充
主管機宜文字右朝散郎主管台州崇道觀王治左宣
教郎知嚴州壽昌縣臧梓武顯大夫閤門宣贊舍人王
繪並充幹辦公事從之 二十九日諸路軍事都督行
府言岳飛昨充荆湖南北襄陽府路兼蘄黃州制置使
今來已除湖北京西路宣撫副使其蘄黃州自合依舊
兼行節制從之 五月十一日中書門下省言四川監
司郡守玩襲積弊率多違戾已除席益四川安撫制置
大使應所部自合按劾外其監司未有約束詔四川監
司應有違戾並令席益按劾聞奏 七月六日成都潼
川府葭州利州等路安撫制置大使兼知成都府席益

言四川見禁公事未曾被受朝指揮許本司一面的情
斷遣今據四路諸州應奏及刑名疑慮等文案並申本
司比欲退下依條施行緣川屬去行在遙遠兼正值暑
月不可淹留待報除命官犯入已賊罪案令本州遵依
已得指揮斷遣外餘案臣已逐急遵依王似邵溥已得
指揮酌情斷下仍已各具奏聞臣契勘四川州軍所申
獄案不少係事干人命全藉通曉刑法官詳斷免有失
當昨得旨於宣撫司屬官內存留二員充屬官其所留
官與本司屬官即無曾任刑寺法官之人欲乞更許於
於宣撫司屬官內存留一員窠闕許於四川得替待闕
寄居官內選差一員充本司檢法官專一詳斷諸州所

申應奏獄案所貴遠民不致冤濫其陝西諸州去行闕
愈遠所有應奏獄案亦合取自聖裁詔依其陝西諸州
應奏案並依四川已得指揮施行 十月九日樞密院
言已降指揮梁汝嘉除浙西沿海制置使其見領巡幸
隨軍都轉運使職事自合依舊詔梁汝嘉兼淮東沿海
制置使同日樞密院言已降指揮劉錡除浙西沿海制
置副使所有通州管下料角最係賊船來路緊切控扼
去處除已分撥人船委官措置提督外詔王彥除浙西
兼淮東沿海制置副使 十一日浙西淮東沿海制置
使梁汝嘉副使王彥言被旨汝嘉等蒙除前件使名其
合行事務並依仇愈馬擴已得指揮一乞以浙西淮東

路沿海制置使司為名使副各乞下所屬鑄造印記其
行移文字入斤候并奉使等第並乞依都轉運司已得
指揮施行一人吏且就差巡幸隨軍都轉運司都督府
參議官所帶人吏兼充其請給等更不添支一合羣屬
官乞先次差參議官二員今乞差左朝請郎新差通判
建康府顧丙右通直郎新差知濠州蔡延世等充請給
人從及未差員數乞候開會到仇念等已得指揮續行
申乞一今來措置防托海道事務繁重合要使臣分頭
使喚今乞差置準備差使聽候使喚各一十員並乞許
於已未參部見任得替待闕大小使臣校副尉下班祇
應內指差先次供職理為資任差訖具名申朝廷給降

付身一沿江海措置防托合要激賞錢物欲乞許依仇
愈馬擴例從朝廷支降應副支用一契勘今來淮東浙
西沿海把隘官兵及海船棹梢等日支米錢欲乞浙西
委漕臣淮東委提點公事專一應副一仇愈馬擴前後
申請畫降旨揮今乞並許使副通用詔第四項共差一
十員專聽梁汝嘉使與第五項令戶部共支銀二千兩
絹一百匹錢二千貫餘並從之 七年九月二十九日
詔右武大夫開州團練使劉錡特授依前官權發遣廬
州軍州事兼主管淮南西路安撫司公事馬步軍都總
管兼營田使兼淮西制置副使 八年正月二十一日
詔胡世將除樞密直學士四川安撫制置使兼知成都

府 五月十三日中書門下省言江西帥臣李光見帶
安撫大使前來帥臣胡世將係安撫制置使詔李光令
帶安撫制置大使 九年正月十三日新差知紹興府
充兩浙東路安撫使周祕言已於入界日先次交割安
撫都總管司職事昨來沿海制置使見行事務已蒙併
歸浙東安撫司訖今來被受告命即無兼沿海制置使
字緣本司見有職事祕除已遵依元降指揮一面兼領
未審合與不合帶入階街詔兼沿海制置使 十九年
四月二日詔四川安撫制置使司置主管書寫機宜文
字幹辦公事各一員准備差遣二員準備將一員使臣
一十人其官屬人吏軍兵等請給令總領所支撥錢引

一萬道充歲計如軍中非泛激犒之類別具狀申取朝廷旨揮并本司舊有抵當熟樂醋庫每歲所收息錢依舊充經撫蠻夷等支使仍令戶部裁定 十二月二十一日詔四川發來扈衛人已滿千人可行下制置司今後每歲招填三百人赴闕底幾扈衛不至闕人 二十八年五月四日兵部侍郎湯允恭言制置使選任尤重一司屬官賴以贊佐每制置使替移或赴召命一司之事皆在僉廳官或係選人而州縣觀望亦多減裂欲望今後成都知府闕依條令監司兼權外緣都大茶馬在成都府置司其制置闕則差都大茶馬又闕則差總領兼權所有制置一司僚屬除書寫機宜外其餘朝廷選

差或制置奏辟皆用京朝官詔今後四川制置司闕就令都大茶馬一面時暫兼權茶馬又闕即總領兼權餘從之

宋會要

隆興元年七月一日新除兵部尚書虞允文言被旨改差湖北京西路制置使所有差破官吏使臣軍兵人從請給等並欲依近除逐路宣諭使申畫到前後指揮施行乞以湖北京西路制置使司為名下所屬鑄印緣起發日逼乞且就用近闕借到奉使印沿路行使候給降到新印日繳納其行移除朝廷具申外所部總領監司諸軍并州縣乞依例用劄子內外官司並行關牒從之

同日新除敕文閣直學士趙子滿言被旨差知明州
兼沿海制置使照得前制置使仇愈郭仲荀所差官屬
員多虛費廩祿今乞裁減許於見任得替待闕文武臣
內踏逐諳練海道利害之人先次權攝如委可倚仗申
廷朝給付身參議官一員乞從朝廷選差外書寫機宜
文字一員乞依仇愈例辟差親屬幹辦公事一員準備
差遣一員於京官選人內辟差幹當使臣四員於大小
使臣內通差已上官屬依安撫司屬官例破請給從之
八日虞允文奏乞錢糧當撥內藏庫金銀應副九月
二十三日戶部狀準都省批下虞允文言被旨荊襄措
置軍馬兩路見屯官兵數多逐時激犒諸軍發遣間探

等支用不一今欲依江淮宣撫司例於鄂州襄陽府各
置激賞酒庫一所措置收息補助支遣本部今勘當欲
依所乞下虞允文一面措置施行從之 二年七月二
日詔戶部尚書韓仲通除荆襄制置使 三日詔荆襄
制置使虞允文已召赴行在參議官呂擢可陞參謀官
令權主管司事 同日韓仲通言被旨差充湖北京西
路制置使乞依虞允文差置官屬使臣人數并鞍馬等
前後已得指揮施行其應合差人吏軍兵人從等及請
給應干合行事特乞並依兩淮宣諭使體例差破其虞
允文已召赴行在欲下禮部權借第一等奉使印記一
面沿路行使候交割制置使印即便交繳納從之 七

日韓仲通言被旨差往荆襄宣布德意撫問將士乞下
學士院給降宣其牒設乞依兩淮宣諭司例支給從之

同日又言淮東西宣諭司準備支用錢物承指揮於
都督府所管錢內各行取據十萬貫臣將來到司有合
支用錢物乞下湖北總領所於椿管錢內支破從之

十一月二十六日詔沈介特起復元官除顯謨閣直學

士知鄂州兼鄂岳江黃州漢陽軍沿江制置使不許辭

免候指揮到限三日起發乾道元年三月二十日中

書門下省勘會韓仲通昨充湖北京西路制置使除本

身驛券外每月別支給錢一百貫今來沈介亦合一體

施行從之六月二十七日中書門下省奏沈介言解

職終喪詔限十日結局官吏軍兵並發歸元來去處見
在錢物等令湖廣總領所拘收 三年八月二十三日
上宣諭宰執曰史正志係具舟師利害其間亦有可行
者魏杞奏曰見史正志之論甚有理上曰欲早行措置
蔣希奏曰陛下將來要差大臣出使不若先遣史正志
他時可為參贊上曰便差知建康仍兼沿江制置使自
建康至鄂渚舟師並令總之 二十九日新除集英殿
修撰知建康府兼沿江水軍制置使史正志言契勘今
沿江制置使除專一措置水軍海船要為久遠利便之
計所有合用印記今乞於禮部開借奉使印前去專充
制置司使用所有勘差齎廳一司官吏竊慮耗費財用

今只就用安撫司簽廳官吏兼制置司職事却乞復置
省罷闕請給依安撫司屬官吏屬官所帶銜位稱江東
安撫司沿江水軍制置司所有庫務更不別置凡有修
造船隻教閱支費就用安撫司錢物並從之 四年三
月十四日史正志言乞將到任後節省到錢內支撥見
錢十萬貫收係制置司水軍亦歷於出產木植州軍收
買板木就建康自置船塢增造一車十二漿四百料戰
船相兼使用從之 六年正月十二日詔已降金字牌
二面付四川宣撫使王夔附發邊防文字其四川安撫
制置使司見存留金字牌二面令宣司繳納宣司奏檢
准紹興十八年九月二十一日四川安撫制置使李玘

申奏契勘宣撫司昨奏請到指揮許權留御前發來金字牌二面附發合奏邊防機速文字奏今來制置司亦乞依上件事施行從之 三月十四日中書門下省言

勘會四川已有宣撫司係執政官出使詔四川安撫制置司并屬官並罷併歸四川宣撫司公使等及見管錢物委宣撫司拘收具數申尚書省其餘應干事務照應昨胡世將除宣撫併罷制置司已行事理施行 淳熙元年六月十四日皇子判明州兼沿海制置使魏王愷言沿海制置同幹辦公事一員乞許本司依舊辟差準備差遣一員乞復還本司以元置海道幹當使臣稟闕充辟準備差使一員乞令依舊從之既而四年四月又

言近幹指揮省罷諸家準備差遣差使其應屯駐所在
許從主帥依舊辟差本司係屯駐水軍去處已將已差
文臣準備差使改充準備差遣依舊例令入簽廳所有
武臣準備差使稟關却乞減罷從之 四年三月二十
五日四川制置使胡元質乞添本司參議官一員仍釐
務從之 八年閏三月七日新赴忠州蔡興國言四川
沿邊寨官舊係逐路帥司辟差今皆專委制置司奏
辟從辟之人州郡不敢誰何廢職曠官往往而有乞今
制置司依吏部格法差注或從四路轉運司出關來同
在部曾歷沿邊親民未滿六十人擬授詔除堂除一關
吏部三關依舊外四川制置司辟差關內留二十關令

本司辟差其餘窠闕并潼川府等路安撫司利州路轉運司窠闕并令逐路轉運司依見行條格指揮差注

六月十四日詔吏部權將四川諸司屬官窠闕官下制

置司照應資格銓量人材具名奏差如係見闕依條先次就權仍許用三年以下闕即不得將不應資格人以奏差為名一面權攝如或違戾依淳熙三年四月八日權攝指揮將請過欽計贓其所差不當官司及被差人並一等科罪 慶元二年十一月十二日中書舍人兼侍講吳宗旦言竊見臣僚劄子乞罷帥司內機宜事得旨依欲望聖慈將已辟差在任之人日下住罷過俸給且與免追如此法令公行無所避就因邪知畏自絕僥

侍所有錄黃臣未敢書行詔從之其四川制置司機宜
一闕仍舊存留三年四月九日詔沿海制置使司添
差參議官更不作闕差人從可臣林大中之請也開禧
二年七月九日詔寶謨閣待制知建康府葉適兼沿江
制置使三年正月二十七日知建康府兼沿江制置
使葉適奏沿江制置使與沿海制置使事體一同所有
合舉官沿海制置司通年所發閑陞改官陞陟任使負
數係隆興元年知明州兼沿海制置使郭仲荀仇愈呂
源申請依兩浙轉運使例每歲減半舉官并乞將本司
官屬許本路監司互舉奉旨依安撫使薦舉今欲照沿
海制置司已得指揮依安撫使薦舉庶幾有以激屬從

之六月五日知建康府兼江淮制置使某適言昨被
旨兼沿江制置使已蒙朝廷照沿海制置使司例薦舉
官屬續被旨改兼江淮制置使專一指置屯田所有薦
舉係通行四路竊照兩淮經虜騎蹂踐之後州縣焚毀
鄉落蕭條目今經理若非有以激賞無以使之樂於向
前乞於四川制置司體例內權放行一半或三分之一
令本司薦舉至結局日止仍將昨來沿江制置司已舉
過負數併行通理從之七月十七日詔集英殿修撰
知江州徐誼除寶謨閣待制知建康府兼江淮制置使
嘉定元年七月十八日詔觀文殿學士赴建康府何
濬兼江淮制置大使二年二月五日詔江淮制置大

使司京湖制置司歲舉改官並依四川制置司體例理
為職司 八月四日詔資政殿學士赴沔州兼四川宣
撫副使安丙除資政殿大學士知興元府四川制置大
使 三年三月九日詔四川制置大使依四川安撫司
例歲舉改官一十一員從事郎六員從安丙之請也九
月二日詔四川制置大使歲舉改官一十五員從事郎
九員以安丙奏紹興七年席益除四川制置大使專降
旨揮歲舉改官二十員丙先任宣撫副使日得旨歲舉
改官一十員而制置司舊例歲舉九員當來並置即係
共舉改官二十員而四蜀尚有遺材之嘆今宣司已結
局制司事務得旨並歸大使司視前時責任愈重事務

既殷於前而薦員不加於舊恐無以作其趨事赴功之心故有是詔 嘉定五年三月二十四日詔湖北京西制置司照湖北京西宣撫司兩路每歲薦舉員數減半既而湖北京西宣撫司每歲舉改官六員從事郎三員分上下半年舉改官三員從事郎二員下半年舉改官三員從事郎一員 七月十一日詔兵部尚書楊輔除龍圖閣學士知建康府兼江淮制置使 八月三十日知建康府兼江淮制置使楊輔奏江淮州郡并兩淮江上諸軍並隸本司即制所有應干事件辟置官屬乞並照江淮制置大使司體例施行從之 十月三日詔寶謨閣待制知福州黃度除龍圖閣待制知建康府兼江

淮制置使

十二年六月二十日詔中奉大夫寶文閣

待制兼知建康府江東安撫使行宮留守司公事李大
東充沿江制置使建康府置司朝奉大夫右文殿修撰
賈陟充淮東制置副使楚州置司朝請郎直龍圖閣趙
善相充淮西制置副使廬州置司以臣僚言國家設制
置使蓋以朝廷去淮差遠軍政難以喻度機有可乘間
不容髮豈可無策以虞此臣恭觀高皇帝朝沿江及東
西兩淮各有制置使官卑則命以副使典故其存乞仰
體高宗成憲分差沿江及東西兩淮制置使其有官序
尚卑資望尤淺則亦命以副使俾之各居屬部是非委
得以親見利害不惑於傳聞變生於頃刻則隨變而軌

應戰勝而復來則數實而即奏上下相孚而不忤部內
親覲而無間若然則何事不集而何功不成矣故有是
詔 十四年七月十六日沿江制置副使兼知鄂州李
直奏沿江制置副使一司係朝廷特行初立並無官屬
可以協濟今欲舉辟幾員伏乞朝廷參酌速賜指揮詔
沿江制置副使司差幹辦公事一員於京官選人通差
準備差遣一員專差選人並以經任有舉主無過犯人
準備差遣二員通差大小使臣今本司從公選辟不許
差子弟并親知以充員數

宋會要 宣諭使

徽宗宣和七年十二月二十二日詔宇文虛中除保和殿大學士充河北河東路宣諭使其請給人從依見任執政例施行不得辭避 欽宗靖康元年二月十七日詔种師道為河北宣諭使 高宗紹興元年十二月六日詔秘書少監傅崧年權吏部侍郎充淮南東路真陽楚泗承通秦州連水軍宣諭使仍賜逐州軍守臣銀合茶藥

宋會要 宣諭使

紹興二年十月十七日左司員外郎曾統言差權監察御史兩浙西路宣諭檢承臺制不得出謁契勘本路見有使相及前執政官知判州府合與不合出謁詔合出謁餘路宣諭依此十一月二十二日詔宣諭官朱異改差浙東福建路胡蒙改差浙西路劉大中改差江南東西路薛徽言改差湖南路明橐依舊廣南東西路二十三日監察御史明橐言臣等宣諭二廣應臣章奏比作機連文字投進應有不依體式及小節未圓之類乞免退下或得旨允從亦乞嚴責程限如是則遠方事理早徹聖聰陛下德音速被遐土詔依其諸路宣諭官投進

章奏文字並依此施行 紹興三年五月二十五日詔
今後宣諭官不得一面擅行取撥支使諸官司錢物如
有合支用錢物並仰申取朝廷指揮如違重寘典憲以
知郴州趙不羣稱郴州桂陽監緣去歲亢旱民大缺
食其奏未蒙回降於是荆湖南路宣諭薛徽言即權就
借諸司見管錢并全永州經制司封樁錢銀應副收糴
衡永全州米數賑糴實事勢急切難以待報不合擅行
支移得旨放罪故有是詔 九月江南東西路宣諭劉
大中言今已宣諭了畢有元給降到親劄御寶曆緣江
南東西兩路州縣事務繁多曆紙難以盡載全文已具
節目書曆外今將薦舉元奏全文繕寫成一冊發削官

吏一冊申明本路利害二冊檢察平反改正施行事件
二冊科錢糧二冊共八冊欲乞先詣通進冊投進仍乞
擇日上殿從之 十四日劉大中又言宣諭回程了畢
有合結局事件一准學士院給降到宣示逐路官吏等
詔書一道并可漏子全乞申納尚書省一准樞密院給
降到招收賊盜金字牌黃旗榜五副乞申納樞密院一
本司應干行遣公案簿書等乞送臨安府收管架閣一
乞限五日結局並從之 四年二月二十七日監察御
史廣南西路宣諭明橐言二廣郡縣最多封疆亦闊加
之水土惡弱又瓊州昌化等軍係過海南自行朝往返
萬里橐將帶一行官吏奉行使指不憚寒暑委有艱勤

恭觀元降手詔及畫一內雖有推恩指揮緣一行官吏
事繁簡難易不同若一例陳乞則簡易者遂至僥冒煩
難者無以甄別矣今來除素乞不推恩外所有一行官
吏乞分升降作等第推恩庶得事理平允從之 三月
七日劉大中改除祕書少監上謂朱勝非曰大中北宣
諭江西頗多興獄今猶未已若令為諫官恐郡縣觀望
朕於用刑欽恤明察常懼有司行法意外今遷大中為
少監蓋朕之深慮也 四月十二日詔祕書少監劉大
中昨往江南東西路宣諭回程結局了當官吏與作三
等推恩施行第一等與減二年磨勘第二等減一年磨
勘第三等減半年磨勘選人比類施行內年限不同仍

依四年法比折白身人候有名目日收使 六年十二
月九日三省言紹興二年遣使分詣諸道布宣德意當
時川陝諸郡不置選官前去詔差右司員外郎范直方
宣諭川陝諸郡及撫問吳玠一行將士并給賜御劄曆
子令孫訪逐路見任官黷汚能否書上曆子薦削以聞
紹興七年二月九日詔范直方今往川陝宣諭并撫
問吳玠一行將士其四川監司帥臣吳玠軍前並令學
士院降詔其逐路州軍仰宣諭司謄寫行下內席益吳
玠仍別降口宣詔曰敕成都府潼州府葭州利州路帥
臣監司等朕惟戎兵國之大事而民邦本也二者皆吾
所重乃軍興十有三載轉餉所資萬民若甚朕既不敏

不能亟定海內與之休息中夜以興念有以紓吾民者而吏或不能體朕之意一切掊取莫肯加恤或歛不以時或責非所有或多為之數以資吏姦或虐取其贏以濟他用甚者因以自私靡所不至而吾民病矣前遣使者分察諸道以懲以革惟是隴蜀巴漢去朝廷數千里方宿重兵以臨關輔慮有苛擾如前之為惕然于懷曷敢忘遠夫帥鎮吾所以屬兵民監司吾所以寄耳目當宣化率下督姦惠民使州縣之吏知賦斂之不得已念斯民之無堪愛惜其民取無乏事而已今遣使者宣朕之意鎮撫諭告省問風俗平反獄訟察官吏之善否給以親劄御寶曆使明著其狀朕將躬覽而加黜陟焉咨

爾有位惟兵是撫惟民是恤惟廉平是修惟公正是務
毋或不迪麗于邦憲故茲詔諭想宜知悉 十二日范
直方言昨諸路宣諭申請恐沿路或有潰兵邀阻給降
到金字牌旗榜二副準備緩急措置招收詔金字牌旗
榜令樞密院依數降給 十八日范直方又言臣誤蒙
異恩濫將使指未知稱塞曉夕震懼竊以富家艱難之
時川陝凋弊之後兵屯益廣用度日滋揣本窮源動有
牽制陛下雖有惻怛愛民之心恐未悉下究微臣雖有
精忠體國之意亦無由自陳所可自竭者仰體陛下所
以遣使之意要當正身公心以示遠人激濁揚清以勵
多士凡人情之好惡風俗之美惡民力之耗數獄訟之

冤抑皆得以上聞然道理阻遠郵傳往復動經歲月深
恐不能久待伏望指揮僉事有實利於民利害迫切間
不容髮者許臣同逐路帥臣監司公共相度事之緩急
窮究利害委不可待報即先次施行訖續具奏聞庶幾
遠方疲瘵之民速被聖澤而牛馬萬里之行亦不為徒
勞矣詔事干糧運令與帥臣監司同共相度關申安撫
制置大使司施行所有違戾詔條事件依所奏先次改
正外民間論訴冤枉體究有實即送所屬根治餘並申
尚書省 紹興八年十一月八日監察御史江西路宣
諭李案言欲乞同昨監察御史胡世將奉使福建路督
討范汝為例依本路提點刑獄官一歲所舉官吏條格

員數詔依五路宣諭官已得指揮 紹興九年二月九日監察御史三京淮北宣諭方庭實言被旨前去三京淮北宣諭令措置事件一臣到東京日先詣景靈宮到西京日先朝謁陵寢相視合修葺去處逐一聞奏庶幾上慰祖宗神明之靈下副士民觀瞻之意一人主之所以鼓動四方者莫先乎號令故奉天之詔山東雖悍卒武夫亦皆感激流涕臣所齎詔書并口宣願陛下法禹湯之罪己哀痛自責庶可以感動人心一河南州郡久隔王化務先勸誘臣所至乞令延禮耆舊訪問疾苦戒諭官吏推行赦書內寬恤事件如戶口虛實官吏能否之類密具聞奏一遺逸山林有清節高名之士或有文

武才能可備國家之用者許臣徧行採訪具名聞奏一
河南州郡文武官及土豪等昨緣劉豫叛逆自結山寨
不忘國恩之人赦書內已令所在保明以聞官員量行
擢用土豪優與推恩欲乞給降敕武至保義郎空名官
告各一道承節承信郎進武進義校尉下班祇應進義
副尉守闕進義副尉進勇副尉守闕進勇副尉空名補
帖綾紙官告各二道令所屬日下出給許臣書填作借
補官資逐旋保奏候得旨換給正補付身一歸附之初
人情未定恐有盜賊嘯聚乞令臣就便招安乞給降金
字牌黃榜等前去其合措置事宜不可候報者許權行
措置一赦內一項應見任文武官各安職守並不易置

今奉命宣諭之初當使遠人知朝廷大信雖有官吏不可倚仗之人未可便行易置或在任官吏見被民間論訴候回日具奏一所至河南州郡宣布德意欲乞許臣節次具因依牒報陝西五路宣諭周聿照會并乞令周聿所施行事宜亦具因依牒報臣庶使號令風傳遠近響應一河南州郡隔絕朝廷已久其利害事宜不可遙度乞候到逐處州郡逐一具奏詔第項令學士院修撰第六項令樞密院給降十副餘並從之

紹興九年

御史方庭實宣諭三京淮北京使者職也九年復陝西四月詔簽樞樞密往永興宣諭秘少鄭剛中為參謀予衛卒千人因制置移屯等事宜諭之權自此重矣二十

二日詔李霖罷宣諭差充廣西提刑其江西盜賊專委張守措置招捕以中書門下省言李霖昨差充宣諭江西本令宣導德意乃專意督戰措置乖方致陷失巡尉不一又於元奏畫一之外欲移易別路及行在官吏及乞依提刑司奏舉改官等並是招權妄作故有是命四月二日詔差簽書樞密院事樓炤前去宣諭陝西諸路新復境土所有隨行合用軍馬令殿前司差官兵一千人將官二員內馬軍一百人其經過州縣處有嘯聚盜賊令樞密院給降招撫金字牌旗榜一十副并令學士院降詔付陝西逐路州軍帥守施行十五日詔已差簽書樞密院事樓炤往陝西諸路宣諭德意合措置

事非一可令就便詢究不拘三省樞密院事並逐一楷
置聞奏 五月一日諫議大夫曾統言臣聞古者國無
九年之蓄曰不足無六年之蓄曰急藏於民猶藏於國
也今縣官所入僅足更歲方之於古可謂急矣而有司
既無養財之術且不知節以制度豈不殆哉竊見近年
困於養兵所以致用者蓋亦多端矣然未見所謂足國
裕民之策使公私饒益無不足之憂者蓋不知節以制
度故也臣不敢毛舉細故但以去冬及春以來遣使之
費言之初命韓肖胄聘金國又命王倫交割地界以
至遣方庭實宣諭三京河南等處郭仲荀留守東京遣
周聿就同郭浩宣諭陝西諸路遣士儗張燾恭謁陵寢

又命樓炤至永興等路布宣朝廷德意凡此七使所携
官吏軍兵其數甚多起發借請之類不知其數竊聞熙
寧初命宰臣韓絳宣諭陝西纔費十八萬絳時論沸騰
以為大咎今一使之費固已數倍於昔合而計之不知
其幾何凡此數事雖有出於不得已者然其援引體例
悉非舊比故所費尤廣蓋自崇寧以來權臣用事務為
華侈以悅人情其所施行前無所稽後無可繼綱紀咸
蕩法度廢弛其弊至於今未革也加以兵戎圖籍焚毀
無可考按盡出一時指揮將來克復境土兩宮南還前
命大臣迎奉其費不少謂宜選擇忠實通練之臣檢照
三省諸房及尚書六部應於國朝舊制凡使命下官吏

軍兵人數及支費則例逐一裁定要使前有所稽後為可繼庶無妄費可以行遠不勝幸甚從之 六月二十

四日宗正少卿三京淮北宣諭方庭實言臣聞真宗皇帝自景德講好之後邊境寧靜耕桑蔽野戴白之民不識兵革此天地好生之大德帝王長久之基業也茲者大金割還河南舊地以通和好兩國生靈遂獲休息陛下惇守信義堅如金石臣不復有言竊恐沿邊州縣未能上體德意或招納叛亡或渡河侵擾初緣細故寔播大事伏望明詔官吏兵民各守疆封務相輯睦行灌瓜之恩絕爭桑之忿安土樂業免於流移戰鬪之苦如景德時事則甚盛之舉也從之 二十七日殿中侍御史

周葵言竊聞中原遺民初覩朝廷所遣宣諭之臣歡呼
感泣有復見漢官威儀之嘆此皆祖宗恩澤固結之久
陛下德意感動之深人心所歸大意可見今中原百姓
苦偽齊苛暴莫不歸心本朝竇陛下恢復之基也然而
凋瘵之餘易以騷動今自宣諭以後所遣留守監司及
其他使命已至數人各有添破官屬人從於新復州縣
少有須索則民將不勝其應非所以慰安之臣願自今
非有急切事宜不須更遣使命留守監司有見闕人處
特行選差外其餘且令因任所有應緣迎奉梓宮及兩
宮官吏並候朝廷見得入界有期方令起發已起發者
令於鎮江等處聽候指揮庶幾河南州縣不致煩擾詔

休內已起發官不得於沿路及新復州軍驛擾 十月
十二日簽書樞密院事樓炤言往陝西宣諭今已回行
在所訖所有行府職事合行結罷詔限五日結罷 紹
興十一年十月三日川陝宣諭使鄭剛中言被旨所過
州縣許按察官吏除治行顯著罪犯明白之人合行聞
奏外欲乞許令薦舉改官親民任使七員堪充從事郎
縣令任使十員庶幾有以獎進人材從之 紹興三十
一年六月八日詔御史中丞汪徹充湖北京西宣諭使
仍節制兩路軍馬先是徹以得旨疾速前去撫勞將士
體訪事宜候事定日赴行在徹乞以湖北京西宣諭使
司為名於鄂州置司就用御史中丞印記行使故有是

命十九日詔汪徹將來起發除給券外每月別結錢一百貫 紹興三十二年二月一日詔左朝請郎試中書舍人兼權直學士院兼侍講虞允文試兵部尚書充川陝宣諭使允文言被旨差充川陝宣諭使乞依汪徹宣諭已得指揮施行今具畫一內不同事件一今乞以川陝宣諭使司為名其兵部尚書印記見在行官本部今關借奉使印一面行使一今來一行官屬人吏軍兵等合給券曆等緣戶部糧料院左藏庫已椿船起發欲乞下建康府分差行在糧料院出給券曆於總領所支請施行一置司去處欲乞且就興州踏逐空閑去處以備一行官屬等安泊如有往來措置事件即起發前去

續具奏知一差破人數內御史臺贊引知班二人今改
作引接名目請給等依元降指揮一所有一行官屬等
差破到當直兵士沿路若有逃亡即乞於諸州踏逐差
填並從之 紹興三十二年 孝宗即位未改元九月十八
日詔王之望為權戶部侍郎川陝宣諭使十二月二十
九日詔虞允文起發赴行在 孝宗隆興元年四月十
五日詔王之望除集英殿脩撰提舉江州太平興國宮
其川陝宣諭司限五日結局王之望言吳璘已回興州
措置杞截宣諭一司別無職事兼以衰病乞宮觀故有
是命 六月二十五日詔虞允文除兵部尚書兼湖北
京西路宣諭 隆興二年四月三日詔尚書戶部侍郎

錢端禮吏部侍郎兼權直學士院王之望兼充兩淮宣諭使宣布德意撫諭軍民應官吏自帥守以下有才能者許令舉薦貪殘不法疲懦不職奏劾罷易見今年利擾民事件一面禁戢先是上宣諭輔臣曰王師屯駐淮上暴露日久朕念兩路之民困於饋餉修築之役未能安業故有是命 八月詔左朝奉大夫江東運副薛良朋充淮西宣諭使司參議官先差度支員外郎韓元吉得旨令回行在供職至是宣諭使王之望言良朋職司漕計諳曉轉輸乞為參佐之任故有是命 六月七日尚書戶部侍郎淮東宣諭使錢端禮言被旨差充宣諭淮東今來使事已畢欲乞限五日結局詔候過防秋取

旨未可結局 九月十九日詔權尚書刑部侍郎吳芾
為給事中兼淮西宣諭使 十一月五日臣僚言伏覩
指揮淮西宣諭司結局其官吏軍兵並依汪徽例等第
推賞伏見汪徽督師襄漢之時疆對敵壘嘗交鋒及一
行官吏以次行賞第一等轉兩官第二等轉一官減二
年磨勘第三等轉一官今歲淮西外無邊境如一府官
吏先受恩賞竊慮屯戍之人無不怨望不若寢之於未
然從之 開禧二年正月二十三日詔吏部侍郎薛叔
似差充湖北京路宣諭使合行事件疾速條具申三省
樞密院限十日起發既而叔似畫一申請一合差官屬
今比擬權刑部侍郎周聿昨充宣諭使例更加裁減止

乞差主管機宜文字一員幹辦官二員準備差遣五員
並許於內外見任得替待闕寄居文武并選人內不以
有無拘礙踏逐指差不許辭避仍申朝廷給降付身差
劄並與理為資任及在任月日許帶行見任或前任或
新任請給仍支給本身驛券一道每月支破贍家錢內
主管機宜文字四十貫幹辦官三十貫準備差遣二十
五貫並日給食錢內主管機宜文字一貫幹辦官八百
文準備差遣七百文各自供職日起支發遣日任支已
上無舊請或不願舊請更各每月支別給錢內主管機
宜文字三十貫幹辦官二十五貫準備差遣二十貫所
有人從主管機宜文字乞差當直兵士一十二人幹辦

官各十人準備差遣各八人其差人并當直兵士許於三衙內依數差撥如願帶見破人者聽不得過合破之數當直人除見請外並依一行兵士例添破餘未其所差屬官下共差破手分一名貼司一名許於內外官司公吏內踏逐指差不得辭避其所差人除舊請外合破進義副尉畧一道日支食錢三百文無舊請人支別給錢八貫自被差日起支發遣日住支如分遣屬官前去幹事許於所在州縣官司指差守分一名同所委屬官前去請給亦乞依此支破如礙名色次數並許依今來則例支給一今來所差屬官乞依例與免謝辭事畢日依舊發遣歸元來去處如辟差不盡乞於前路不以見

任寄居待闕文武并選人踏逐申辟朝廷給降付身所
辟官候公文到日仰所在州軍限日下先次發遣前來
赴司供職不許辭避其差辟并支破請給並依前項事
理施行內合破兵士鞍馬於所在州軍差撥及口食錢
米等亦乞依例施行其屬官下手分貼司亦各乞差兵
士一名差破請給依一行軍兵例施行一行遣文字乞
依周奉例差點檢文字一名主管文字四人贊引知班
二人書寫文字五人書表司通引官各二人許不拘常
制指差不得辭避並理為資任及通理在任月日如有
前後特旨不許發遣並特依今來指揮候事畢歸元來
去處依舊祇應如有見兼差遣回日亦令依舊內點檢

文字替引知班止於本臺人吏內差撥外其餘許於本
臺及六曹寺監內外官司人吏內踏逐指差帶行舊請
其差出名關止許時暫差人權替候回日依舊所有被
差人吏內點檢文字主管文字各日支食錢七百文每
月各支贍家錢十一貫替引知班書寫文字通引官書
表司各日支食錢五百文每月各支贍家錢七貫有名
目人各破本等券一道無名目人點檢文字主管文字
各支破進武副尉券替引知班書寫文字書表司通引
官支破進義副尉券若有拘破名色次數並乞特依今
來則例支破無舊請人每月支別給錢內點檢主管文
字二十貫書寫文字通引官書表司各一十五貫其差

人自被差日起支發遣日任支其一行公吏並行重祿
兼今來係兩路宣諭及撫勞將士體訪事宜并諸雜使
喚不可闕人今乞依周奉例差準備差使準備使喚各
五人於見任寄居待闕已未到部大小使臣校副尉內
不以有無拘礙踏逐指差不許辭避其請給等並依主
管文字例一等支破一除見破親隨廳子親事官承送
人等隨行外今乞依奉使條格更差親隨三人并差當
直兵士五十人乞下殿前馬步司差撥隨逐前去內點
檢文字主管文字準備差使使喚各差擔擎兵士三人
贊引知班書寫文字書表司通引官各二人親隨廳子
各一人並乞下三衙差撥其所差兵士親事官承送廳

子除舊請外內親事官承送每日各支別給錢四百文
米二升當直白直軍兵並每日添破食錢三百文米二
升半廳子日支食錢五百文內親隨請給等依書寫文
字例支破除廳子親事官承送自被差日起支發遣日
往支外其餘一行當直兵士並自出門日起支入門日
往支并乞下臨安府差破茶酒司厨子各二人其請給
依兵士例支破一沿路合要乘騎鞍馬令乞下殿前司
差撥堪好乘騎馬二疋控馬兵士四人所有一行官屬
人吏等合用鞍馬并控馬兵士亦具數下殿前司差撥
堪披帶馬控馬兵士各二人並限日下差撥前來應副
仍乞下所屬並出給控馬人口券并分擘草料小厰前

路批勘所有控馬兵士添破日支錢米依一行兵士體
例支破尚慮道路險遠所差馬羸弱病患不堪乘騎許
所至州軍時暫權差人馬或和顧人轎逐州交替其所
差鞍馬兵士候到置司處權留乘騎候回日發遣元來
去處一所有將帶一行官屬使臣人吏兵士等並依周
率例各借請兩月候回日通舊欠作五釐回尅所有一
行人願分擘請受於行在或所在住家州軍勘給者聽
更合取自朝廷指揮詔差幹辦官一員準備差遣差使
使喚各兩員主管文字書寫文字各二員內贊引知班
改差引接二名當直兵士差三十人餘並依 三月十
五日詔湖北京西州縣饑民闕食流為盜賊已差薛叔

似充宣諭使前去賑卹近邊報兩淮沿邊亦有賊徒嘯聚竊慮亦係饑民理宜一體差官撫諭差給事中鄧友龍充兩淮宣諭使既而友龍依周聿等例畫一條具悉如薛叔似所請詔準備差遣差使使喚各差兩員主管文字書寫文字各二名當直兵士差三十人餘並依

十七日詔鄧友龍除給券錢外每月支別給錢一百貫文 開禧三年三月二十五日詔逆曦就戮合行撫諭四川軍民令許奕前去撫諭仍一就唱犒興州興元府金州諸軍各錢引一十道令安丙於見管錢內取撥已而許奕辭行 四月三日詔刑部侍郎湖北京西宣撫使吳玠充四川宣諭使日下前去撫諭已降指揮唱犒許

要宣諭指揮更不施行湖廣總領項安世時暫兼京西
宣撫司職事候吳玠回日依舊 是月十七日御批付
吳玠比以逆曦負國付卿西討賴宗社之靈賊不旋踵
已誅然遠方亂定之初猶軫憂顧必得信實之臣單車
所至徃宣德意惟卿素知體國就輟以行其遂疾驅為
朕訪求民瘼鎮安羣情如武興一軍兵數偏重今欲分
半屯於益昌別命一帥統之卿可與宣司商略條具來
上諸有經畫併悉以聞 三十日詔書敕四川官吏軍
民僧道耆壽等朕緬懷四蜀遐處一隅山川粹靈自昔
人材之盛祖宗涵養于今德澤之深亦既有年相安無
事豈期世將輟負國恩竊邑叛君甘委身於黠虜干名

犯分敢妄意於異圖事實駭聞理宜亟討尚慮列城之
驚擾預頒密旨以翦除方將命崇文以安驅固已平子
璋於日獲匪其醜旋嘉折首之來誅止其魁靡待斧吭
之往費不煩於遺鏃安再底於覆盂皆爾軍民協于官
吏篤尊君親上之義堅砥節首公之誠力抗兇頑罔從
汚染究觀事變足見人情爰特遣於侍臣俾具宣於溫
詔併優賚予以勞師屯一視而同仁庶益孚於朕意四
方以無侮諒遠震於戎心各寧西居永臻于治故茲撫
諭想宜知悉春暄汝等各比好否遣書指不多及

全唐文

宋會要

宣撫使

真宗咸平三年六月詔曰兵威未戢邊候多虞王師効
攻守之勞邑民苦饋餉之役每念及此予懷惻然臨遣
大臣特加軫問宜令叅知政事向敏中充河北河東沿
邊宣撫大使樞密直學士馮拯陳堯叟充副大使按巡
郡國存問官吏將校僧道耆老百姓等或宣寬大之恩
副茲憫恤之意真宗御長春殿置宴以遣之仁宗慶歷
二年三月十六日命樞密副使杜衍翰林學士丁度充
河東路宣撫使副仍許屯兵多處賜御筵犒設及權於
見任官內暫選差指使事訖還本任地速嚴給遞馬驛

卷三年七月十九日命樞密副使任中師為河東宣撫使叅知政事范仲淹為陝西宣撫使仲淹乞更選近臣一員同往每事議而後行庶無差失詔以知制誥田況為副使續以樞密副使韓琦代仲淹

宋會要宣撫使

慶厯四年六月以叅知政事范仲淹為陝西河東兩路宣撫使仍許於有軍馬州軍賜御筵合行事件便宜處置八月六日命樞密副使富弼充河北宣撫使會盜起保州令弼經制其事八年正月命叅知政事文彥博為河北宣撫使本路體量安撫使明鎬副之以討具州軍賊

宋會要

宣撫使

皇祐四年九月以樞密副使狄青授宣徽南院使荆北路宣撫使都大提舉廣南東西路經制賊盜事英宗治平三年十月六日以同僉書樞密院事郭逵為陝西四路沿邊宣撫使兼權判渭州仍給宣撫使牌印

宋會要

宣撫使

熙寧三年九月八日命吏部侍郎叅知政事韓絳充陝西路宣撫使以直舍人院呂大防為宣撫判官館閣校勘李清臣掌機宜文字續命絳兼河東路詔絳不親到河東止行移文字與合相照應官司其不係招撫部族開拓疆土勾押兵馬取索錢糧事件更不管勾不令本

路申報各得自便絳就拜相充淮南發運使薛向為副
使上以宰相充使則大防為知制誥向為待制可充判
官遂並命為判官 八年十二月二十四日命知延州
天章閣待制吏部員外郎趙高為安南道行營馬步軍
都總管經略招討使兼廣南西路安撫使昭宣使嘉州
防禦使入內押班李憲副之龍神衛四廂都指揮使忠
州刺史燕達為副都總管光祿寺丞溫果管勾機宜文
字徽宗政和六年正月五日詔太尉武寧軍節度使中
太一宮使童貫差直宣和殿陝西河東路宣撫使七年
五月二十二日陝西河東河北路宣撫使童貫言今具
合用屬官六員內文臣二員充宣撫判官文武臣二員

充叅議官文武臣二員充勾當公事從之宣和四年四月八日詔太師劔南東川節度使陝西河東河北路宣撫使楚國公童貫為河北河東宣撫使少保鎮海軍節度使開府儀同三司上清寶籙宮使直保和殿蔡攸副之五年正月七日制以大中大夫尚書左丞王安中為慶遠軍節度使河北河東燕山府路宣撫使知燕山府七月八日詔起復武信軍節度使譚稹為檢校少保河北河東燕山府路宣撫使六年八月十一日詔武信軍節度使譚稹罷河北河東燕山府路宣撫使提舉西京嵩山崇福宮童貫落致仕領樞密院事陝西河北河東燕山府路宣撫使初譚稹之代貫也以常勝軍驕

請河東別創一軍分其權招雲朔之人以五萬為率屯河東州縣號義勝軍以李嗣本耿守忠為師撫其軍甚厚衣廩皆倍他軍常勝軍聞之潛投河東者接踵郭藥師張令徽訴于朝詔常勝軍毋得至關六藥師等猶懼其亡皆再涅其面常勝軍並怨而金人絕無交割山後州縣之意以鎮措置乖方故貶之而復用貫

宋會要 宣撫使

欽宗靖康元年四月十八日檢校少師鎮洮軍節度河北宣諭使种師道除太尉依前鎮洮軍節度使充河北河東宣撫使六月三日以知樞密院事李綱為河北河東宣撫使先是制置副使种師中援太原失利朝廷欲

再遣兵門下侍郎耿南仲言方今欲援太原非綱不可
宜以為宣撫使上召綱諭以欲遣意綱自陳書生不知
兵今使為大帥恐不勝任且誤國事於是臺諫交章言
綱儒者不知軍將兵必敗綱忠鯁異眾為大臣所陷寢
不報乃受命六月資政殿學士劉韜為河北河東路宣
撫副使

宋會要 宣撫使

四年二月二十三日德音昨差張浚為川陝京西湖北
路宣撫處置使見在秦州置司所有川陝等路去行在
地里迂遠民間疾苦無由得知或負冤抑無緣申訴仰
宣撫處置司詢訪疾苦以聞 六月七日詔宣撫使張

後下一行官吏並各轉一官資內有無資可轉人比折
支賜白身人願補名目或願換支賜或願候有名目收
使並聽以自行在至關陝萬里欲旌其勞故也 九月
十一日三省言昨降指揮宣撫處置使司許便宜行事
係為宣撫處置使有合措置事件方許從便宜一面施
行訪聞本司差委官屬幹辦事務如李允文傅雱之屬
所至專輒行事皆稱係依本司所得便宜指揮州縣莫
敢違戾其宣撫使司所差官如有合行從權措置事務
自合申稟本司聽候指揮若許將本司所得便宜指揮
自己一面施行則凡係本司差委官吏盡得便宜行事
顯見侵紊詔今後除宣撫處置使依已降指揮許便宜

行事外其差委官屬並不許輒用便宜指揮如違重寘典憲 同日三省言宣撫處置使司去歲出師以京西盜賊充斥及荆湖南北分治兵器揀選將士遂許逐路並聽節制今來本司見於秦州駐劄相去逐路大段遙遠緩急機會報應阻隔難以責令奉承兼京西湖北已係分鎮去歲即與舊來事體不同詔陝西四川並依舊聽宣撫處置使司節制京西湖北依分鎮畫一指揮其荆湖南路聽宣撫使司節制指揮更不施行

宋會要

宣撫使

十月十五日兩浙西路安撫大使淮南路宣撫使劉光世條具事件一合使印記乞以淮南東路宣撫使為文

一所管淮南真揚通泰承楚州漕水軍等處累經金賊殘破兼接山東正係邊面州軍合要軍馬控扼光世近將祝友等諸頭項軍馬分撥於逐州駐劄及申朝廷差統制官兼充知州訖所有本州通判已下曹職監當官並管下縣鎮等多是闕官欲乞令逐處所差知州各於本軍所管文武官內選差有心力可以倚仗之人填闕一次候將來事有倫緒日乞從朝廷差注一所管淮南州軍並係殘破去處見乞泊軍馬不少乞量行支降錢糧濟接應副免致闕誤一自來宣撫司並差置官屬今既令就差安撫大使司屬官兼行管幹自合從宜省簡緣所管地分比之淮南路邊面廣闊事務繁夥欲乞量

添主管機宜文字并幹辦公事共三四員通行管幹所
有人吏亦乞差置五七人專一施行文字乞於所轄州
縣踏逐抽差其每月請受並乞比安撫司見行條例一
今來所管江北淮南州軍北接山東不在遣官過江幹
事及間探事宜即與江池州宣撫使所管淮南州軍事
體不同乞差置淮備將領淮備差遣差使使喚使臣等
仍依兩浙西路安撫大使司已指揮踏逐辟差一淮南
州軍昨緣金賊侵犯土豪聚集巡社欲乞今後土豪所
集民兵巡社今所管州軍各籍定人數無事之時故令
着業耕種如遇緊急即旋行拘集從之 同日宣撫使
朱勝非言自來安撫司都總管司各置人吏及公使激

賞錢物緣總管司文移不多不曾專差人吏并激賞公
使亦不曾別破錢物並係安撫司兼今來宣撫司行移
別路文字合別置司屬除公使激賞外乞量差人吏三
五人主行一司文字所有抽差召募及請受並比安撫
司見行條令候將來事務稍多合行添置人吏續具奏
請一除屬官外有統制統領將官准備將領准備差遣
差使使喚等並乞依江西路安撫司已得指揮施行其
人數隨事多寡量行差置詔許差書吏二名貼書一名
餘依 十一月五日詔參知政事孟庾除福建江西湖
南北路宣撫使太尉武成感德軍節度使韓世忠除宣
撫副使應官吏軍兵一切事務共為一司不得輒分彼

此差撥姚端於所管人內揀選京東河北軍共五百人
統領前去使喚 十一日福建江西荆湖南北路宣撫
使司言大軍今已進發由台温州先往福建討蕩賊寇
次赴餘路所有大軍合用錢糧草料理合預行橋辦欲
不以有無拘礙並許取撥所至並鄰路州縣係省不係
省及係封橋不係封橋上供等應管錢物應副庶可預
行橋辦臨期免致闕誤從之 同日詔宣撫使孟庾係
見任執政所行文文字即與朝廷一同其立功將佐等合
行推恩之人令孟庾先次考實出給劄子訖具功狀奏
知仍要左右郎官據宣撫司出到劄子~~或~~作一項繳申
朝廷換給告勅宣劄施行

宋會要 宣撫使

紹興二年二月四日樞密院言淮南東路盜賊屏除民
漸歸業理合勸率耕桑經理一路詔差劉光世將帶所
部銳兵一萬人往揚州置宣撫司修舉職事時復到鎮
江府點檢人馬訖却回揚州 三月七日詔吏部尚書
淮西招撫使李光充端明殿學士江南東路安撫大使
馬步軍都總管兼知建康府兼充壽春府滁濠和廬州
無為軍宣撫使 閏四月十七日詔賢文閣學士通議
大夫程唐差充宣撫處置使司參議官專以措置財用
從宣撫使張俊請也 五月十六日荆湖廣南路宣撫
使兼知潭州充湖南路安撫使李綱言竊見祖宗以來

所置使名莫重於宣撫多以見任執政官充使近如樞
密院張浚宣撫陝西四川參知政事孟庾宣撫福建江
西荆湖南北路皆見任執政今又除臣宣撫荆湖事體
實有相妨借使諸處盜賊一司欲令招納一司欲令討
捕不知何所適從諸州錢糧一司欲令支用一司欲令
樁留不知如何遵稟以至節制諸將辟差官吏行移措
置皆有妨礙欲望詳酌事宜先後將本司職事明降處
分使有遵守又契勘所領荆湖宣撫職事與福建江西
荆湖宣撫使司軍馬事體一同所用錢糧理合通融應
副不分彼此今來福建江西荆湖宣撫使副一行軍馬
先到江西并荆湖路分所有逐路州縣錢米並係先次

剡刷拘收若不通融應副竊恐闕絕誤事詔令孟庾韓世忠候撫定荆湖南北盜賊班師日量度合用數外盡數留與李綱支用 同日李綱又言被旨應干合行事件並依呂頤浩昨任江東安撫大使日所得畫一指揮施行除恭依外有逐路財賦乞許臣取撥所置州縣係省不係省及係封樁不係封樁并上供等錢物應副支用仍乞依安撫大使司例錢四十萬貫米二十萬碩充一歲之用從之 同日李綱又言乞本司行移除福建江西荆湖宣撫使司及諸路安撫大使使用關牒外本路帥臣監司州縣並用劄子從官以上劄送餘並劄付從之 十八日李綱又言荆湖之地綿亘數千里號為上

流如鼎澧岳鄂州連荆南一帶皆當屯宿重兵倚為形勢近所乞不滿萬人若到本路兼得岳飛吳玠韓京吳錫等兵方僅及二萬之數分屯沿江要害去處深慮不足乞候到本路相度形勢圖上方略別行申請樞密院勘會除岳飛合係平賊了日赴行在外其餘軍馬依已降指揮平賊了日盡數交割與李綱使喚 七月十六日江南東路安撫大使兼知建康府充壽春府滁濠廬和州無為軍宣撫使李光言合辟參議官二員已辟宗穎外更乞差在中大夫盛旦從之 九月二十三日臣僚言祖宗以來遣宣撫使事畢結局今諸路例帶宣撫使名位混清兼非舊制文移交互州縣難於應報詔諸

路帥臣帶宣撫者並罷內淮東路依舊隸屬浙西帥司
淮西并德安府等處依舊隸江東西帥司廣東西湖北
路各隸本路帥司 二十四日詔太尉武成王德軍節
度使韓世忠充江南東西路宣撫使 二十九日詔顯
謨閣直學士左通奉大夫利州路經略安撫使馬步軍
都總管兼知興元軍府王似特授依前官充端明殿學
士川陝等路宣撫處置副使 十二月十八日詔知夔
州盧法原除龍圖閣學士差充川陝宣撫處置副使與
王似同共治事紹興三年二月五日宣撫處置使張浚
言諸路經略安撫發運監司屬官依條許逐司官互相
薦舉所有本司隨軍轉運使副下屬官內係選人員關

在法合用舉主陞改緣未有許監司等薦舉指揮欲依
發運司屬官體列施行從之 三月二十六日知樞密
院事宣撫處置使張浚言逐路監司知通等所有闕官
去處選差奏聞先令赴任管幹職事竊慮奏狀未達間
別行差官前來緣道路遙遠多是所替人已年滿過期
再差官到任亦已多日若便令交割不唯有礙見任人
資考兼恐所差人各懷不測替罷不肯究心職事今欲
將朝廷差到官如踰期者別與本等合入差遣所貴各
不相妨從之 二十七日詔太尉武成德軍節度使
神武左軍都統制充江南東西路宣撫使韓世忠可特
授開府儀同三司充淮南東西路宣撫使泗州置司

四月八日詔廣遠軍承宣使神武前軍統制王璣特除
捧日天武四廂都指揮使充淮南東西路宣撫使司都
統制以樞密院勘會宣撫司見闕都統制官故有是命
十一日詔越州鈐轄劉綱聽韓世忠使喚綱元係泗
州招信縣人熟知地利從宣撫使司所請也 六月十
九日知樞密院事宣撫處置使張浚言被旨王似除端
明殿學士川陝等路宣撫處置副使其知成都府令張
浚具名奏差臣今欲乞改差端明殿學士左正奉大夫
宣撫處置使司叅議張深充成都府路兵馬鈐轄兼本
路安撫使兼知成都軍府事望給降告命從之 九月
一日吏部言若宰執見帶領三省樞密院職事任宣撫

使副行移文字合割下本部本部行移即具申本司如
不領三省樞密院事并從官任宣撫使副行移文字合
申本部本部行移即用公牒詔依吏部供到狀內事理
施行餘部准此先是張浚以知樞密院出為宣撫處置
使續以王似盧法原為宣撫處置副使止係侍從官吏
部申明故有是命 十月五日端明殿學士左通奉大
夫川陝等路宣撫處置副使王似等言乞照用紹興二
年九月四日敕應川陝官員陳乞覃恩磨勘奏薦封贈
循資致仕遺表或去失付身批書等干照文字命官移
放叙復緣道路遼遠仰經所在州軍保明申宣撫處置
使司驗實依便宜指揮一面施行數內奏差監司守倅

將佐等并官員新舊法宮祠及陳乞守本官致仕捧表
陣亡歿於王事恩澤川陝定差辟官年勞酬賞之類係
宣撫處置使張浚已得旨便宜黜陟施行竊恐道路遙
遠經隔歲月人心疑惑臣遵依指揮並出給照刷許繫
銜放行請受逐旋類聚奏聞乞朝廷給降付身告勅契
文臣陳乞舊法宮祠并流寓文武官陳乞破格新法宮
祠見遵依已降指揮所有武官陳乞舊法宮祠差違別
無指揮遵執乞下有司頒降見行條法付本司遵執施
行若武臣陳乞如曾任知州軍并路分都監以上委有
戰功勞績之人欲乞許行蓋注並從之

紹興四年三月一日知樞密院事張浚言被旨召還樞
庭依已降指揮將帶軍馬前赴行在今來道路遼遠一
行起發事務并將來合奏陳宣撫司文字不少臣已量
度差帶官屬分頭管幹欲乞候到行在依例推恩仍特
與內外陞等差遣一次從之 二十四日武成感德軍
節度使開府儀同三司充鎮江建康府淮南東路宣撫
使韓世忠言昨來申所屬官乞依舊例具參謀官係與
轉運使副叙官參議官與知州軍朝請大夫已上叙官
機宜幹辦公事並依發運司主管文字叙官准備差遣
與簽判叙官今准朝旨宣撫司叅謀叅議官與提舉叅
鹽官叙官機宜幹辦與通判叙官竊慮屬官叙位不應

降等兼紹興令發運同主管文字幹辦公事在所部通判之上今來宣撫使司機宜幹辦公事却與通判叙官顯見宣撫使在發運使之下詔參謀官係知州資序人與提刑叙官參議官係知州資序人與轉運判官叙官機宜幹辦公事並依發運司主管文字叙官 二十六日詔王似除資正殿學士川陝宣撫使盧法原除端明殿學士川陝宣撫副使並在司治事吳玠除川陝宣撫副使免僉書本司公事專以指置沿邊諸處戰守事宜四月一日詔曰宣撫使司并川陝官吏軍民等朕念慮疆陲覽觀形勢秦蜀壤地實據要衝自時多虞則有戎事惴然西顧曾靡遑寧昨者特遣樞臣張浚往宣恩

威任國憂寄蓋五年于彼朕有聞焉肆頒召命俾還行
闕而師言未已臺諫交章考其出使失職之辜在於常
刑當從速竄朕念所用吳玠等能禦大敵累立戰功許
國一心可膺委任因是貸浚止從薄責庶使玠等知朕
厚於勸功而略於記罪之意感悅奮勵益建良圖應累
年以來川陝諸路其實有勲勞而未逮於賞濫被刑罰
而莫當其罪才能偏廢而不用謀猷見仰而不伸廣興
橫歛而至於無涯煩擾斯民而使之失業赦全所頒之
澤不盡推行朝廷所差之官不獲赴上凡害民弊衆之
事違吾德意者仰宣撫司講求咨訪疾速措置以稱朕
惻怛軫憂之誠庶迪惠和至臻嘉靖播告有衆咸使聞

知五月八日川陝等路宣撫處置副使王似等言本
 司相度今後川陝帥臣監司闕官或去替不速欲乞從
 本司選擇可倚仗之人一而擬差主管職事具名奏乞
 詳酌給降付身其州縣官若候不堪倚仗方行對移即
 軍事緩急已致闕誤欲乞將轉運司舊來擬注知通窠
 闕并諸州僉判及知縣亦乞權許本司選官奏差乞給
 降付身庶幾緩急之際得人倚辦詔帥臣監司如差倚
 闕替人窠闕令宣撫使司並約程前期每一闕具奏三
 兩名聽旨除授其非次見闕不可倚報許從本司擬差
 施行六月一日武成感德軍節度使開府儀同三司
 鎮江建康府淮南東路宣撫使韓世忠言乞依昨任江

南東西路宣撫使日已得畫一指揮行移除安撫大使
外並用劄子從之 十七日左諫議大夫唐輝言自來
內外官司移文或用符牒各有定式唯三省樞密院用
劄子他官司不敢用蓋以尊朝廷也軍興以來領宣撫
使皆見在二府故用劄子向因主兵官輒援此例臣僚
以為言乞講求事實立為永法已得旨統兵官行移文
字輒用劄子者徒二年今來韓世忠如不係見帶三省
樞密院職事不合用劄子即乞指揮改正施行從之
七月三十日詔鎮江建康府淮南東路宣撫使司行移
本路帥司用公牒所部縣並用劄子 八月三日詔趙
鼎除知樞密院事川陝宣撫處置使 十月七日川陝

等路宣撫處置使司言定國軍承宣使權秦鳳路馬步
軍副都總管權知秦州兼卽制階文州統制軍馬吳璘
明州觀察使環慶路馬步軍副都總管兼知慶陽軍府
事楊政前後統制軍馬累立奇功近金賊總領大兵欲
取川蜀直犯仙人關殺金平其吳璘改差充燕河蘭廓
路經畧安撫使兼馬步軍都總管兼知熙州軍州事統
制關外軍馬依前節制階文州楊政改差充環慶路經
畧安撫使兼馬步軍都總管兼知慶陽軍府事統制
鳳興州先次出給照劄去訖伏乞給降付身下本司給
付從之 十一月二十日江南東路淮南路宣撫使司
言本司官屬內幹辦公事三員准備將領五員准備差
遣准備差使各五員緣今來事宜之際軍事繁冗全要

官屬辦集即今見有官屬數少委是幹當不前乞依韓
世忠軍例添差逐色官屬庶幾易為集事從之紹興五
年正月十八日詔武成感德軍節度使開府儀同三司
充鎮江建康府淮南東路宣撫使韓世忠除少保依前
武成感德軍節度使充淮南東路宣撫使鎮江府置司
二十八日詔淮西路宣撫使劉光世於宣州太平州
選擇穩便去處屯泊人馬 閏二月八日詔今後省陳
換給宣撫處置使司付身人並免召保驗實保明與換
給付身 三月六日三省言劉光世韓世忠見充淮南
西路宣撫使緣逐軍兵馬見在鎮江府太平州屯駐詔
劉光世兼太平州宣撫使韓世忠兼鎮江府宣撫使

九日詔邵漣兼權川陝宣撫使應軍期錢糧等事與吳玠通行主管候正官到日罷 十三日定江昭慶軍節度使開府儀同三司江南東路宣撫使張浚言本司叅議官左中奉大夫直秘閣~~使~~愿見係添差通判嚴州欽望特賜改差平江府添差通判候交割了日乞令帶行見任依舊權本司叅議官將來事平日罷本司職事前赴供職從之紹興六年正月十三日詔吳玠依舊充川陝宣撫使並依江東淮南宣撫司體例專切訓練軍馬計備器中邊防事務其綿州一司可減罷所管軍馬聽吳玠分撥使喚應千錢物令趙開拘收充應副宣撫司錢糧使用仍限半月結局 六月二十六日臣僚論張

浚軍中書寫機宜文字張體純自出身至改官皆不申
格法畏避討論遂隸名軍中請罷黜上曰當如所請豈
有不吝於朝廷之人而可為大將軍屬耶 十二月十
四日諸路軍事都督行府言朝廷今欲恢復中原所賴
者正在諸大帥幕府猶要得人自兵興以來士大夫一
入軍中便竊議而鄙笑之指為濁流皆緣朝廷未加審
擇一聽其辟差故所用之人或坐罪廢或報私恩或因
應副或出于求貪利覓官略無去就之節有更十年而
不退者如朝廷稍擇賢才以重其選乞應軍中屬官許
本司奏辟或朝廷差除選人依舊三年外餘並以二年
為任如願留再任者聽本司申取朝廷指揮

宋會要宣撫使

紹興七年二月二十六日三省言岳飛任檢校少使武勝定國軍節度使係充湖北京西路宣撫副使兼營田使今來以降制除太尉依前武勝定國軍節度使理合增重使名詔岳飛充湖北京西路宣撫使兼營田大使九年正月五日赦應兩淮荆襄川陝新舊宣撫使及三衙管軍並特取旨優異推賞統兵及將佐妻逐軍開具等第推恩十八日詔保平靜難軍節度使開府儀同三司川陝宣撫使兼營田大使吳玠除四川宣撫使兼營田大使同日詔和衆輔國功臣少師護國鎮安保靜軍節度使充萬壽觀使劉光世除陝西路宣撫使兼營

田大使 同日三省言已降指揮吳玠為四川宣撫使
詔舊守陝西地分階成等州依舊聽吳玠節制 四月
二日四川宣撫副使兼營田大使吳玠言本司昨充川
陝宣撫司日有本軍合用激犒等錢尋中畫到指揮下
四川都轉運司每歲應副錢一百八十萬貫近蒙朝廷
將本司改為四川宣撫司依已得指揮各岷疆界即今
別無招納及差撥官兵乞將上件錢數自紹興九年分
減半支撥從之仍降詔獎諭 九月六日詔胡世將除
寶文閣學士川陝宣撫副使 十年七月十二日詔太
尉保成軍節度使充殿前副都指揮使公事楊沂中除
主管殿前都指揮使公事淮北宣撫副使 十九日太

尉保成軍節度使充主管殿前都指揮使公事楊沂中
言被旨除淮北宣撫副使近由請到指揮以淮北宣撫
副使司為名凡行移文字未審合與不合與宣撫判官
劉琦同共繫銜詔令同繫銜紹興十一年四月二十七
日詔韓世忠張浚岳飛已除樞使副其舊領宣撫等司
合罷退出師臨時取旨遂司見今所管統制統領官將
副已下並改充御前統制統領官將副等隸樞密院仍
各帶御前字入銜及令有司鑄印逐一給付且令依舊
駐劄將來調發取旨施行仍令逐司統制官等各以職
次高下輪替入見及委賞功司將未了功賞疾速取旨
推恩 同日小師鎮鼎崇信奉寧軍節度使充淮南西

路宣撫使兼河南北諸路招討使兼營田大使濟國公
張浚言近蒙除受樞密使所有宣撫司未曾回報朝廷
并省部都司文字并日前未了宿毫功賞及淮西諸處
功賞等乞立限結局仍許臣繫舊階申發詔依限半月
結局 二十八日詔韓世忠張浚岳飛宣撫官屬並優
與陞等差遣

宋會要 宣撫使

紹興十八年五月二十七日詔四川宣撫司并屬官並
罷之以上中興會要紹興三十二年七月八日 孝宗已
即位未改元 張浚除少傅依前觀文殿大學士充江淮
東西路宣撫使建康府置司進封魏國公 十月二十

九日江淮東西路宣撫使司言本司屬官欲依四川宣撫司主管機宜文字與監司幹辦公事與知州序官從之

宋會要 宣撫使

孝宗隆興元年四月二十二日張浚言昨承指揮江淮宣撫司結局所有應辦借置舟船津發錢糧修蓋營寨置辦軍須得力官吏得旨許臣保明量與推恩今作優平兩身與減三年及二年磨勘詔江南東路轉運副使向子志特復直秘閣淮南路轉運判官鍾世明特除直徽猷閣淮南西路提點刑獄公事莫濛江南東路轉運判官陳良弼尚書戶部郎中總領淮東軍馬錢糧洪适

尚書戶部郎中總領湖廣江西京西財賦湖北京西軍
馬錢糧王珏冬特轉一官內礙止法人依條出給減年
公掾 六月十三日四川宣撫司言得旨差參議軍事
一員其叙位請給人從等並依江淮宣撫使司叅議軍
事已得指揮施行本司舊又有主管及書寫機宜文字
幹辦公事準備差遣等係一司官屬亦乞許依江淮宣
撫使司已得指揮詔從之 十四日詔張浚特降授特
進依前樞密使江淮軍西路宣撫使節制建康鎮江府
江陰軍江池州屯駐畢馬試尚書禮部侍郎陳俊卿降
授左朝散大夫充敷文閣待制參贊軍事唐文若降授
左承議郎尚書戶部員外郎馮方降授左承事郎直秘

閣查齋差充江淮宣撫使司參議官 七月四日詔江淮

都督府官屬並改充江淮東西路宣撫使司 七日詔

昨都督府進討特許便宜行事今都督府已罷應宣撫
司軍事並合聞奏取旨其前降便宜指揮更不施行

十二月二十八日張浚言昨承恩降節制兩淮後來改
除宣撫都督江淮軍馬二年防秋偶免曠闕除臣與近
上官屬自不當陳乞所有臣隨行官吏軍兵并應辨軍
前實有勞効之人欲望從臣保明比附前後宣撫司督
視府等處月日體例特賜推恩施行從之乾道元年五
月二十九日詔新安郡王吳璘已降指揮除四川宣撫
使所有合差置官屬人吏等依胡世將鄭剛中體例施

行宣撫司人吏舊以六十六人為額緣今別無調發可
裁減一半詔從之三年六月十二日詔虞允文可除
資政殿大學士四川宣撫使續有旨出撫西蜀雖已除
職未足增重闕寄可依舊知樞密院事四川宣撫使
同日左中大夫虞允文言臣蒙恩除資政殿大學士四
川宣撫使所有本司合行事件乞依鄭剛中前後已得
指揮施行今來臣合差辟官屬使臣人吏軍兵等乞就
行在先次量行差帶前去其起發請給等止乞依臣昨
往川陝宣諭日已得指揮施行從之十四日虞允文
言契勘鄭剛中任四川宣撫日有相承到舊管降賜激
賞兩庫所管錢物數百萬貫用支諸軍激犒及逐時入

教拍試支賞之類後來併發制置司支撥二十萬貫外其餘盡數起發赴行在亦有撥入總領司充椿積今來復宣撫司即無一司相承庫務錢物臣司依例合行犒設諸軍一次及後來逐時入教場拍試支賞之類費用不一欲乞下總領所於朝廷封樁錢引內支一百萬貫以備支遣外若臣到任後有拘收到諸路寬剩并諸軍減汰失陷錢物許依鄭剛中指置椿積以備接續支用其封樁錢係已降指揮用與四川對減虛數若制總兩司議定果成對減必分作三年今來止是借撥最後一年支用之數日後却從宣撫司別行陳乞措置撥還從之十六日虞允文言契勘鄭剛中任宣撫司日置

參議官兩員伏見淮南東路轉運判官王之奇深知西
邊軍前利害欲乞改除利州路轉運判官鎮見闕就令
兼本司參議官得以協濟國事從之 十八日虞允文
言奉旨令戶部支錢三十貫付充隨行激賞庫支用所
有依葉義問江澈昨出使例合差帶激賞庫監官一員
隨行從之 同日虞允文言蒙恩除四川宣撫使所有
本司合行事件條具下項一合用印照得昨來樞密葉
義問出使有鑄到樞密行府印一面今乞闕出行使所
有行移並依三省樞密院體式施行仍入諸軍擺鋪通
轉內奏報文字直入內侍省投進一應干軍期事務
全藉監司各州縣官協力應辦如有避事不職貪污苛

援之人乞許本司量度事體輕重勦効或一面對移訖
續具情犯奏聞其庶謹辦職之人亦許本司保明取旨
旌賞除軍期外其餘更有似此之人亦乞依此施行一
契勘四川罷宣撫司日置制置司行宣撫司職事案牘
人文錢物並已撥隸制置司訖今來被旨宣撫四川以
軍事為先欲將舊宣撫司所行軍中應干事務歸本司
外有官員陞改放散舉主士人省試之類乞存留制置
司並從之 五年三月十九日詔王炎除四川宣撫使
依舊參知政事 二十二日王炎言被旨除四川宣撫
使依舊參知政事其應干合行事件臣欲乞並依參知
政事汪澈出使荆襄知樞密院事虞允文四川宣撫前

後已降指揮施行其間或有可以省減事節亦許臣參酌裁損從之六月五日王炎言四川路分闊遠宣司事務繁多即與荆襄不同繞入川蜀便合委官幹事今檢照得虞允文宣撫四川日申請到指揮文臣官屬依鄭剛中差置一十四員欲乞許依虞允文已得指揮施行從之八年九月二十一日詔令戶部支錢一萬貫充四川宣撫司激賞使用九年五月三日王炎言被旨出使宣撫四川今來結局乞依昨來虞允文行府出使結局體例官屬推恩施行詔各與轉一官資

宋會要 宣撫使

淳熙元年三月九日詔中大夫參知政事鄭聞除資政

殿大學士四川宣撫使是年四月詔四川宣撫司屬官
依制置司例賞七月詔已罷宣撫令四川總領趙公說
將四川宣撫司錢物盡數拘收另項樞管別聽朝廷指
揮鄭聞元將帶一行官屬等已至行在依前後例限五
日結局十二月二十八日詔資政殿學士中大夫沈
復除資政殿大學士四川宣撫使與元府置司其見拘
收宣撫司但干錢物軍器等依舊歸還本司官屬只許
辟差機宜文字一員幹辦公事二員昨拘收到諸軍都
統司場務等照應淳熙元年十二月二日已降指揮給
還逐軍施行詔四川諸軍陞差兵官依江上諸軍例並
從主帥依公選擇內統制官申解赴宣撫司審察餘官

一面陞差合給付身人從宣撫使備申樞密院給降如
有合申宣撫司事理令具一般事狀申奏二年六月一
日詔罷四川宣撫司右司諫湯邦彥言陛下復置宣使
以分委寄置司之初議論詳悉慮事權重官屬多故損
其權而減其屬謂財賦聚於宣司而不及軍中故取舊
屬軍中場務悉以還之宣司不得復取謂軍中差使制
於宣司而不由都統則陞黜不審主帥無素恩故除統
制官解宣司審察外其餘俾都統一面自差宣司只申
察院給付而已然宣撫一司其名甚重令復此官而損
其權是予其名而奪其實是必上下交惡軍帥不睦沈
復到司今本久也自財賦還軍中差使由都統復已不

樂軍帥已不相安自此必將大為間隙就令盡易軍帥亦必相忌望更為之制或依葉衡向任荆南故事命一詳練可委從官以樞密都承旨職事就知興元仍移制置一司於興元府使之兼任以總四川之務督監司之縱弛察軍師之勤惰別授沈復以大潘府罷宣司之名收宣司之寔迺從其請令四川總領趙公碩盡數拘宣宣撫司錢物令項椿管開禧二年三月十二日詔四川制置使兼知成都府程松差充四川宣撫司四月十三日詔給事中兼侍講兩淮宣諭使鄧友龍除御史中丞充江淮宣撫使吏部侍郎湖北京西宣諭使薛似除兵部尚書充湖北京西宣撫使 六月四日詔知建康府

丘宝除刑部尚書充江淮宣撫使不允辭免鄧友龍令
赴行在供職 十一月四日詔刑部尚書充江淮宣撫
使丘宝兵部尚書充湖北京西宣撫使薛叔似並除端
明殿學士侍讀丘宝依舊江淮宣撫使薛叔似依舊湖
北京西宣撫使 十八日詔湖廣總領兼湖北京西宣
撫司叅謀官陳謙除寶謨閣待制湖北京西宣撫副使
十二月二十四日詔京西宣撫使薛叔似宣撫副使
陳謙並宮觀知江陵府吳獵除湖北京西宣撫使 三
年三月十七日獵除刑部侍郎依舊湖北京西宣撫使
二十一日御批付獵賊賊干紀神人共憤卿受任荊襄
密通蜀門忠義所激慨然有討賊之志朕甚嘉之今覘

安陸虜騎奔北

威名益著籌畧方深經理創殘申飭

戰守之餘

宜

為朕兼總西事凡可携離逆黨指授將士

一以付卿無失機會又須審度務在必成應有合行事

宜可密切條具奏上故茲劄示想宜知悉

是年四月

十五日詔權兵部尚書宇文韶節除華文閣學士知江

陵府兼權湖北京西宣撫使

是月二十七日除侍讀

依舊華文閣學士充湖北京西宣撫使兼權知江陵府

九月十九日詔紹節充京西湖南北路宣撫使

五月

二十一日知沔州充利州西路宣撫使兼四川宣撫副

使安丙言宣撫司每歲合舉官員數昨因宣撫使廢罷

司

未有專降指揮乞立定每歲合舉官職令陞陟等員數

行下遵守詔依宣撫使已降指揮歲舉員數與三分之一薦舉

宋會要宣撫使

嘉定元年正月二十六日詔四川宣撫副使舉官特依宣撫制置使歲舉改官一十一員從事郎六員從本司之請也三十日京西湖南北路宣撫使宇文紹節奏本司舉官員數已準指揮湖北京西止是兩路北附四川路分每歲舉改官六員從事郎三員朝請大夫以下陞陟大小使臣陞陟二十員分上下半年舉今紹節充京西湖南北路宣撫使乞北附四川路分增添湖南一路員數吏部言四川宣撫係有四路今京西湖南北乃是

三路若從本官所請每歲合舉改官九員從事郎四員
朝請大夫以下陞陟任使八員大小使臣陞陟三十員
並分上下半年舉從之 二月三日詔華文閣學士侍
讀京西湖南北路宣撫使宇文紹節除寶謨閣學士依
舊侍讀京湖宣撫使 三月四日詔京西湖南北路宣
撫司屬官歷任及五考以上人許令宣撫使司置司去
處一路監司通行薦舉從本司之請也十二年二月十
三日詔簽書樞密院事曾從龍除同知樞密院事江淮
宣撫使繼而從龍乞叅酌前後執政官出使減損條具
畫一申請一今來出使乞以同知樞密院行府為名一
官屬等白直人內叅謀叅議官二十人屬官等一十五

人提舉一行事務提轄軍兵點檢文字各五人監印主管文字各四人書寫文字書奏準備差使各二人屬官下使臣及人吏各二人下殿前司步軍司差赴行府分撥應副差使一乞下步軍司揀選差撥入隊披帶少壯一百人部轄將官一員仍帶衣甲器械隨行使喚所有請給起馬犒設等並依已發出軍人例施行仍出給券歷前逐項所差鞍馬人從等同一乞於本院差發遞工匠二人裝界作二人畫匠一人殿前馬步軍司差承局二十人皇城司差背印親事官二人已上並許踏逐抽差 五月十七日詔崇信軍節度使安丙可特授保寧軍節度使四川宣撫使兼知興元府利州東路安撫使

依前開封儀同三司武威郡開國公加食邑五百戶食
寔封三百戶 八月十一日詔四川宣撫使依舊利州
置司令安丙往來興元府等處措置事

宋會要

總領所

先是嘗命朝臣總領都督府宣撫司財賦其後收諸帥之兵以為御前軍屯駐諸處皆置總領亦以朝臣為之

仍帶專一報發御前軍馬文字蓋又使之與聞軍政不
獨職餽而已其序位在轉運副使之上鎮江諸軍錢糧
淮東總領掌之建康池州諸軍錢糧淮西總領掌之鄂
州荊南江州諸軍錢糧湖廣總領掌之興元興州金州
諸軍錢糧四川總領掌之其官屬有幹辦公事準備差
遣四川又有主淮東淮西有分差糧料院審計司審計
判權貨務都茶場御前封樁甲仗庫大軍倉庫庫瞻軍酒庫
市易抵當庫惠民藥局湖廣有給納場屬官分差糧院
審計院御前封樁甲仗庫大軍倉大軍庫瞻軍酒庫四川
有分差糧料院審計院屬官大軍倉大軍庫撥發船
運官贖藥庫羅買場吏額淮東九人淮西湖廣十人四

川二十人 高宗紹興三年正月八日詔差戶部侍郎

姚舜明前往建康府專一總領應干都督府錢物糧斛
仍於都督府選差有風力諳曉錢穀屬官四員充糧院
審計司監官都督府管下官兵等幫勘請給等並經由
戶部糧審院依條批勘支給建康府推貨務都茶場亦
仰姚舜明提領 七月二十六日詔都督府已有戶部
侍郎姚舜明總領應副錢糧其隨軍運判可省罷 六
年二月二十一日都督諸路軍馬張浚言三宣撫司軍
屯駐江淮所用錢糧雖各有立定取撥窠名及專委漕
臣應辦多是互相占吝不肯公共移那因致闕乏既無
一總領官司諸處財賦出納難以稽考乞於戶部長貳

內輪那一員前來鎮江府置司專一總領措置移運應
辦詔差戶部侍郎劉寧止 九月二十三日詔令戶部
郎官霍蟲前去鄂州置司專一總領岳飛軍錢糧 七
年十月十七日詔薛弼霍蟲同共總領措置五路應干
財賦仍常留一員在鄂州本司拘催本軍合得錢糧應
副支用以中書門下省言霍蟲總領岳飛軍錢糧二廣
荆湖江西五路錢物浩瀚恐有^失陷留滯合差官措置拘
催故有是命十一年正月十四日淮南西路宣撫使張
浚言總領提舉大軍錢糧吳彥璋措置應辦本司大軍
錢糧首尾二年並無闕誤欲依張成憲昨來應副韓世
忠錢糧例推恩詔吳彥璋與轉一官 五月四日詔以

胡紡為司農少卿總領淮東軍馬錢糧吳彥璋為太府少卿總領淮西江東軍馬錢糧曾慥為太府卿總領湖廣江西京西路財賦湖北京西軍馬錢糧各專一報發御前軍馬文字諸軍不聽節制 十二年六月十二日詔鎮江府鄧州總領所各置甲仗庫逐軍所造軍器每月委總領官置籍椿管月具所交收數聞奏仍各許辟差管甲仗庫官一員 十三年九月二十一日詔總領淮西江東軍馬錢糧所屬官今後許戶部長貳太府司農卿少通行薦舉 十五年十月二十八日侍御史汪勃言四川都轉運司盡併于宣撫司乞就四川路宣撫司置總領一司專掌財賦從之 十一月二十日詔以

趙不棄為太府少卿總領四川宣撫司錢糧所為名

總領四川宣撫司錢糧

十六年六月二十八日詔四川所屯大軍歲用錢物如
州軍拖欠即從所隸漕司按劾若漕司蓋庇失於檢察
催發即從四川總領所按劾其四路提刑常平司如拖
欠違期不起亦一體施行 十二月十一日詔曰朕惟
軍興以來四川歛重恐不堪久今疆場罷警營屯內遷
無轉餉之費輜重就閑羨卒耕作有芻粟之積仰宣撫
總領兩司取索永平時常賦名色軍興後權所增益參
酌措置既不當竭民力又不可乏軍須兩皆給足永相
保持以副朕顧倚之意 十七年九月十二日總領四
四川錢糧符行中言交撥到降賜等三庫見檣斛斗九

十八萬七千餘石詔令總領所酌度均撥減免對糴分
數施行 十八年五月二十七日詔以汪嗣為太府
少卿總領四川財賦軍馬錢糧專一報發御前軍馬文
字先以總領四川宣撫司錢糧為名至是罷宣撫司始
改為四川總領 十九年二月十四日詔諸路軍馬錢
糧官樂禁並依轉運使副提舉官從臣僚請也 二十
六年正月十四日詔諸軍不得私役軍兵其城郭開張
酒店令戶部總領司拘收 閏十月十八日四川總領
湯允恭言乞令四川知通簽判推判官同共依限催發
州縣贍軍錢物任滿或非次替移有拖欠數多許從本
所同所委官或就按劾從之 十二月十八日起居郎

趙達言陛下加惠遠民以四川在萬里外科斂條目戶部稽考之所不及故詔帥臣蕭振等同共措置欲以實惠摩拊疲弱亦事有所當知者蜀之取民條目繁巧不可一概而視按籍而決蓋有顯其名而公取之者激賞絹之類是也隱其名而陰取之者激犒錢之類是也取之以甲而用之以乙者畸零絹估錢為糴本錢之類是也此三者若一槩而視萬一蠲放所及民有熟視而不知徒為貪吏猾胥之幸者矣欲望明詔振等凡總領司錢物窠名當先析為數條曰此官與民通知者此官與民不通知者必當根其所歸有欲除放不於其官籍之名而於其人戶之所從來然後陛下實惠州縣不能

沮格從之 二十七年七月二十四日總領淮西江東
軍馬錢糧方師尹言比年州縣循習不以軍餉為念錢
物樁發有累月西方起者糧斛轉漕有經歲而始至者
監司生視略不經意乞擇監司郡守尤違慢者按劾以
聞重賜熱責從之 八月九日詔今後總領司互舉改
官之人並依憲漕等司舉官磨勘從左司諫凌哲請也
二十九年八月三日總領四川財賦軍馬錢糧許尹
言四川見屯大軍用度至廣年額合起贍軍其間公然
拖欠不催漕司州郡容庇不加程督即目未起錢引計
七百二十餘萬道已行下分限催促外欲乞候歲終從
本所取逐路州縣拖欠數目尤甚者具申朝廷重行點

責從之

十六日戶部言湖廣總領所將荆南戍兵倉

庫作一處安置別立庫放置監官一員從朝廷差官監
門官一員令本所於本府見任指使選差兼監從之

十七日總領湖北京西軍馬錢糧彭合言贍軍之費宜
有餘寄樁之數宜風備科撥錢糧各有名色其數未嘗
無餘寄樁有庫以待缺乏軍須未嘗無備歷時之久科
撥之數諸路不及元額而又買發銀價最高支用折閱
則歲計不足不免暗借寄樁以紓目前之急累年如此
則風備之數虧矣伏望審究諸路起發赴軍前不敷并
買銀折閱之數就日科撥應副翌日上諭宰執曰彭合
所陳卿等適進呈更支樁積銀五十萬貫此乃一時之

事彭合陳請却是歲計若止論目前而不及歲計恐於
久遠非便宜速與措置尋詔每歲截撥四川合赴行在
經總制無額錢三十萬貫貼助本所支遣及於樁管御
前激賞庫銀內計價支撥五十萬貫赴本所樁管戶部
看詳鄂州大軍近年有不敷額錢朝廷分上下半年貼
降錢一百一十六萬餘貫應副其不敷錢數增多乃逐
路監司州軍違悞欲下總領官嚴緊拘催須管及額仍
將違欠最多去處按劾其買銀折閱之下二廣監司帥
臣相度措置如何可以不致拆閱及可與不可以其他
物貨買發限一月開具利便申尚書省從之三十年
三月一日總領淮西江東軍馬錢糧都繫言江東所屯

歲費緡錢近七百萬米以石計者近七十萬科撥雖有
名期限雖有日官吏侵兌稽違監司守貳恬不加意乞
將監司守貳以下弛慢尤甚者按劾重賜黜責其承行
人吏即依無心力斷罷事理稍重者亦依條施行從之
八月十一日戶部言江州駐劄御前諸軍合用錢糧
已令取撥江西合發赴本所三十年分椿管折帛錢二
十萬貫江州椿管上供米三萬石應副續又科撥廣東
湖南江西每年合起赴行在經總制錢三十萬貫并於
江州轉般倉椿管江西二十七年上供米內取撥三萬
石與科見在大軍錢物相兼應副去訖更令於利州路
合起發赴行在經總制錢內自紹興三十年夏季為始

每年取撥一十萬貫并下行在推貨務都茶場給降江西路末茶長短引共二十萬貫撥赴江州應副客人請買同前項已科錢通共八十萬貫令本所置籍排日拘催起赴軍前應辦給遣從之 十二日湖廣總領所言江州屯駐軍馬合用錢糧依荆南差官應副創置倉庫合差監官一員乞從朝廷注授監門官一員乞從本所於江州見任指使內選差所置倉庫糧審院印記乞下文思院鑄造給降從之 十六日湖廣總領所言節次降到臨安府一合同關子共三十萬貫餘已賣到錢一萬九千貫外其餘並無客人請罪却有降到三合同關子八十萬貫令本所賣錢椿管比之一合同頗為快便

乞許本所於三合同關子內已賣到銀錢對換一十八萬一千貫應副支用乞繳還一合同關子却行換給支末茶長短引共二十八萬一千貫應副支遣將賣到錢撥還所借支過三合同關子錢仍舊却揆八十萬貫依已降指揮椿管從之 三十一年正月十八日詔准東總領司太平惠民藥局監官兼監鎮江府大軍倉如遇本倉給納即令前去管幹以總領朱夏卿言大軍倉獨員而藥局職事簡省故也 四月十七日四川總領王之望言乞將諸州軍年額合起錢物自正月一日至十二月終實起到庫錢數比較從上起發歲額無虧欠又從下取虧欠最多處各一十處具知通姓名申尚書省

候逐官任滿改授差遣日乞朝廷參照勤墮斟酌施行
三十二年四月十八日之望言四川諸州軍三十一
年終實到庫錢比祖額遞年並各增羨即無虧欠最多
去處今取增數最多一十州具知通姓名申聞乞籍記
姓名以待選擢從之 四月二十七日詔諸路大軍每
遇招收到人並先具姓名報總領所每旬委總領官及
都統制就本所或教場同共當官填刺軍號其効用等
不刺手面之人亦令對衆審問投名月日詣實應干合
得依糧之類一面從總領所畫自當日並與按旬月日
兩季徑行幫勘支給具數申省部照會出豁科降 孝
宗隆興元年十月六日詔戶部於左藏西庫見椿管錢

內支降一百萬貫依省則紐折銀二十萬兩餘數以會
子貼支前去淮西總領所交割樁管 十四日詔戶部
下左藏西庫於度牒膏田錢內支會子二十萬貫前去
淮東總領所交納貼助大軍支使 乾道元年三月五
日戶部言淮西總領楊佺奏契堪淮西總領所惠民局
及雜賣場止是出賣藥物事務不多乞將雜賣場併令
惠民局官兼管本部勘當欲依所乞合以監總領淮西
江東軍馬錢糧所太平惠民局兼監行宮雜賣場稱呼
所有減罷去處其已差下人並依省罷法施行從之
同日戶部言楊佺奏本所大軍庫事務繁冗未有監官
本所甲仗庫職事簡省乞改差監大軍庫官一員却令

黃管甲仗庫本部勘當欲依所乞合以監總領淮西江
東軍馬錢糧所建康府戶部大軍庫兼監封樁庫御前
甲仗庫稱呼從之 六月二十六日戶部侍郎王弗言
欲乞誠飭逐路總領官今後非被旨不得擅截綱運如
違許從戶部具名按劾聞奏從之 八月二十五日中
書門下省言勘會淮東總領所係是拘催江東浙西州
郡錢米雖有指揮許按發遲慢官吏及浙西官亦許薦
舉緣官稱未正事權不專乞依鄂州總領官例於街內
添浙西江東財賦六字將合舉官員數於二路通舉餘
並依舊從之 十月十三日戶部員外郎江西京西湖
北總領司馬倬言近承指揮令取撥四川白契稅錢一

百五十萬貫。起本所椿管緣四川係行使鐵錢地分計置輕齋赴鄂州軍前止得七十五萬貫。深恐緩急不足支用。今欲乞於內更行取撥五十萬貫補助三大軍歲計支用從之。十五日戶部尚書員外郎江西京西湖北總領司馬倬言契勘本所應副江鄂荆襄大軍務事繁多。已檢照元降指揮特賜添置詔許復置幹辦公事。准備差遣各一員。二年二月四日樞密院言已降指揮三衙招收軍兵効用。本軍申解樞密院令承旨司用等。伏審驗人材刺填軍額在外屯駐軍委本路總領官依此。其在外諸軍並不解赴總領所止行關報姓名。審驗預作到軍月日放行請給。無以關防詔總領所照。

應三衙招効用軍兵拍試格法指揮一體施行 二十

八日淮西江東總領楊俊等言乞將江東安撫司建康

府都統司酒庫並撥付淮西總領使所得旨令共相度

欲將諸司酒庫先次交割見管酒麴錢米麥麩本柄并

應千動使等其煮酒賣到價錢除元本錢並行拘收應

副作本外將合得息錢並行撥還諸司從之 六月十

五日四川宣撫使虞允文言契勘四川宣撫自鄭剛中

以前未置總領所今照得前來往川陝宣諭并任荆襄

宣諭使汪澈已畫降指揮總領所隨事所隸今來乞依

上件已得指揮從之 閏七月四日中書門下省言勘

會已降指揮差度支郎中唐瑑前去湖廣總領所取索

應干收支科降及諸路已未起發錢物逐一究見詣實
所有淮東西總領所亦合一體委官前去詔差考功郎
官沈夏九日尚書度支郎中唐瑑言究實湖廣總領
所財賦緣積歲不曾檢察本所恣縱弊源甚多欲望特
降睿旨今後每三年一次差官稽考庶有畏忌兼歲月
不久姦弊易見從之十二日詔戶部將江鄂州荆南
三處軍馬歲用支遣實數併作一科降付總領所委本
所自行審度各從便順分撥二十四日中書門下省
言勘會湖廣淮東西總領所應干收支科降及諸路已
未起發錢物各已委官前去取索逐一究見詣實所有
四川總領所亦合一體詔令虞允文措置施行從之

八月十七日度支郎中唐瑑言湖廣總領所自來差撥戶部人吏每有會問並是本處人供報本部人即供報不行又緣替移頻併亦隨官罷所以不知首尾欲乞並令發回只令總領官於州郡監司吏人踏逐選差三年一替其淮東西總領所并分差糧審院並依此從之三年十一月二十三日詔令湖廣總領所印造新會子通已未印造共三百七十萬貫將銅版依已降指揮繳申尚書省其舊會子逐旋繳納 十二月二十六日戶部郎中四川總領查篇言金州屯駐官兵歲計幫支錢糧數目浩瀚緣相去遙遠本所屬官元差置主管文字幹辦公事各二員準備差遣差使各一員昨準指揮裁

減主管文字一員準備差遣差使各一員今欲於元裁
減屬官三員內復置一員差往金州幹當僉廳職事從
之 四年正月九日禮部言新除戶部郎官四川總領
查籛奏臣契勘本司贍軍歲計自紹興三十一年軍興
後增招兵馬溢額數多用度日廣別無科降止是侵那
庫管椿積逐急應副今亦殆盡近準朝廷立定兵額按
月所添請受並無指準又有因功轉官添加請給今年
又係有閏年分闕數甚多無川路諸州內有旱傷米價
踴貴比去年尤為闕乏欲望照累政總領官體例給降
度牒五千道出賣拘收價錢庶幾補助歲計支用詔降
度牒一千道紫衣師號共五百道 二月三日新降戶

部郎官四川總領查齋言近奉指揮四川總領所應干

收支科降錢物令虞允文集四路漕臣各一員同臣就

宣撫司會算四川見今財賦所入之數對立養兵多寡

之額使兵食民賦出入相當庶幾軍用贍足免以匱乏

頻瀆天聽實為久遠之計詔從之二十九日刑部言

新除司農少卿淮東總領呂權奏逐路州軍應有總領

所錢未去處欲乞量立殿最之法許從本所檢察按治

本部看詳欲令諸路總領所於歲終將所管州軍每州

合發本所錢物十分為率若拖欠及二分知通各展二

年磨勘或欠數太多取旨知了辦數足各與減二年磨

勘從之十一月十七日詔三總領合支官兵春冬衣

戶部措置今後並須管依行在官兵條限時日支給不得依前遲延過時 五年三月六日淮西江東總領葉衡亦準指揮差屬官前去廬州應副郭振修城官兵錢糧照得雖有幹辦公事二員內分一員專在池州軍前給納簽廳委是闕官深慮悞事故乞依鄂州例更置幹辦公事準備差遣各一員詔許辟差準備差遣一員日後更不作闕 八月五日淮東總領呂權言契勘本所屬官已經裁減止有幹辦公事一員淮西總領所已置幹辦公事二員近又申明辟差準備差遣一員本司委是闕官乞依淮西例置準備差遣一員從之 十一月三日戶部言淮東西總領所奏本所人吏舊請於大軍

內勘支立年限與補進義副尉本部照得批勘合於大
軍錢內應副更不添支食錢其出職年限欲自差到所
充應十年頭名職級補授進義副尉其遞遷以次人各
充應二年通到所及十年依今來出職年限補授下淮
東西總領所照會湖廣總領所亦依此施行從之 六
年四月一日詔淮東總領所併歸淮西總領所令沈夏
通領存留屬官一員鑄錢司可減罷併歸發運司存留
幹辦公事二員亦發歸運司 閏五月五日中書門下
省言勘會淮東總領所廢併司名合行并入詔以總領
兩淮浙西江東財賦軍馬錢糧所為名 十七日戶部
言總領兩淮浙西江東財賦軍馬錢糧所為名合用印

記今欲以總領兩淮軍馬錢糧所印十字為文將兩所
元印繳納庶幾歸一從之 六月十七日戶部准西總
領沈復奏淮東總領所事務至繁正要稽考出入及檢
察糧審院批放緣淮西相去隔遠難以革弊兼照得淮
東簽廳從來不曾與務場倉庫干涉今欲依倣池州例
委自屬官管幹給納本部勘當欲依所乞以戶部給納
所為名并令總領官往來提督施行從之 七年五月
四日權知鎮江府兼權淮東總領蔡洗言承指揮復置
淮東總領乞依舊作浙西江東財賦淮東總領錢糧所
為名戶部給納所却行廢罷所有應干合行事件欲乞
並依前後總領所官已得指揮施行本所元管印記近

緣省併別降兩淮總領所印記今既復置所有淮東總領所元印乞依舊行使從之 八月二十五日吏部言總領四川財賦軍馬錢糧所奏本所復置主管文字一員專一主管金州本所簽廳職事乞依金州州縣官任滿與轉一官推賞本部契勘荆湖路安撫轉運司屬官到任任滿應得酬賞者依條各隨置司所在州縣官格法推賞本部欲依所乞將本所在金州置司簽廳官一員依金州州縣官到任任滿已得指揮推賞施行從之 九月二十四日又奏契勘本所屬官依發運司例自與他州不同止有四員皆係選人資望太輕難於號令欲望將本所屬官盡差京朝官許理本等資序其見任

者令終滿今任已差選人替官者各乞別與差遣詔依
餘路總領所屬官今後並差京官 十月二十四日詔
令建康府於朝廷椿管會子內借撥五十萬貫應副淮
西總領所支遣却於元科馬軍司未到綱錢內拘收撥
還依舊椿管仍開具起發綱運最稽遲數多去處當職
官姓名申三省樞密院 八年四月十六日權尚書戶
部侍郎沈復言今後遇總領所官赴行在奏行淮東委
守臣兼權淮西湖廣委漕臣兼權從之 淳熙元年三
月十七日詔淮東總領所差置催綱使臣三員於小使
臣內選差專一往來催促大軍錢糧使喚仍理為資任
支破本等券錢既而六年三月淮西援例差置從之

四月十七日淮東總領許子中言乞委諸路通判專一
主管拘收逐州錢米起發赴所旬具數目關報本所每
丰年比較以行賞罰從之 二年十月二十五日淮東
總領錢糧臣言乞依淮西總領收赴茶鹽等鈔及額推
賞從之 先是元年三月詔自今建康場務歲終收赴
茶鹽等錢及額其淮西總領自任內歲終與比附左右
司官計日減半推賞糧臣援以為請 三年二月十七
日詔兩淮總領所將收支錢物除依條合置庫分并正
赤厯外其餘私厯并創置庫名並行改正如將來朝廷
差官點檢得更有違戾當重作施行 四年七月二十
四日淮東總領所言鎮江務場歲額收赴茶鹽等錢增

羨官吏推賞並不曾經由本所徑自供申朝廷致有權
行抵當拘催未到錢數至多乞自淳熙四年鎮江務場
官吏推賞先從本所審實方許施行從之 六年三月

二十四日淮西總領蓋經言諸州常平買樸酒坊往往
侵損官課乞從本所日下發併自行措置興開依數認
還常平元額從之 四月二十一日四川總領所言近

準樞密院劄子以制置司申請威茂州每年量立省計
為錢引一萬四千道數內成都轉運司管認五千道餘
九千道合從總領所添貼支撥契勘本所歲計係專用
應副四川屯駐御前大軍支遣即無科支諸州係省錢
物窠名體例其省計錢物自來隸屬逐路轉運司科撥

詔本路轉運司照應今年三月十九日已降漕臣手詔
將有餘去處通融應副 十年六月二十六日准西總
領韓彥質言本所五酒庫近蒙許辟差官今乞先令權
半年見得實有心力正行奏辟通理為任又乞差使臣
五員糴買米麥從之 四川 淳熙二年正月十五日
詔四川總領所自今將腐爛米斛別行變賣不得支充
軍糧并零碎折支 三年正月七日四川總領所言金
州屯駐官兵歲支錢引六萬一千餘道係本所與宣撫
司分認應副今既罷宣撫司置制置使司其本司元認
金州一半錢引合令制置使司從之 四年正月二十
五日詔四川總領所將諸處椿積米常以新易陳乞免

換支遣不得以兌換為名輒有侵借如日前有借撥之數即疾速補還 六年二月三日詔自今四川總領所茶馬司遇歲終各將本年經常及椿管錢物收支見在於次年正月開具作冊繳申尚書省 十月十六日四川總領李昌圖言乞自今或有陳請事干本所財計先下本州相度裁其可否然後施行從之 八年五月一日詔罷興元金州兩處簽廳其總領所簽廳職事依江陵府例委各州通判兼管以臣僚言四川總領自來置司利州去大軍屯駐所在相遠昨緣軍興恐關外四州待報過遲遂於魚關置一簽廳以便四州期會差本所幹辦公事主之後來為領^總領者不知當來所置簽廳之意

只因糴買一事乃於興元金州復置兩簽廳所差官妄作威福故也 十四年三月六日四川總領趙彥逾言諸州椿積錢糧乞令各路運使每季點檢王淮等奏先降指揮總領不與椿積米斛本為淮東西湖廣三處即不曾劄下四川上曰蜀中糧斛總領自當干預彥逾既有請可分明劄下照會 雜錄 淳熙四年二月八日詔三總領所出納錢物並明附正厯不得再有侵借隱占其州軍綱運以時嚴緊催督毋容拖欠如復減裂重行責罰先是總領所文帳多有侵借隱漏遣官點磨既條上其數於是中書門下省言除賒欠占壓虛椿之數別行契勘外餘見管并別庫寄收興州軍拖欠錢物共

一千五百八十餘萬內三百餘萬係無侵借及不曾附
帳歷錢已改撥樁管外歷見在錢四百八十餘萬貫
存留總所認數樁收以備急關仍令拘催州軍淳熙元
年至三年未起綱運七百九十餘萬貫與建康鎮江場
務月收窠名并淳熙四年所科歲計應副支遣已有寬
餘其私置庫歷悉行改正日後收支各立式行下每歲
開具申奏以防滲漏因有是詔 十月二日詔總領係
與發運監司序官職任尤重自今在任一年已上者亦
許除郎 五年五月十一日詔准東西總領所錢物由
所例從廢罷鈔引入納還不及常平之數准東總領葉
翥嘗以為言至是戶部侍郎單夔復請依舊於市回易

庫發泄鈔引故有是命

七年七月二十四日

左司

郎中杜民表言乞住罷諸路總領漕司營運上曰朕欲罷此久矣內外諸軍添給系重之人每歲共不過三十餘萬緡別作措置支給於是詔兩淮湖廣四川總領所兩浙四川轉運司營運並日下住罷即逐司將截日終見管本息錢物實數逐一開具申尚書省其諸家累重^平大官兵合添支錢已一面別作措置支給既而八月詔兩浙本錢已拘收外餘各限指揮到日先將本錢盡數發赴元來去處依舊窠名樁管其收到息錢依已降指揮疾速開具申尚書省

十六年十一月二十三日戶部言湖廣總領所申除湖南創置飛虎軍係別降錢物

應副外有江鄂州江陵府屯駐及襄陽府出成共四大軍并差出德安府隨郢州信陽軍光黃沅靖州常德府及大冶麻城縣等處軍馬合用淳熙十七年分歲計錢物乞科降本部準淳熙九年十月二十一日指揮科降每月以五十八萬九千四百三十餘貫為約一歲計錢七百七萬三千二百貫九十四文今科撥下項京西襄鄆等處見屯軍馬合用鐵錢令轉運司於舒蘄州見橋管并續鑄到鐵錢內各取撥七萬五千貫赴湖廣總領所交納所有諸路州軍綱運錢科撥五百七萬二千六百八十二貫一百四十七文數內有四川提刑司催發錢二十五萬二千四百三十貫近緣免起三年乞下舒

新州於今年分鑄到正剩鐵錢內各取撥一十二萬五千貫赴本所補還朝廷錢貼降二百萬五百一十七貫九百四十七文數內貼降四川總領所拘椿綱運錢并貼降江西茶短引各一十五萬貫拘截四川合起行在窠名綱運錢三十萬貫朝廷應副四川免起三年錢六十萬貫京西提舉司見椿鈔鹽錢內取撥三十萬貫就發鄂州椿管去年改換江西茶長引二十萬貫權貨務都茶場於見在散乳香內品搭給降二十萬貫就撥鄂州軍前大軍庫賣引司椿管茶引錢二十七萬五千貫其餘一百二萬五千五百一十七貫九百四十七文乞行下都茶場品搭印降江西湖南北茶長短引應副給

遣從之

十二月十九日臣條言應外路諸司總領所

今於得替日將應有錢物開申省部其新到任人亦限一月內將交到數目從實具申從之 紹熙二年三月

二十五日知靖州姚槩言乞將廣西運司今年未支本

州歲計錢二萬貫及紹熙三年分歲計三萬貫仍舊行

下湖廣總領所照元例於茶引錢內支撥却令本司於

每年應副湖廣總領所錢內一併起發交納以後年分

歲計只乞就本所支降詔湖廣總領所依靖州所乞事

理施行所有廣西轉運司每歲合應副靖州錢仰本司

起發赴總領所交納理充歲計錢數 三年七月十二

日准西總領所申乾道四年准東總領所錢米去處量

立殿最之法本所檢察按治刑部大理寺看詳欲令諸路總領所於歲終將所管州軍每月合發本所錢物十分為率共拖欠二分知通各展二年磨勘或欠數太多重作施行如了辦數足各與減二年磨勘已得旨依淮東至今遵奉每年各有賞罰獨本所因循弛慢今欲至歲終檢舉施行從之 八月九日詔淮東西湖廣總領所各將截日終見樁管金銀錢會等數目仍取見諸州軍得熟分數逐一從實開具申尚書省 紹熙五年十二月三日太府卿淮東總領葉適言去冬內藏庫取去淮東總領所五十萬貫軍民相語往^往缺望萬一更有支取民力之所以窮竭州縣之所以敗壞者正為兵數太

廣兵食太費爾乞明詔有司自今除每歲批放外並將有管實在數目逐一開具該載式冊要使朝廷通知有餘不足之數其非緣軍前事無得輒稱支移起發欲以他用雖有中旨許執奏不行俟儲積果多成大簡覈朝廷經制既立然後議窠名之重輕省撥定之數目寬減州縣還以予民從之 九日准西總領鄭湜奏總領之職在於調度糧餉稽察軍政而已乾道八年總領周閱欲興酒利始奏乞撥諸司酒課併歸總所管赴御前并朝廷淨息錢三十萬貫通年又抱認淨息錢二十五萬貫又增認建康府稅錢一萬貫通管赴到淨息錢五十萬貫自撥併之初朝廷約束方新諸司不肯過數造

酒亦不敢私自酤賣數十年來諸司私造之酒月增歲
盛始者舉在城之酒利惟歸一總所故所虧課額不為
甚多後來裂為四五各私其利酒課既已暗分每年膏
虧淨息二十餘萬往往皆侵移經常錢兌發及別作營
運補掩見今已侵過經常錢四十四萬餘貫拖欠朝廷
椿管錢八十三萬餘貫若不以利害分明控告向後轉
見狼狽乞矜念總所之職本為給糧餉察軍政許將見
在本錢給還諸司自行酤賣詔令總領所依舊酤賣每
歲除合納內庫錢照數解發外所起朝廷椿管錢全與
減免諸司息錢權減四分之一仍自來年為始 慶元
元年正月五日中書門下省言淳熙二年十月指揮鎮

江務場歲終收赴茶鹽錢及額准東總領官與比附左
右司官計日減半推賞又淳熙四年七月指揮鎮江務
場每歲陳乞收赴茶鹽等錢增羨官吏推賞從准東總
領所審實一歲收赴到錢比額增羨其所賣鈔引等錢
委是已拘收錢物數足本所即具保明供申推賞照得
准東總領既依准西總領推賞其務場收赴課額自合
提領赴辦詔准東總領所事體提領措置施行嘉泰
二年十月田一日新准西總領王補之奏總領所歲計
係朝廷科撥州軍上供錢斛應副支遣使郡守盡數拘
椿如期解發不至有悞指準竊見潛憲常平茶鹽坑冶
司皆以各州通判為主管官蓋權有所歸究心督促俾

廳非州郡比無供輸之煩免支費之擾斷不敢移易借
免乞令總領所將諸郡合解本所錢斛委本州通判充
主管官專一拘轄催促應限起發須管本年之內數足
本所逐季稽考其間宣勤職守取一二申奏旌賞如或
弛慢不職欠負最多按劾責降所有諸州起發錢斛每
歲令本所於次年三月終比較不許展限具發足實欠
數最名銜以聞乞行賞罰從之 閏十二月二十一日
准東總領所奏照得淮西總領司近畫降指揮專委諸
郡通判充主管官拘轄合發錢米催督起解所是淮東
財計理合一體乞令本所將諸州合發錢糧專委逐處
通判一員置籍拘催主管催發一依淮西總司已得指

揮施行從之。開禧元年十一月三十日臣僚言恭惟
高宗皇帝以諸道財賦分置四總領所而又以王人領
之其為慮深矣比年以來賦入虧於前後之相因事權
弛於勸懲之不及假如一州財賦隸於總所者以十萬
計今歲偶因水旱而虧其一若未甚害奈已虧者不復
增來歲遂以九萬為率矣使歲及九萬猶云可也今歲
虧一歲後來者復援虧多之歲以為率矣故曰財入虧
於前後之相因且憲漕諸司之勢必行於郡縣者以刑
獄之冤濫訟牒之稽違財賦之欺隱諸司皆得以察之
下至當職官之去留承行吏之罷復諸司皆得以專之
至諸司耳目之所不接又巡按得以及之故郡縣於諸

司財賦類不敢虧惟總所則異是兼置司之地去所部或千餘里間有及二三千之遠者勢有所不接令有所不行歲終必比較展減磨勘不過三二年其間又有貢緣幸免者而懲勸之術窮矣故曰事權弛於勸懲之不及夫前後之弊非可以驟革勸懲之法亦未易驟加乞於郡守離任之日各令具本任內合解總所財賦有無虧欠如虧者即詰其由重加責罰至若在任尤弛慢者亦許總所按奏如此則諸郡知畏而財賦必不致有虧緩急必不致誤事從之

嘉定三年十一月九日臣僚言四川總領所與東南三總領所事體不同參政王之望總蜀賦目蓋嘗論列以為東南將帥統軍旅戶部

總財賦朝廷制其予奪盈虛之柄所以東南總領責任稍輕又朝廷在近凡事有所倚重今四川去朝廷路遙又總所不與兵事凡有調度之費據其所需應副若非朝廷主張假借使之有以自立則緩急難與財賦作主此說最為明白至開禧用兵之初宣撫使程松以私意懇囑權臣遂令四川總領所照江淮湖廣體例並聽宣宣司節制自是本所財賦兩宣司動輒干與且不時取撥金帛逆議包藏禍心用度無藝自安丙誅叛之後繼為宣撫使雖仍指揮之舊其實總所全賴左右扶持以至今日但軍政財賦既有攸司所當各專任責今宣司結局改置制置大司當覈實軍政搏節錢糧以寬總所

餽運總所當幹旋儲蓄極力措置以應軍須不應復累
大司所有權臣一時元降節制指揮合行釐正其制司
與總所往來文移既是制置大使係執政大臣總所合
用公申如將來止是制置司卻合止用公牒庶幾名正
體順兩司叶和不致止誤國事從之 六年十月二十

八日臣僚言兩淮權貨務場自姦臣變法創置提轄一
員嘉定二年臣僚以其費用日廣而財計展轉不行奏
請省罷未踰半載朝廷仍舊差官方其增置固以貪吏
侵欺出納之無限也及其省罷則以官吏廩祿費用之
尤多也今此司再復非以課額之有虧乎嘗以兩司申
請利害考之鎮江一司提轄未再置時所管錢會猶足

以支數月今反空匱赤立不可支吾歲給降者不啻百萬建康一司每月認支之額既已省減而朝廷給降月猶不下十四五萬夫差官三四任更厯四五年課額不登給降如故而徒增二司官吏費用所謂廩長立而馬益癯也今若逐歲指降鈔引令總所自行發賣擇一幹官提其大綱萬一鈔引未甚流通雖不免陳請給降豈不有增置官吏廩給之費況供帳幕帟徒御使令欲與諸司並驅今又有增而無減乎乞將鎮江建康分司提轄職事並令總所交割管掌各令歸班別與差遣實經久之利從之 十一月十四日監察御史黃序言國家置四總領所以董軍餉半天下之賦入皆在焉又於建

康鎮江各有權務一司幹茶鹽之利以通商賈曩時科
降鈔引不為樽節客商入納利源繁夥軍額多闕支遣
贏餘總所得專其權朝廷無所稽考間有私自封殖利
已乾沒而罰徒具文此權務所以專置分司在前日行
之為宜也自分司之後逐歲鈔引指數科降務場發賣
登載文歷出入明白為轄官者不過謹出納之司而已
流通則椿管月廩闕乏則告急於朝雖有他巧無所施
之考之累政借撥朝廷錢物不知其幾總所坐享其逸
朝廷實任其勞無乃體統倒置者邪向者以積弊而釐
析之今以其無弊而復歸之名正辭順故復推務於總
所為便或者謂專置一司猶不足以供億而總所安得

力而給諸審如是則以王人委寄之隆而但曰催督綱
運云者無乃擇易而辭難乎夫鈔引即錢物也以變賣
而為支遣其數不易萬一入納稍遲支遣不敷則以總
所錢物通融之此猶朝三而暮四也鈔引在是則亦在是況科降
出納大數灼然逐時打筭毫髮無隱特不過使總所任
向來之責而朝廷不為分司之累爾推轄一司官吏皆
可省罷欲乞將鎮江建康兩處務場日下結局仍舊付
之總領庶幾事權歸一無所扞格從之 八年正月二
十五日吏部言准東湖廣總領所昨來係援引戶部例
差置催綱官徒費廩給合照戶部例一體住罷詳見戶部門
九年正月二十七日司農卿淮西總領胡槻奏本所幹

辦公事一員分司池州事權既專責任亦重池州一軍
歲蒙朝廷科降錢一百九萬餘貫全籍分司幹官拘催
緣累政皆係堂除選人資淺望輕州縣固已輕視又往
往多非其人到任即以文字為急職業多不留意只嘉
定八年一歲之間失催錢四十餘萬貫常是本所那撥
添湊支遣望將上件窠闕發下吏部照格法差已作縣
舍入資序人庶幾資望稍高必能辦職從之 十四年
二月八日總領四川財賦軍馬錢糧所奏利州大軍庫
係四川根本所在日逐收支錢物委是繁夥其監官兩
員從元申獲紹興十六年七月二十九日指揮許從本
所選擇保明奏辟近準朝廷差下新官杜璋本所已行

導奉外竊慮以後不經本所審量或有癯老疾病精力不逮之人徑行赴部注授廟堂無緣得知委礙本所出納乞將上件監官兩闕日後免行差注止從本所擇材奏辟從之 十五年正月二日朝奉郎守軍器監淮東總領岳珂奏本所自紹興間勅置淮東一路軍馬盡在鎮江府大軍倉官專一任出納之責近年邊備未撤王師宿淮就成軍兵糧米多移在淮南交受支遣昨來楊州大軍倉前政總領亦勅辟倉官一員已蒙朝廷從請今楚州比揚州事體尤重本所支遣鎮江月支二萬四千五百餘石揚州一萬一千六百餘石楚州一萬四千五百餘石委是一體不可闕官久例於楚州州官兼攝

各有本職不能專心管幹遂致綱運積壓不以時交委實利害今欲照揚州大軍倉體例初置監楚州大軍倉官一員專一管幹隸屬本所乞從朝廷選差一次或從本所奏辟庶幾官有定守軍儲可以給足詔從公選辟經任無過犯有舉主人一次仍以監淮東總領所楚州戶部大軍倉繫銜既而珂又奏本所置司鎮江相去動數百里不惟出納經常錢米交受綱運數目繁漸要任得人竊緣久例沿邊郡縣通判判官知縣兼受給曹官主簿兼倉庫指作兼職不復經意旁歷支遣率付吏手遞互推托不與交受正緣受給官不曾入銜因此視為不切竊照淮西總領所昨來陳乞通判主管官並帶淮

所參知政事史浩同提舉 隆興元年正月浩拜右僕射提舉仍舊 十二月六日吏部侍郎兼編類聖政所詳定官凌景夏起居郎兼編類聖政所詳定官周必大言奉旨編類光堯壽聖太上皇帝一朝聖政合要建炎元年五月十日以後至紹興三十二年六月十一日以前三省樞密院時政記起居注參照編類欲乞下日歷所并移文諫院後省依年分逐旋關借或鈔錄用畢封還并合要詔旨草藁參照已得指揮許差人於學士院就行鈔錄本所人吏乞下皇城司支給敕入宮門號二道兼本所檢討官除本處請給外其所添御厨第三等折食錢若於本處所請名色次數相妨者欲乞不理為

名色次數支破仍自供職日為始人吏請給昨來勅令
所舊請則例係依紹興祿格祿秩申明并紹興十三年
六月二十八日支米指揮支破施行仍自差到所日為
始從之 隆興元年三月十六日詔編類聖政所修纂
光堯壽聖太上皇帝聖政凡大號令大政事今日合遵
行者並編類門目每月投進其編年紀事候書成日一
併進呈以本所詳定官凌景夏等有等也 五月十九
日詔編類聖政所併歸日歷所依舊宰臣提領其檢討
官二員以館職兼仍令日歷所人吏先行遣同日編類
聖政所言接續修纂功勳臣僚忠臣義士事跡合行併
歸國史院敘實封用印牒送從之 十月四日詔編類

聖政所檢討官差祕書省校書郎王東里正字程千里
兼其聖政文字祕書監少同預編類 乾道二年閏九

月二十九日國史日歷所上光堯壽聖太上皇帝聖政

六十卷

進書儀注官吏推
恩詳見日歷所門

十月五日提舉編類聖政蔣

希言本所官吏欲限三日結局從之

其詳見
日歷所

淳熙十

六年三月二十一日國史日歷所言奉旨壽皇聖帝臨

御歲久典章法度繁若日星可令日歷所編類成書朕

當遵而行之仰稱付託之意本所今具下項本所編類

壽皇聖帝典章法度乞以至尊壽皇聖帝聖政為名欲

從日例就監修國史提舉以提舉編類聖政繫銜所修

聖政文字欲乞每月就監修國史過局日聚議供呈檢

討官二員以館職兼乞朝廷差置仍乞以兼國史日歷
所編修聖政檢討官繫銜即下干預修纂日歷本所官
祕書監少著作郎佐見修纂日歷乞依昨來修進先堯
壽聖太上皇帝聖政同預編類所修聖政係就用本所
應干國史文字照使昨來修進聖政係今日歷所人吏
兼行遣其取會文字并漏泄條禁並乞依本所前後已
得指揮施行仍乞就用日歷所記行使本所人吏更不
添置如遇文字冗併日依例顧工書寫及應干支用合
於公使錢內支破每月入厯批勘一百貫合用修書紙
劄朱紅物帛等欲乞從本所逐旋具呈監修國史下雜
買務收買並從之 閏五月一日詔知樞密院事兼參

知政事王簡提舉編類聖政 七月九日詔祕書省祕

書郎黃由校書郎王叔簡並兼國史日厯所編類聖政

檢討官 紹熙元年七月八日詔左丞相留正監修國

史提舉編類聖政 二年十月十三日詔太常博士章

穎兼國史日厯所編類聖政檢討官 三年十二月二

十三日國史日厯所上至尊壽皇聖帝聖政五十卷

二十五日國史日厯所編類聖政言至尊壽皇聖帝聖

政今已進呈安奉了畢所有本所諸色人將來推恩內

不願轉資合得折資錢并經修不經進使臣人吏等推

恩犒設錢二千貫文今來務從省減更不支降止候推

恩止候推恩指揮下日從本所具的確人數申明朝廷

行下戶部依例入厯批勘從之

宋會要 經略使

哲宗正史職官志云掌總護諸將統制軍旅察治姦宄以肅清一道凡兵民之政皆總焉係邊任則綏御夷狄撫寧疆圉若甲兵屯戍芻粟饋運則視其緩急盈虛而移用之掌凡戰守之事即事干機速邊防及士卒抵罪者聽以便宜裁斷其屬有勾當公事管勾機宜文字准備將領准備差使

宋會要 經略使

元豐元年五月八日照河路經略使張誥乞舉文資一員准備差遣點檢常平錢穀從之 十月十四日鄜延路經略使呂惠卿乞以本司回易庫撫養士卒等本錢別置庫不得雜公使錢從經略司變易止克撫養士卒及賞覲事人如小事止支係省錢諸路並乞依此從之 三年正月十三日龍圖閣直學士韓縝以分畫河東地界文字來上詔錄付河東經略司令帥臣親掌 六月二十四日詔就近經略使所在封樁委茶場司管勾如封樁錢物法自今有羨錢准此歲終輒具數以聞 四年七月三日詔鄜延環慶涇原路經略司各支封樁

錢十萬緡招納蕃部

九月十七日知延州沈括言西

賊聚兵各在本路對境慮大兵既入境賊乘虛寇襲即

乞令監司或以次官權州事臣以經略都總管司職事

領在城兵往照應從之

十二月三日李憲言准勅差

權涇原路經略使其熙河路都大經制并節制秦鳳路

軍馬合與不合依舊兼領陝西諸路經略轉運司合應

副本路兵馬軍須糧草其經略使監司乞許臣彈劾以

次當職官乞許臣一面遣官劾罪陝西河東見任文武

官乞許臣不拘常制選委應副雖有違礙並即發遣如

敢占留並科違制乞差近上禁軍一指揮為牙隊詔熙

河經制並節制秦鳳路依舊兼領所乞牙隊差神衛餘

並依奏 二十二日熙河路都大經制司乞差蘭州官
詔以四方館使熙河路副總管兼知河州李浩知蘭州
侯修會州半差克蘭會路經略安撫副使 五年正月
二十六日客省副使知誠州謝麟言乞增割戶口山川
并降屬縣名額詔以麟知沅州主管沅誠州沿邊安撫
公事置兵馬監押職官司戶參軍各一員並令謝麟舉
官一次誠州官任滿依沅州酬獎二十九日詔進士鍾
傳為蘭州軍事推官涇原路安撫制置司主管機宜文
字以李憲奏充効用又言其從軍有功也 二月四日
文思使文州刺史內侍押班李舜舉為照管涇原路經
略司一行軍馬兼參議軍中大事 六年八月二十一

日詔賜環慶路經略司度僧牒千為錢十三萬緡別封
椿七年十月九日詔內藏庫支紬絹各五十萬足於
熙渭州經略司封椿哲宗元祐元年十一月五日權
發遣秦州兼管勾秦鳳經略安撫都管司范育言知州
係帥臣將下公事乞不許通判同管役之是歲詔陝
西河東經略安撫都總管司自元豐四年後應緣軍興
添置官屬並罷又詔罷經略安撫司管勾官二年六
月二十二日詔目今沿邊臣僚奏請創置更易事並先
付本路經略安撫司詳度利害以聞

宋會要 經略使

淳熙六年四月四日廣西經略安撫劉焞言本路賓邕
昭象等州見有劫盜公事一十五大未曾結斷自來候
提刑司請覆取會或奏聽敕裁動淹歲月今來湖南宜
章賊徒陳峒等竊發與本路抵接本路州縣單弱久有
募囚越獄之風或兇徒越逸檢准乾道重修敕諸軍
干邊防或機速機宜事干機會理須從權速請不可淹
留待報餘條機速准此并請軍犯罪事理重害難依常
法而不可待奏報者許申本路經畧安撫司酌情斷遣
訖以聞罪不至死者不許特處死餘犯情重自依奏裁
法乞許經略司索取各州勘到情款將迹狀顯著賊證

卷一第 三千三百十一

明白之人一面約法依上件勅條酌情斷遣候事定日
依舊從之

宋會要

安撫使

安撫使諸路災傷或邊境用師皆特遣使安撫事已則罷其河北河東別置司長任景德三年置河北沿邊安撫使以雄州知州充又有副使以諸司副使以上充不常置都監以閣門祗候以上充並掌北邊戎機交聘之事副使都監迭巡所部大中祥符元年置河東安撫司管勾官二人一以代州知州充一以閣門祗候以上充今陝西沿邊大將帥亦皆帶安撫使名近制官輕則為管勾安撫司事凡諸路安撫之名並以逐州知州充掌撫綏良民而察其姦宄以肅清一道京東東路以青州知州充西路以鄆州知州充京西北路以許州知州

充南路以鄧州知州充荆湖南路以潭州知州充其河北路有定州路有高陽關路有真定府路有大名府路並帶馬並帶馬軍都總管而慶桂二州帶經略安撫使舊制凡諸路安撫使之名並以逐州知州充掌撫綏良民而察其姦宄以肅清一道兩浙東路以紹興府兩浙西路以臨安府江南東路以建康府江南西路以隆興府淮南東路以揚州淮南西路以廬州荆湖南路以潭州荆湖北路以荊南府福建州路以福州京西南路以襄陽府廣南東路以廣州廣南西路以廣州廣南西路以靜江府成都府路以成都府利州路以興元府潼川府路以廬州蘄州並以知州充內廣南西路成都府路

潼川府葭州路並帶兵馬都鈐轄餘路並帶馬步軍都
總管內廣南東路帶主管經略安撫司公事廣南西路
帶經略安撫使

宋會要

安撫使

咸平三年八月以京東州郡夏雨連綿河防衝決民避
災流徙頗廢農業遣太子中舍張舒閤門祗候張禧遍
往逐州軍縣鎮安撫候到同共體量應經黃河水滄浸
并避水權徙他處者所在長吏倍加安撫不得搔擾及
令逐州軍具析水全壞田產及只浸田苗者人戶數無
致虛破省稅不經水災人戶亦仰州縣安撫不得接便
差擾十月二十三日以翰林學士王欽若為四川安撫
使國子博士索及甫副之閤門祗候李成象同勾當安
撫事知制誥梁顥為陝西格安撫使祕書丞李易直副
之所至錄問繫囚除十惡至死官典犯正枉法賊致殺

人劫殺謀殺鬪殺並為已殺人不降外餘死罪降從流
派從徒徒從杖杖已下釋之死罪合該減降情理難恕
者疾置以聞真宗復諭欽若等曰朕以觀省風俗尤難
其人數日思之無易卿等各宜宣布德澤使知朕勤恤
之意四年八月以兵部尚書張齊賢充涇原儀渭邠寧
環慶鄜延州保安鎮戎清遠軍安撫經畧使知制誥梁
顥副之帝以邊將玩寇朔方糧道艱難阻故命齊賢等
使焉賜襲衣金帶白金有差即命馳騎而往發日仍命
宣徽南院使周瑩祖於瓊林苑餞之五年十二月遣
使請河東興轉運總管司同議安撫使麟州界來歸三
部族等賜以金幣護遷於內郡先是麟州三部族首領

勒厥麻族帳甚多自濁輪寨失守相率內附詔分配河
東界至是邊臣言勤厥麻常往來賊境中慮復叛去帝
且以蕃漢雜居非便故有是命仍俟賊境寧謐即放還
景德元年五月一日以兵部侍郎知永興軍向敏中
充西路沿邊安撫使先是賊遷死延州路鈴轄張宗貴
言乞自朝廷遣使弔問仍望遣大臣至邊上召賊所親
信張浦定議故命敏中經度之 十月以兵部尚書知
青州張齊賢兼青淄維等州安撫使都提舉青淄維等
州轉運并兵馬巡檢賊盜公事知制誥丁謂知鄆州兼
鄆齊濮等州巡撫使提舉鄆齊濮等州轉運并兵馬巡
檢賊盜公事 錦綉萬花谷景德中丁謂充鄆齊濮安撫

使時契丹稍南民奔楊劉渡舟人邀利不時濟人謂取
死因斬于河上詭言取民錢者舟人大恐旦夕不敢停
濟十一月五日命戶部判官郝大冲詣邢洺磁相澶滑
懷衛河陽通利軍安撫九日命都官員外郎孔揆詣河
東路安撫十六日命都官員外郎王礪秘書丞許洞殿
中丞皇甫選大理寺丞李渭乘傳詣澶州安撫河北驚
移渡河百姓仍嚴戒所至無得搔擾十二月二日命殿
中侍御史劉益殿中丞皇甫選詣鄆濮留齊青維等州
安撫河朔驚移南渡之民仍詔河南州軍常切存撫令
隨處于寺觀安泊無致失所七日命右正言知制誥陳
堯咨御史知雜事潘安撫河陽懷衛澤潞等州都官員

外郎王礪秘書丞許洞安撫開封府界滑鄭等州以戎人遁去告諭間里所至放彊壯歸農八日遣侍御史高貽慶三司戶部判官郝大冲通判天雄軍周漸知天雄軍節度判官張紳分詣河北州軍招撫人民悉令歸業羣盜結集未擒獲者督官吏討逐仍招誘首身暴露骸骨今逐處理瘞祭奠二十四日遣內殿崇班楊保用閣門祇候胡守節供備庫副使安守忠通事舍人焦守節分往河北東西路齎敕書撫問及體量官吏將校彊壯等自戎人入寇已來備禦勲績條列以聞二年五月就命交州國信使邵暉為廣南西路沿海安撫使時嶺表傳言黎桓死諸子爭立謹邊備也三年四月十四

日以雄州團練使何承矩為河北沿邊安撫使西上閤
門使李允則為副使權易副使楊保用為都監兼提點
諸州軍權場四年三月十三日鄜延鈐轄張崇貴言趙
德明輸誠請吏貢奉之使道路相屬望依北面例擇官
吏有幹知邊事者為沿邊安撫使疆場事務聽裁以便
宜真宗以四鄙寧靜不欲增置官局罷之 大中祥符
三年五月河東安撫司請半年一入奏邊事如有急切
不拘此限從之 八月帝將祀汾陰屬江淮不稔令諸
路各帶安撫使乃命知昇州張詠兼江南東路安撫使
本州駐泊都監李重睿閤門祇候尉信並為都監知洪
州王濟兼江南西路文思使靳懷德洪州都監張英並

為都監知楊州凌策兼淮南東路文思使楊繼勣閤門
祇候程君濟並為都監知廬州高紳兼淮南西路東染
院使劉漢凝閤門祇候耿緩並為都監仍出手劄諭詠
等轄下州軍雖不係災傷處亦常安撫無令墮農扇搖
逃移凡民田未收及低下至旱損處具折收放分數以
聞常平倉及官倉斛斛雖令減價出糶竊慮逐處官吏
不体察地方災害旱輕重加減價例相遠徑旱入戶如
得雨已種夏苗即來春易為接救如未下種亦須斟酌
賑貸免致來春闕少江淮州軍欠折斛斛權任理納仍
令所在州軍縣於公私空閑屋宇權居泊逃移人戶不
得驅逐暴露致枉有天傷闕少糧食減價出糶人戶拋

下屋宇桑棗令本縣及地隣常照管具數收係及災傷
州縣常行約束不得追擾應緣江淮並沿河州軍縣鎮
關食之處自來差人牽拽綱運牌筏檐擎轉運物並以
兵士代之及破官錢顧人應副轉運制置司配率物色
及鄉村追糾工匠打造官物自來擾民者並權住應街
市貧乏人戶無錢收糴斛斛如覺饑餓便擎劃煮粥均
支散官員有貪濁深刻昧於綏撫者速具事狀姓名以
聞應州軍蠲納司見收欠負及依省司定限校料無可
陪填及該赦救除放省司未明指揮者並權住區分開
坐聞奏其饑民有賣椽木牛皮者並支官錢收置以濟
人民四年六月詔曰朕以寡德臨茲庶方靡忘中旰之

勤冀洽阜康之治。眷言江介，迄彼淮濱。水旱相仍，田疇幾廢。緬念黎庶，于懷惻然。宜令起居舍人直史館李迪為江淮南安撫使，閤門祇候張利用為都監，存問里閭。察訪官吏，訊詳犴獄，寬節財征，務適便宜。用圖安集。

八年八月，詔如聞同華、虢州、河中府、陝府歲頗不稔，或有流民，特命使車往宣朝旨，務令安堵。用副軫懷。其令侍御史李行簡乘遞馬往彼體量，招誘安撫，各令歸業。仍計會轉運司同共相度，將見管斛斛除留准備外，置場出糴。及量與賑濟貸救，濟無令失所。如少闕斛斛，即令轉運司那撥應副。逐州今年見欠夏稅，並特倚閤秋稅，仰體量擘劃。以聞。十月，新差知泰州曹瑋言蒙差兼

涇原儀渭州鎮戎軍沿邊安撫使慮有安撫司文字乞鑄印行使從之時宗哥捕嘶羅立文法聚數十萬遣人奏願討平夏以自効上以為戎人多詐慮緩急寇邊侵擾熟戶先命周天質監經原軍又徙曹瑋是州兼兩路事以備之賜瑋公用錢三百萬仍詔自今不兼安撫者給其半大一統志曹瑋事宋以涇原鈐轄兼知渭州移知大州兼緣邊安撫使瑋嘗出巡城以城上遮版太高召主者令下之主者對曰舊如此久矣瑋怒曰舊固不可改也耶命牽出斬之僚佐以主將老指兵事罪小宜可赦時諫瑋聽卒誅之一軍懾伏西蕃犯塞候騎報寇將至瑋方飲啗自若頃之報寇及城數里及起負戴以

帛纏身令數人引之身倚不動上馬出城望見賊陣有
奔馬往來于陣前檢校瑋問左右曰彼布陣乃用僧耶
對曰不然此彼國之貴人也瑋問軍中誰善射者衆言
李起瑋即呼起指示之曰汝能取彼否對曰憑太保威
重願得十騎衆送至陣前可以取之瑋以百騎與之勅
曰不獲而返當死遂進射之一發而斃瑋以大軍乘之
賊衆大敗出塞窮追俘斬萬計瑋在郡有士卒十餘人
叛寇赴賊中軍吏來告瑋方與客奕客不應吏亟言之
瑋怒叱之曰吾國遠之夫汝再三顯言耶賊聞之亟歸
告其將盡殺之瑋之守郡也州之西止于文盛閣閣之
所在最為要害閣之左右皆蕃族也瑋以恩信結之咸

為之用故秦州每歲出兵以守文盛而已所守既寡則
州兵雖少而足用糧草可以自給自後帥臣守其舊規
不敢增改初張吉知秦州生事熟戶多去蕃部竄擾至
是凡前拒王師者皆伏匿瑋令納馬贖罪而還故地至
者數千人廝敦因號南市即秦渭咽喉也自方門至威
遠共置舍本十數亭障橋梁相望浚漆堡四百丈既而甬
廝羅以十萬衆入寇瑋擊於三都谷敗之遷客省使康
州防禦使瑋有德于秦秦人請立碑紀功有詔褒美改
華州觀察使鄜延路環慶等路安撫使九年五月以知
辰州曹克明為宜融桂昭柳象邕欽廉白等州都巡檢
使兼安撫使管勾溪洞公事 天禧元年五月詔曰仍

歲之內蝗旱為災糴事靡登流民相屬託居人上情用
惻然臨遣使車循行方郡詢訪謠俗安集里閭式宣寬
大之恩副茲勤卹之意宜令殿中侍御史張廓往京東
路薛奎河北路判三司鹽鐵勾院張紳兩浙路判三司
度支勾院韓庶閭門祇候賈象之江南路判三司都催
欠憑由司張師德閭門祇候曹珣淮南路体量安撫所
至不得樂宴遊從及多借官健舟舡長吏無得迎送仍
諭廓等除依累降詔旨出糴斛斛賑貸外勸誘富民以
斛斛減價出糴仍速具數以聞當依例酬獎民有流庸
失所者多方招誘廓又言所至州軍民有儲蓄斛斛者
欲勸誘舉放與貧民候秋成日依鄉川體例子本交還

如有少欠官為受理從之 二年二月十六日以西上
閤門副使張照遠為河北沿邊安撫副使以內殿崇班
閤門祇候常希古管勾河東沿邊安撫司事 九月遣
三司度支判官周實馳驛往同耀州河中府體量招撫
各令歸業應經災傷人民有折變撥移稅賦者依近降
敕除檢放外據合納分數與免折變止就本州送納如
願杖勘折斛野依倉式例折納 三年三月河北緣邊
安撫使知雄州劉永宗言北面有密報事宜其通判官
已下勿復參聞從之 八月詔曰近以洪河溢于州郡
申戒官吏即謀繕修顧以茲儲急於營度而京畿近地
河朔與區境邑之間既鄰於封壤芻蕘之用爰賴於委

諭已命攸司各伸良劃酌其經費遂被便宜雖綸詔屢
行務從於優卹而黎黎在念彌切於矜憐特遣使車往
仲存撫宜令判度支勾院方仲旬往京東路判戶部勾
院劉燁往京西路監鐵判官劉平往河北路體量安撫
使人民應有合寬恤改更事件與轉運使副所在長吏
會議施行 四年二月一日以淮南江浙災傷州軍設
貴民饑命都官員外郎韓億問門祇候王若訥馳驛體
量安撫及發常平粟減直出糴勸誘豪族出粟糴濟如
願以斛斗振民者等第酬獎及委發運使規度應副
十一日以利州路及階成州民饑遣侍御史姜遵問門
祇候張士安馳驛安撫三月命知制誥呂夷簡引進副

使曹儀往並梓路安撫以兩路物價翔貴故也夷簡言
所有各穀資民饑州軍見繫囚望許與本州長吏等量
情理從輕次遣及所至州軍召集官吏將校俾宣撫問
又逐州民戶願以斛斗救饑民者元教等第酬獎望出
給空頭告勅付臣就被書填姓名給之從之九月命
三司監鈇判官劉錯乘遞馬往永興軍安撫犒設及建
道場齋醮五年正月以職方員外郎直史館章得象閤
門祇候張士安馳驛京東路體量安撫以水災故卹之
仁宗天聖元年正月以三司監鈇判官張傳閤門祇
候張承德往京東淮南水災州軍體量安撫三年六
月二十二日命龍圖閣待制范雍客省副使曹儀充陝

西沿邊州軍體量安撫使詔雍等所至州軍牘設軍員
使臣並察訪邊民利害及體量官吏能否內有貪濁深
刻昧於綏撫者具姓名以聞 四年七月命三司戶部
判官高覲如京副使高志寧往河北路應經水災州軍
體量安撫六月七日以楊州潤州江寧府江水漲溢漂
溺居民及懷官司舍宇數千間遣太常博士直史館高
鍊閤門祇候劉永証往淮南兩浙體量安撫所至不得
宴樂遊佚及令官吏迎送并多差公人別致勞擾 八
月命三司戶部副使王融充河北沿邊安撫使六宅使
康州刺史劉承顏副之以水災故也七年七月命三司
戶部副使鍾離瑾為河北安撫使西京作坊使范仲淹

副之以水災故也

康定元年六月御史知雜張奎為

京東体量安撫使內殿崇班閤門祇候杜贊仁副之

慶曆二年四月京東安撫使陳執中請河北沿邊安撫

司凡得契丹事宜並移報本司從之三年十月詔置

湖南安撫司蠻賊害潭州都監張克明桂陽監巡檢李

延祚故有是詔五年正月二十八日以叅知政事范

仲淹為資政殿學士知邠州兼陝西四路沿邊安撫使

十一月十四日詔以邊事寧靜賊盜止息知鄆州富

弼知青州張存並罷安撫使知邠州范仲淹罷陝西

四路安撫使六年三月詔陝西四路經畧司凡民間

利害及邊事並報知永興軍陝西安撫使程琳九月

二十八日以三司戶部判官崔嶧為荆湖南路体量安撫時蠻猶未寧特命嶧往議討除招安之 八年四月詔置河北四路安撫使從知成德軍資政殿學士韓琦為定州路馬步軍都總管兼安撫使知定州 事文類聚韓魏忠獻王琦益利路入觐為体量安撫使公至則蠲租減稅以募人入粟招募壯者利以為廂禁軍械劍門閬民流移欲東者勿禁全活飢人百九十萬蜀人曰使者之來更生我也 知澶州尚書禮部侍郎王拱辰高陽關路知羸州知永興軍右諫議大夫魚周詢貞定路知成德軍時舊相賈昌朝判大名府已帶安撫使先是樞密院使夏諫請分河北為四路至是乃有此詔 六月

祠部員外郎集賢校理張栻往河北体量安撫軍民
七月詔河北四路安撫司凡移用軍糧錢帛並牒報轉
運使司 十二月詔御史知雜何郊為利州路体量安
撫使供備庫副使宋守約副使 皇祐三年八月詔遣
使体量安撫諸路御史知雜李允西染院副使王道恭
京東路起居舍人同知諫院陳升之左藏庫副使李賡
淮南兩浙路侍御史韓贄內殿承制鄭餘懿荆南北路
三司戶部判官韓絳內殿崇班翁日新江南東西路時
七路艱食而長吏多非其人及轉運司頗肆科率而民
不聊生帝因命中書擇使以按視之 四年六月詔知
廣州桂州自今並帶經畧安撫使 八月改新知秦州

孫沔為荆湖南路江南西路安撫使入內侍省押班
石全彬副之 五年二月以天章閣待制田瑜三司度
支副使周沆為廣南東西路体量安撫使 至和元年
五月以御史知雜郭申錫為河北体量安撫使西上閤
門副使張希一副之初河朔荐饑民多流徙至是稍復
歸業故遣使安輯之續詔申錫經制邊事當須密行文
字母或張皇 六月十二日高陽關路都總管兼安撫
使知瀛州陳升之言乞下雄州及沿邊安撫司今後每
體探事宜並關報本路安撫司詔河北沿邊安撫司候
有緊急事宜施行訖即便關報 二年九月詔河北四
路安撫司河朔天下之根本而官吏多非其人恐緩急

敗事其體訪知州及主兵官之材否具以名聞 十月
二日殿中侍御史趙抃言京東路青鄆二州各帶安撫
使近年差兩制前兩府臣僚以鎮撫之今曹佺知青州
李端懿知鄆州御史言其不便乞檢會改差有才謀經
任使兩制已上臣僚詔劄示佺端懿 嘉祐元年三月
以三司鹽鐵副使李參文思副使竇舜卿往荆湖北路
安撫初以本路轉運使李肅之及知辰州宋守信討蠻
人彭仕義而知荆南王達與肅之數論事不合互有奏
論遂遣參等往體量之 六月以知制誥韓絳為河北
体量安撫使事文類聚韓康國獻肅公絳字子華江淮
兩浙歲饑以公体量安撫江夏東西二路到部則發倉

廩賑貧之間百姓疾苦西上閤門副使王道恭副之
二年四月以右司諫呂謹初左藏庫副使李綬為河北
路体量安撫以河北數地震故也 七日以侍御史朱
處約為荆湖北路体量安撫以下溪州蠻彭仕義餘黨
未附也 十月二十五日左司諫呂謹初言定州高陽
關置帥至重其事如刺探敵情閤報事宜捕捉境賊姦
細屯田塘水等之類付沿邊安撫司其他軍政悉歸帥
府從之 三年六月命侍御史丁翊為夔州路体量安
撫以本路旱災也 五年七月詔知許州兼京西北路
知鄧州兼京西南路安撫使以判許州賈昌朝知鄧州
魏瓘領之 嘉祐五年八月以吏部侍郎余靖為廣南

西路體量安撫使言行錄余襄公靖字安道嘉祐五年
交趾寇邕州殺五巡檢驛召公以為廣西體量安撫使
公至則移檄交趾召其臣費嘉祐詰責之嘉祐惶恐對
曰種落犯邊罪當死願留取首惡以獻即械送五人送
欽州斬于界上哀公帥二廣幾十年恩信被于異域如
交趾大理特磨南詔之國皆可以順指承使公之大武
之才可謂具矣嘉祐六年七月以起居舍人同知諫院
龔鼎臣為淮南西路體量安撫倚御史陳經兩浙路體量
安撫以水災故也治平二年正月二十六日命知制
誥王陶為陳許穎蔡州開封府界諸縣安撫使權三司
戶部副使張燾為南京宿亳曹濮濟單州廣濟軍安撫

使以災傷故也 蓋公集張忠定公意外和內明臨事
有仁者之勇在蜀四年尤著惠愛百姓守畫像以事後
帥李玘贊云公昔在蜀千載一人公今去蜀千百其身
願公再來以慰斯民蓋實錄也 治平四年四月十九日
神宗即位未及元命諸路體量安撫使龍圖閣直學士
韓維陝西路天章閣待制陳薦河北路天章閣待制孫
永京東路三司度支副使蘇寒京西路並只往災傷州
軍維免以趙卨代之上以充未嘗歷陝西任以永代
之而差李中歸京東是年十一月十九日詔賜銀三千
萬兩於永興軍封樞聽經畧司支用從韓琦請也 熙
寧元年五月二十一日樞密院言近北界刺兩屬人戶

充義軍致人戶逃避來雄州存泊及探到事宜甚多沿
邊安撫司並開報高陽關路安撫司安撫使總一道之
寄豈可都無開預欲令今後開報到北界事宜及理會
兩屬人戶辨正疆封以至權場利害塘水增損或沿邊
安撫司處置未當或淹久未決並須移文密切商議不
得轉分彼我務要協心從長濟務或所見不同即具利
害以聞亦不得遷延觀望致失事機詔可 四年八月
九日置洮河安撫司自古渭寨接青唐武勝軍一帶地
應招納蕃部市易募人營田等事並令同提舉秦州西
路蕃部及市易等公事王韶主之調發軍馬及計置糧
草即令秦州經畧司應副 五年八月十六日以武勝

軍為鎮洮軍以引進副使帶御器械高遵裕兼知鎮洮
軍依舊秦鳳路鈐轄同管勾沿邊安撫司公事所有本
軍合置官令安撫司奏舉 十月二十三日龍圖閣直
學士集賢殿修撰劉庠知成都府罷兼安撫使先是以
茂州邊事令馮京兼成都府州路安撫使至是漸平故
也十一月七日詔熙河經畧安撫司凡有差發軍馬常
切契勘如非緊急並令計食調兵不得與轉運司輒分
彼我枉費軍儲致緩急闕誤 政和三年七月十三日
詔京東路安撫使司可創置本司勾當公事一員以京
朝官或選人充許從安撫司奏辟其請給人從並依保
甲司勾當官條例施行 四年十一月二十二日詔移

京西路安撫於河南府京東路安撫於應天府 五年

十二月二十八日龍圖閣學士前梓州路計度都轉運

使瀘南招討統制使趙適言三省樞密院同奉御筆晏

州夷賊犯順王師出征拓地千里建置五城悉隸瀘州

接連交廣外薄南海控制十州五十餘縣團純滋梓州

長寧軍屬焉邊寄宜重依河東代州置沿邊安撫司安

撫司孫義叟集英殿修撰知瀘州瀘南沿邊安撫使提

舉梓夔兩路諸州軍巡檢兵甲公事吳子厚充梓夔路

兵馬都監同主管沿邊安撫司公事瀘州駐劄臣竊以

元豐中以乞弟犯順移武臣鈐轄知瀘州領沿邊安撫

司市廛因軍興權時之宜比至事定已罷後來因循未

曾措畫其如梓夔兩路節制於瀘州事權甚重而朝廷
付與甚輕今日聖訓所畫蔽自宸衷平時責其撫綏懷
柔則易以文吏緩急責其控捍制禦則付之武臣一舉
可謂兩得矣乞賜詳酌瀘州文臣知州俾令依武臣知
州例帶梓夔路兵馬鈐轄仍乞上以瀘南安撫使為名
統隸兩路內外諸州更不帶公邊二字責得開府置帥
事權歸兵正詔瀘南主管鈐轄職事知州可令帶知梓
夔路兵馬鈐轄入衙仍以瀘南安撫使為名去公邊二
字 宣和二年三月六日詔瀘州守臣帶潼川府夔州
路兵馬都鈐轄瀘南公邊安撫使 十一月九日大名
府路安撫使鄧詢仁言近降朝旨諸路監司及帥臣添

置屬官並罷臣契勘河北河東兩路與諸事路體不同欲
欲望特令依舊存留詔大名帥司屬官可特行存留三
人候糴買等事就緒日依近降旨揮減罷 十二月十
五日詔罷置輔郡內潁昌府帶京西北路安撫 三年
五月六日臣僚言睦賊猖獗大兵奉行天討已見平靖
慮班師之後餘孽尚在理宜措置竊聞太宗皇帝嘗以
蜀寇雖平尚有殘孽因命趙昌言為安撫招討之神宗
皇帝亦命劉瑾知虔州兼江西安撫兵馬鈐轄今乞以
杭越知州並兼本路安撫使鎮撫一方詔撫越州江寧
守臣並帶安撫使兩浙東西江東路鈐轄並依本路選
差九月二十一日詔洪州守臣可依江寧府帶安撫使

六年四月十四日詔潼州府守臣可帶潼川府諸州
路兵馬鈐轄惟瀘州止帶管勾瀘南沿邊安撫司公事
仍差武臣 七年十二月二十二日詔河陽開德守臣
並帶管內安撫使以知州兼充 高宗建炎元年六月
二十一日宰臣李綱言守備當於沿河沿淮沿江置帥
府皆帶使名要郡以控扼其帥府文臣一員充帶安撫
使馬步軍都總管武臣一員充副總管要郡文臣一員
帶兵馬鈐轄武臣一員充副鈐轄次要郡文臣一員帶
兵馬都監武臣一員充副都監安撫使總一路兵政計
便宜行事鈐轄都監參與每朝廷調發軍馬則安撫使
措置辦集以授副總管率副鈐轄都監總兵以行如安

撫使自行即漕臣兩員一員留本路攝事一員隨軍以
治錢糧提刑文武各一員專切巡歷以治賊盜見今路
分鈐轄州鈐轄可以改充今來新制其不可倚仗人令
安撫司具名以聞從之繼而江南東路安撫鈐轄司言
被旨於沿江置帥府要郡本路帥府文臣一員充都總
管武臣一員充副總管要郡江宣州文臣各一員帶兵
馬鈐轄武臣各一員充副鈐轄次要郡池饒太平州文
臣各一員帶兵馬都監武臣一員充副都監路分鈐轄
州鈐轄可以改充今來新制江寧府知府見帶一路安
撫使合與不合便以馬步軍都總管繫銜及要郡鈐轄
都監知府帶鈐轄都監依此所有置武臣副鈐轄都監

亦未審合與不合便行改充今來新置詔合帶馬步軍
都總管繫銜置武臣副鈐轄都監合改充二十三日
宰臣李綱言汾河汾淮汾江諸路置帥府要郡次要郡
使帶總管鈐轄都監以寓方鎮之法許其便宜行事辟
置僚屬將佐以治兵不數年間必有可觀今日控禦之
策無大於此食謂帥府要郡之制可行但未可如方鎮
割隸州郡有詔京東東西路京西南北路河北東路永
興軍路淮南江南路兩浙東西路荆湖南北路皆置帥
府要郡以要郡帥府為安撫使帶馬步軍都總管要郡
帶兵馬鈐轄次要郡帶兵馬都監皆以武臣為之副改
路分為副總管鈐轄司許以便宜行軍馬事辟置僚屬

依帥臣法屯兵皆有等差遇朝廷起兵則副總管為帥
副鈐轄都監各以兵從聽其節制止官願行者聽轉運
司副一員隨軍一員留本路提點刑獄彈壓本路盜賊
遇有盜賊則量敵多寡出兵會合以相應接本路帥臣
當職官措置兵馬先就緒者當優議旌賞 二年三月
八日詔諸路雖各建帥府然於一路見任官吏初無節
制指揮致翫習常態緩急難以集事宜令諸路安撫使
便宜節制施行 五月十七日詔應將副雖在他處駐
劄隨將兵往營或出戍去處知州帶管內安撫使亦令
聽節制並依本路安撫使法 九月十六日臣僚言淮
南西路已依祖宗制廬州為帥府帶一路安撫使而壽

令
題
今

春府又帶管內安撫使若以朝廷置帥之意其管內安撫雖係要郡亦合聽從帥司節制欲乞應受管內安撫使節制處凡有軍期並專從本路帥司號命詔詣路管內安撫使軍期事並聽帥司節制如將兵屯戍就糧在本州聽管內安撫使節制 三年五月三十日尚書省言令相度欲將江池饒信州為江州路知州帶本路安撫使建康府太平宣徽州廣德軍為建康府路知州帶本路安撫制置使其節制江東路軍馬及江州知州帶江東湖北四字入銜並除去所貴名正事成號令歸一任責稍專從之 閏八月二十二日臣僚言諸州守臣既帶安撫又兼制置及許便宜是持朝廷生殺之權若

行之於兵馬邊防之間即為大利若奪所隸州軍財計
為害不細欲乞依祖宗良法止許漕使轉輸本路財用
詔除用兵許依應便宜指揮餘不行 四年正月二十
四日詔温州見措置防托捍禦賊馬其守臣可令帶管
內安撫使 五月二十四日詔京畿等路州軍既分為
鎮撫使其逐路安撫使並罷 二十七日詔諸州守臣
比年以來往往陳乞帶管內安撫使不過欲增置官吏
辟舉親識無補事功其諸州守臣見帶管內安撫使可
並罷 同日三省言湖北路係分鎮建帥地分內鄂岳
州正在大江之南與江洪州接境今欲撥屬江南路公
江一帶道里闊遠若依舊只於建康江州兩路置帥或

恐照管不盡緩急有失機會今欲將江南東西路州軍
分置三帥總轄內鄂州路安撫使於鄂州置司撥鄂岳
筠袁虔吉南安軍為所隸江州路安撫使於江州置司
撥江洪撫信州興國南康臨江建昌軍為所隸建康府
路安撫使於池州置帥撥建康府池饒宣徽太平州廣
德軍為所隸契勘建康府本係置帥去處緣本府至鎮
江府不滿二百里相去太近而往江州計一千四百里
遠近不倫獨池州正在鎮江江州之間若置帥於江州
則沿江四帥相去道里甚均實為利便從之 六月九
日尚書省言臨安府舊帶兩浙西路安撫使昨降指揮
權移於鎮江府置司其臨江府見兼兩浙西路同安撫

使今來防秋在近竊慮帥臣事體不專難以倚辦詔臨
安府罷兩浙西路安撫使餘依已降指揮 十五日尚
書省言自來二品以上官為諸路帥臣即與侍從官并
職名稍高之人一等安撫使顯見無以區別欲乞今後
諸路帥臣如係二品以上即為安撫大使其繫銜則鎮
撫使体式從之十六日太尉奉國軍節度使兩浙西路
安撫大使兼知鎮江軍府事劉光世言今來初置安撫
大使之意是欲控制一路不獨治鎮江一府而止若使
只守鎮江即與別郡太守同為守土之臣緩急別郡有
警均礙常制不敢離任欲乞將鎮江府別除守臣或添
置通判一員專主民事光世專充浙西安撫大使隨宜

從便置司惟不得出離本路詔鎮江府特添置通判一員令具名奏辟餘依名臣言行錄劉光世為江東西安撫使置背鬼親隨軍府勢勇絕倫一以當百者

七月

二日臣僚言今之帥府雖有一路安撫之名一旦有驚惟知城守自保不相應援則潰敗必矣契勘逐路帥守雖帶總管或鈐轄都監之名然既是守土難以統兵出援昨來朝廷措置帥府有副總管要郡有副鈐轄次要郡有副都監而又將兵舊各有將副此皆統兵之官正欲以備急難相為應援者也然比年以來所差除者多是不知兵之人軍中利害既不能語出戰行陣又不素習或老耄而不任事或以雜流濫居或以技術超擢徒

冒其名緩急之際不可倚仗必至煩朝廷出師而後已
且其官不職不過虛費祿廩而已若統兵官不職則生
靈性命所繫其害甚大欲望應逐路副總管鈐轄副都
監及將副等並令樞密院置籍拘定仍依祖宗差除將
領故事並以曾歷邊任曾立戰功諳知兵畧之人任其
職遇有驚急即以次就近起發屬郡將兵策應其土兵
弓手即委提刑統領協力救援若隣路有警坐視不救
而致失利者重行誅責詔令樞密院遵守 十四日知
越州兼主管兩浙東路安撫司公事陳汝錫言乞添置
幹辦官一員詔特許添差幹辦公事二員令陳汝錫踏
逐奏辟其闕候任滿日更不差人 二十三日詔江南

路已分三帥逐路各置準備將領四員準備差遣六員
準備差使八員準備使喚十員八月一日詔朝散大夫
真徽猷閣范正己充兩浙西路安撫司叅謀官先是兩
浙西路安撫大使劉光世言正己係范文正公親孫范
純禮之子趣操蘊藉有父祖風勁正敢為議論高遠衆
所推服乞許於額外更置叅謀官一員故有是命 十
五日詔兩浙西路安撫大使許置叅謀官一員故有是
命 十五日詔兩浙西路安撫大使許置叅謀叅議主
管機宜文字主管書寫本司機宜文字官各一員幹辦
公事官五員其請給令尚書省立定則例行下尚書省
言今定叅謀叅議官欲依本路提舉茶鹽官例支破主

管及書寫機宜文字幹辦公事已上欲京朝官依通判
選人以依簽判支給準備將領準備差使使喚使臣欲
並依本軍逐等官見今所請給則例支給詔依擬定內
支給供給人更不支給破驛券 十一月六日詔諸路安
撫使兼知州者安撫司事干監司係職事不相統攝合
用關牒有本州事干監司其知州官係大中大夫觀察
使以上應用申狀者書檢不繫名銜知州官未至大中
大夫觀察使合用申狀 四年五月二十七日江南分
三路置帥并置都轉運司指揮更不施行一以鄂州岳
潭衡永郴道州桂陽監為荆湖東路於鄂州置安撫司
以鼎澧辰沅州靖州邵全州武岡軍為荆湖西路於鼎

州置安撫司其荆湖南北路轉運司改為荆湖東西路
轉運司通管兩路財賦其湖南提刑并提舉茶鹽官並
改充荆湖東路其荆湖西路合創置提刑并提舉茶鹽
官管幹職事同日尚書省言昨措置江南分置三帥係
以某州路安撫使為名今來鄂岳既已撥隸荆湖東路
及江南仍舊分東西路其帥臣亦合隨所撥路分繫銜
詔呂頤浩充江東路安撫大使兼知池州朱勝非充江
南西路安撫大使兼知江州高衛充荆湖東路安撫使
兼知鄂州餘依已降指揮 八月十六日福建路安撫
司言福州改為帥府本府移文江南西路安撫使司取
會到改置帥府合差置準備差遣五員準備差使一十

員准備將二員乞許依江南西路安撫使司已得旨揮
差置從本司踏逐奏差詔特許銀江南西路安撫使司
置准備將領二員准備差遣差使各五員餘依 九月
一日詔全州今後遇有軍期許聽廣南西路經畧安撫
司節制互相應援時廣南西路兵馬都鈐轄兼主管本
路經畧安撫使司公事許中奏廣西路桂州係置帥去
處北至本州界百餘里地勢平坦無甚險固自界首至
全州八九十里重岡複嶺多有險阻緩急可以措置把
托緣全州係屬湖南路於廣西經畧司未有節制若割
全州隸廣西路實為經久利便故有是詔 同日中書
門下省言江南西路舊以建康府洪州為帥府置兩路

安撫大使今東路大使兼知池州西路兼知江州二州
地勢僻隘非建康府洪州之比有失祖宗分道置帥增
壯國勢之意詔江南東路安撫大使兼知建康府西路
兼知洪州所有洪池守臣今後選差武臣其紹興元年
正月十日江池州帥司并安撫大使兼知逐州指揮更
不施行 十一月四日詔承事郎王超充廣南西路經
畧安撫司幹辦公事專一提舉左右江峒丁及收買戰
馬等公事 十二月二日知江州兼泅江安撫使胡舜
陟言本州與池州並帶泅江安撫使今池州已依王進
所乞辟差主管機宜文字幹辦公事各一員準備差遣
共五員今欲令依池州例詔江州安撫司屬官依池州

例許差五員前降辟差七員指揮更不施行 二年四月十二日詔江南東西路兩浙東路安撫大使司準備差遣以辟文臣不得過十五員準備差使以辟武臣不得過十五員為定額其見差下人限指揮到日並令依條減罷先是江南東路安撫大使呂頤浩言本州準備差使差遣元有不限員數指揮故有是命也 十一月二十三日江南西路安撫大使司言得旨諸路帥司帶宣撫者並罷契勘本司所兼德安府舒蘄光黃復州漢陽軍七州軍係以宣撫使司行移文字今來既置宣撫使名稱未當只以大使司稱呼唯復以德安府舒蘄光黃復州漢陽軍安撫使司為名兼所管七州軍職事仍

舊所有屬官一員入吏五名仍乞依舊存留管幹詔以
江南西路安撫大使司稱呼餘依 三年三月十一日
詔舒蘄州今後控守事務聽江州沿江安撫司約束措
置仍依舊隸屬江西帥司應大事從帥司處置內黃州
遇盜賊竊發就近委湖北安撫司遣兵應援其岳州係
長江上流緊切控扼之地可依江池州例守臣帶沿江
安撫並候盜賊寧息日依舊從知江州主管沿江安撫
司公事從孫祐請也 十二日詔沿江三大使司許置
參謀參議官主管機宜文字主管書寫機宜文字各一
員幹辦公事三員文臣準備差遣武臣準備差使準備
將領各以五員為額其溢額人並依省罷法施行以中

今疑金

書門下省言昨除汾江三大使所辟官屬緣當時今人
尚未北去兼李成馬進賊馬在近所以增置員額數多
今東邊報寧靜別無羣寇其屬官理宜裁損故也 二
十六日知揚州淮南東路安撫使馬步軍都總管湯東
野言今來總管一路軍馬並令聽帥司節制其淮東泰
州知州張榮承州知州王林見各帶浙西安撫大使司
統制未審合與不合改聽淮東帥司節制詔並合聽淮
東帥司節制 四月十三日淮南西路安撫胡舜陟言
乞依湯東野已得指揮置回易及差使臣回易所過州
縣免稅詔許踏迹文臣兩員主管仍令禮部給降江東
兩浙空名度牒共二百道充本路支用餘依湯東野已

得指揮 五月二十日詔新差知池州兼主管沿江安撫公事陳規改充沿江安撫使以規係從官故有是命
七月知廬州軍州事兼淮南西路安撫使胡舜陟言
本州近來作鎮撫使日隸屬江東安撫司今來已罷鎮撫依祖宗舊制帶一路安撫使往年本路安撫即與江東安撫統屬況是本司取粟軍務上有都督府又有淮南東西路宣撫使司欲乞本州免隸江東安撫司從之
十二日知楊州兼淮南東路安撫使湯東野言自到郡上下空匱凡倉場府庫吏舍之類並是初建設入額直官吏俸給皆仰給所賜錢物昨朝廷所賜金銀券以贍給軍兵今將罄竭其他皆是逐旋經營支用委是不

足竊慮將來監司不卹本州係是興復之初將平時事
體一例根刷錢物拘占糧食使本州措置不行欲乞刷
下本州應干經畫到少少錢物許那移支用一年仍免
監司根刷拘占從之 六月二十一日江南西路安撫
大使趙鼎言本路昨兼管江北七州軍內舒蘄黃三州
見今分屯本司軍馬那移錢糧等應副即目興葺漸成
次第近據報到淮南西路安撫使胡舜陟乞節制舒蘄
黃三州人馬有旨依本司契勘上項逐州軍馬既聽淮
西帥臣節制若本路不合兼管其錢糧乞從淮西應副
并江西係與淮西相接今蒙將舒蘄黃三州撥歸淮西
萬一上流有警則汳江一帶並無軍馬應援本司相度

遇有沿江探報即乞許本司時暫勾索逐州人兵確行
使喚詔令江西帥司依舊那融應副錢糧遇賊竊發令
聽准西帥臣措置應大事兼依舊聽江西安撫大使司
節制 十月十二日三省言江州守臣見帶沿江安撫
今來岳飛充本路制置使江州駐劄其守臣難以更帶
安撫使詔江州守臣銜內權不帶沿江安撫候岳飛班
師日申取朝廷指揮 四年正月十五日都省言江西
安撫大使司昨來置司日屯養官兵數廣遂降指揮歲
支二十萬石應副本司支遣近本司已有撥隸軍馬今
將去年九月十日申到兵帳見管一萬五千七百人除
將佐使臣係破券不該支米外且以見在効用將校兵

級民義兵萬稍手一萬四千五百一十三人約度一歲
共合支米一十二萬五千五百三十三石八斗理合據
實用數寬剩支撥詔令江西漕司據本司合用米數每
歲支撥十五萬應副其權撥赴岳飛下官兵如內有岳
飛見管認錢糧數目却於本司今來合得米內計數除
豁施行 三月一日詔兩浙西路安撫司幹辦公事通
舊額許辟置三員從知鎮江府沈與求請也 二十八
日詔廣西路經畧安撫使司額管準備差遣差使舊額
合破員數許於大小使臣內通融踏逐奏辟先是本司
額管準備差使二員依條奏舉大使臣外準備差遣一
十二員係奏小使臣至是陳乞依江東浙西湖南等路

安撫司已得指揮許本司於文武陞朝官選人小使臣
內通融踏逐指名奏辟施行庶幾邊防緩急得人分頭
幹辦不致誤事下部勘當故有是命 四月二十二日

詔帥府書寫機宜文字除係事干機密合書寫外其餘
文字並不得簽書 二十七日江西安撫制置使胡世

將言本路先係差除大使依先得旨令置叅議叅謀主
管機宜文字各一員幹辦公事官三員準備將領差遣
差使各五員等遇有闕官去處並許奏辟差權詔內幹
辦公事準備差遣差使各減一員餘依趙鼎已得指揮

九月十日詔江東安撫司添置準備差使一員知鎮
江府兼兩浙路安撫使馬步軍都總管沈晦言江東安

撫司准備差遣差使各五員欲望更添准備差遣差使
各一員故也 五年閏二月六日詔江州守臣權帶管
內安撫使以中書門下省言沿江已有制置使副難以
更置安撫故也 二十二日詔江東西湖南浙西安撫
大使許置叅謀叅議議主管機宜文字各一員幹辦公事
五員安撫使許置叅議主管機宜文字各一員幹辦公
事四員其溢額人令終滿今任所有額內并溢額人已
差下替人並罷仍依省罷法浙東淮南福建廣南並依
舊仍並令逐路帥司舉辟叅謀叅議辟通判已上資序
餘並令錄以上資序人准備差使依舊如通差過大臣
候今任滿日却令依舊差武臣諸路帥司合辟差機宜

今後並差第二任知縣資序人餘依已降指揮以尚書
省言諸路帥司所置屬官多寡不同兼往往差人
即非祖宗舊制當別行立定差格故有是命 三月十
七日詔荆湖北路安撫使司人吏如頭名實滿三年權
依江西已得指揮與補進義副尉 二十四日詔臨安
府依舊帶遺浙西安撫鎮江府帶沿江安撫 五月二十
三日權發遺鎮江府劉寧止言今來所帶沿江安撫即
不曾分定路分欲乞撥常州江陰軍及平江府崑山常
熟縣隸屬本司從之 六年五月十二日詔襄陽府係
上流重地密鄰僞境依陝西五路例許帶京西南路經
畧安撫使 六月十六日中書門下省言湖北帥司已

移還荆南舊治與襄陽事體同詔王庶許依襄陽府例
帶經畧安撫使 八月二十五日瀘南沿邊安撫使知
瀘州何慤言欲望許臣到任後將城寨官銓量除有不
法合行按削外不職之人未受敕劄者即聽放罷別行
差辟已受敕劄者令與閑慢兩易其任各不理遺闕從
之 九月十八日成都府潼川府葭州利州等路安撫
制置大使兼知成都府席益言契勘裁減冗員今相度
川陝四路分置帥府其潼川府葭州路為一司日帥臣
帶瀘南沿邊安撫使蓋以彼處邊防比之餘路事體稍
重合分作兩路其葭州路施黔珍州南平軍等處邊面
比潼川府路尤更闊遠又係控扼京西與舊不同理當

增重事体遵稟便宜令曷州路鈐轄帶本路安撫使切
緣曷州路距北邊雖遠方今控扼京西最為衝要今來
本路安撫正係曷州知州陞帶即非專買一員難以減
廢從之 七年八月二十三日廣東路經畧安撫使連
南夫言被旨如盜賊事不可待報許便宜施行訖具奏
今來水陸別無大寇所有便宜指揮伏望收還從之
九年三月十五日中書門下省言河南諸路州軍新復
之初今權宜措置應天府守臣充南京留守兼應天府
路安撫使以單徐宿亳州興仁府廣濟軍為所隸河南
府守臣充西京留守兼河南府路安撫使以蔡汝鄭州
淮寧潁昌順昌府永興軍為所隸從之 六月十日熙

河蘭廊路經畧安撫司言本路未經兵火已前舊管一
十州軍以熙河蘭廊路經畧安撫使司稱呼昨因兵火
將河外西寧樂廊等州官吏軍民移那前來河裏緣此
後來行移止以熙河路經畧安撫使司稱呼今為割還
河南故地本路所轄別無廓州即未審如何稱呼詔以
熙河蘭華路經畧安撫司為名 十月十八日知廬州
兼主管淮南西路安撫司公事兼權淮南判官李仲孺
言蒙恩差前件職事所有安撫司各合辟置官屬許踏
逐材幹官奏辟有旨依臣僚言契勘昨申請為廬州係
是極邊遂創充辟置今淮西自是近裏州軍即與五年
事體不同難以援引前例詔係幹辦公事準備差遣各

減一員餘依已得指揮 十年正月六日福建路安撫
大使兼知福州張浚言乞依浙東安撫大使例奏辟官
屬除叅謀叅議官更不左置外欲乞更差主管機宜文
字及幹辦公事三兩員並從帥臣踏逐奏差詔許更辟
差主管機宜文字幹辦公事各一員 三月六日樞密
院言穎昌府係衝會去處理宜增重事權詔令兼管內
安撫使 閏六月二十六日詔左武大夫果州團練使
知陝州兼節制陝西諸路軍馬司節制韓琦兼管內安
撫使以樞密院言琦見措置招集忠義據險保守與賊
相距理宜增重事權故也 十二年十月二十二日臣
僚言淮南兵革未休屏翰不固權一時之宜於鎮江府

卷之三十一

置沿江安撫使閱時既久議者以謂虛設蓋浙西兵政
以於臨安帥司淮南兵政聽於揚州沿江安撫司率徒
屬四十員糜費廩稍曾無毫髮之補欲循沿海制置使
司例罷置從之十四年九月十三日四川宣撫副使
兼營田使鄭剛中言今措置欲將利州西路分作東西兩
路內吳璘乞差充利州西路安撫使以階成西和鳳興
文龍州隸屬楊政乞差充利州東路安撫使以興元府
洋利閬巴蓬劍州大安軍隸屬郭浩所帶理合一體今
欲除落經畧二字乞以金房開達州安撫使為名知成
州王彥知階州姚仲知西和州程俊知鳳州楊從儀所
帶沿邊安撫及管內安撫並合除落從之十六年八

月四日詔利州西路安撫司屬官許依本路轉運司屬
官到任任滿推賞 二十八年二月三日詔京西南路
安撫司有不經朝廷正差使臣一十五員並行廢罷從
本路轉運司請也 十一月十六日詔湖北安撫司添
差叅議官一員減罷見任人令終滿今在已差人別與
差遣 二十九年閏六月十六日淮南西路安撫司言
本司幹辦公事準備差遣共二員內幹辦公事職事稀
少合行省罷添差指使準備差使聽候使喚一十二員
乞更不差注照依其見任人與終滿今任已差下人依
省罷法如見任人願省罷者聽 三十二年四月十四
日淮南東路安撫使司言契勘省併官吏本司今相度

欲乞存留官並係正任書寫機宜文字一員幹辦公事
一員聽候差使副尉一十員下班祇應八員乞裁省官
主管機宜文字一員準備差使一員添差不厘務準備
差使三員聽候使喚五員指使四員其已任已差下人
並依省罷法施行從之

紹興三十二年孝宗即位未改元十一月四日江淮宣
撫司言淮南西路安撫司見今防秋軍事不一欲將准
備將一員改作幹辦公事準備差使一員改作準備差
遣從之 隆興元年五月五日詔京西南路安撫司許
差主管機宜文字幹辦公事各一員從安撫使王彥請
也七日降授特進樞密使江淮東西路宣撫使張浚言

契勘海州係極邊州軍見屯軍馬新招忠義軍多是初
自北來未成紀律全在守臣彈壓鎮撫欲乞許帶海連
水軍管內安撫使從之 隆興二年閏十一月十二日
吏部言四川安撫司狀乞將本司主管機宜文字幹辦
公事準備差遣依逐司體例許理為實歷親民資任送
部勘當欲依本司所乞從之

乾道三年四月十一日詔利州東西兩路併為一路以
利州西路安撫使判興州吳璘改知興元府領御前諸
軍都統制職事充利州路安撫使四川宣撫使以知興
元府王權改知洋州依舊御前諸軍都統制充管內安
撫使是日宰執進呈吳璘改知興元府王權知揚州上

曰吳璘年老意欲歸興元魏杞奏曰若歸興元却是選制西路軍馬蔣希奏曰不若權併歸兩路令吳璘宣撫却依舊知興元上曰如此甚順至有是詔八月十四日知陽州府陳天麟言安撫司置司襄陽府係是極邊邊防利害不可無屬官專掌機要文字緣近來省併止存幹辦公事一員今乞復置主管機宜文字一員從之十二月一日詔京西路轉運判官韓曉知金州主管金房開達州安撫司公事馬步軍都總管用知樞密院四川宣撫使虞允文薦舉也十五日宰執進呈臣僚言金州守臣依興州例不當帶安撫總管職事其金州安撫司乞依舊併歸利路上下曰舊來如何蔣希奏曰舊

不曾帶緣郭浩知金州要與吳璘楊政事體一同故置
安撫今金自屬利州路而房州自隸京西開達自隸長
路逐路已有安撫使近除章畧知興州亦已不帶矣上
曰可依奏 四年宣撫使虞允文奏乞令帶管內安撫
司公事奉旨依 四月二日詔金州守臣帶管內安撫
以刑獄公事張松允言金州最為闊遠守臣若不稍假
以權則統兵主將勢為獨重州郡施為措置皆有所牽
制初因武臣兼總兵民之權故加銷削以相維帶今以
列郡處於其下其勢必不能相制欲望許令金州守臣
帶管內安撫故有是詔 六年八月二十六日中書門
下省勘會已降指揮四州安撫制置司屬官並罷併歸

四川安撫司所有成都府路安撫司幹辦公事一員主管書寫機宜文字一員准備差使二員合行復置從之

二十七日利州路安撫司公事馬步軍都總管王之奇言欲乞將潼川府路依利葭兩路許帶安撫使名刺舉並依兩路今照得利州路安撫使在興元府置司潼川府路兵馬都鈐轄司舊在瀘南置司如蒙陞改作安撫司欲乞今依舊瀘南置司從之 九年正月二十六日中書門下省言勘會王之奇差知楊州淮南安撫使詔廬州守臣今止兼管內安撫司公事 二十八日知揚州淮南路安撫使王之奇言淮西帥司省罷官屬乞依葉衡知荆南已得指揮許別行辟差從之 十一年

三月四日詔金州守臣仍舊帶管內安撫四川安撫制
置使留正等言金州元隸京西南路自詔興後撥隸利
州路係極邊重地常差武臣知州帶金房開達州安撫
使節制屯駐軍馬十六年正月二十八日詔自乾道
以後創置修內司等處兼安撫司準備差遣人元非舊
制可並罷今後並不差人 紹熙四年同制置每處不
究利病欲分其權遂奏請以軍帥不當更兼安撫使及
知興州奉旨利州西路安撫司依舊併歸東路興元府
置司臣竊詳刑利州東西路邊面利害各自任責不輕
安撫一司本以鎮撫軍民彈壓盜賊階成文龍西和等
州正當邊面及與蕃夷接界盜賊多於界首往來作過

今安撫司既在興元府去西和等州凡千餘里或有盜賊竊發申安撫司比至行下措置收捕往往緩不及事曩時朝廷分西路安撫於興州置司且令都統制兼之其意深遠以其便於節制凡有盜賊小則責以巡尉寨將大則守把官軍會合收捕統屬既一各盡其職而姦黠知所畏憚不敢輕於作過自併安撫司後彊賊剽奪無時無之前者趙炳劫掠於比界近張浦等復嘯聚於黑谷山安撫司相去遼遠未免闕牒都統司俾責守把官軍掩捕而都統司復牒安撫司督責巡尉寨官收捉西和等州又與都統爭衡軍兵各持彼我互相牽制姦黠緣此觀望敢於為盜深恐因此浸生邊事故有是命

慶元元年八月二十六日臣僚言近者過臣有請兩淮
荆襄當擇帥臣欲令臺諫給舍侍從集議于御史臺然
後同銜薦舉陛下亟從所請可謂盛舉矣然臣竊見本
臺體例多議事而罕議人臺諫乃彈劾之官設使同銜
薦舉則保任而往他日職事或弛恐於彈劾有礙考之
故事朝廷有所選任或自外遷或自內除或輟重臣以
往初亦無所拘礙亦有出於臺諫者今若集議則勢必
及外而不及內恐非所以均任使也欲乞令中書密院
通擇其人或令二府與侍從給舍公心商議或令各疏
人物於廟堂勿拘內外或出自聖斷選擇重臣以往必
無不得其人之患從之

二年九月十一日詔利州西

路安撫使於興州置司令都統制兼充以四川安撫制
置使兼知成都府趙彥逾言利州一路附以關外四川
邊關遠舊置安撫司公東西兩路中雖權併尋復如舊
一於興元府置司一於興州置司十一月十二日起
居舍人胡絃言諸路帥司向緣軍興事涉機密許辟親
屬充書寫機宜文字中間盡行罷去近年沿邊帥臣資
緣有請復開此例凡不應辟置者亦公然聞奏如執券
取償甚亡謂也欲乞除四川制置許辟親屬機宜一員
外其餘帥司並不許辟差其見任人許隨司罷或帥再
任者亦不許再辟從之三年三月二十五日湖南安
撫司奏本司近獲指揮親兵專聽帥臣節制緣起置之

初係於潭州住營諸軍內選擇軍兵五百人為額創為一寨向轄教閱每月券歷亦係親兵統轄官別作一券幫勘其軍分名籍以至遞補排連尚屬兵將司通管人數卻是人兵一身分聽兩處兵官管轄有此牽制今來若不申明竊恐人復以前窠占役使兼親兵見管人內有淳熙六年因收捕郴寇陳峒回司撥到敢死軍兵通共五百五十六人本司遂行下本寨取會有職名願乞回元營軍分執役兵員已撥回收管外截日親兵及敢死軍通管五百二十四人正撥充親兵其元有已刺軍分入於左手母指下添刺湖南安撫司親兵七字更不隸兵將司軍籍每月請給只從舊來軍分幫支內先曾

有職名人候將來有立功日於已授名次上陞轉向後
有闕只從元指揮以五百人為額遇有逃亡事故名闕
每季類聚從本司招填卻於左額角上刺七字軍號以
潭州雄畧指揮請給支破遇有立到功勞從大軍體例
陞轉庶得軍分歸一不敢混雜從之 五年十月二十
八日右正言程松言安撫制置使肇於景德迨建炎之
初元酌祖宗之舊制諸路安撫帶馬步軍都總管以寓
古者方鎮之法法制一定無所易矣中興以來七十餘
載雖神州赤縣未歸版圖然猶金楚以為家吳越以為
宮聯荆襄之上游控巴蜀之絕險長淮蓄其北鉅海限
其東南而三江五湖又襟帶乎其內予以保國則奠枕

而有餘于以規恢則待時而可動是則蕃方謀帥朝廷
所宜為官擇人而不可忽也今日江浙達于川廣凡十
有六路路擇一帥不過十有六人豈無耆儒碩德望實
素著者置之十六路之上乎每一蕃帥之闕躊躇四顧
選擇惟艱而庸耄者資淺望輕者間亦卑之何其類于
乏才不甚滿人意乎乞明詔大臣遴柬帥才除嘗任執
政外兩制從官必曾經作郡者其餘庶官必曾任提轉
職司實有治績宿負時望者使當一路帥臣之寄而庸
耄選悞資淺望輕之人無復濫次其間從之 六年十
月十四日吏部言湖北安撫使楊輔奏乞將幹辦准備
差遣各省罷一員照得本司幹辦公事兩員一係安撫

司一條營田司營田文字從來諸屬官並行通簽欲將
營田幹辦省罷仍將營田事併入安撫司令本司屬官
並通簽管幹從之 嘉定元年四月二十四日利州東
路安撫司奏本司屬官廢置不定今止有叅議官幹辦
公事各一員乞復置機宜文字準備差遣各一員永為
定例從之

嘉定十六年二月二日臣僚言國家連帥之任膺一道
之責為至重置司所在必擇會府要衝者非苟然也蜀
在數千里之外如興元府沔州利州賓適西陲鎮壓邊
閩屯營相望是以為帥者其權貴專其勢貴一臣聞咸
平四年初置利州路於時未有帥也建炎四年宣撫司

承制以端明殿學士張深知利州兼利州路經畧安撫使此置帥之始也及後并度知興元府權利州路鈐轄景興宗代之遂兼利州安撫使由是帥移於興元矣紹興十年楊政為經畧安撫使知興元府吳璘以總戎節鉞為階成岷鳳經畧使乃以四州併歸利路而分利路為東西興元劍利閬金津巴蓬大安為東路政為安撫使階成西和鳳文龍興為西路璘為安撫使時紹興十四年也乾道四年合而為一興元兼領之淳熙二年復分三年又合五年復分開禧三年諸逆之後復合嘉定十二年以丁焞知沔州而又分廟義區畫蓋隨時而施宜也臣聞邇者蜀事措置日漸有序新遣制使往鎮要

地尤貴其權之有歸於西方事体有所關繫欲乞明諭
大臣從長區處如當合二帥為一乞降睿旨施行以重
事權以幸全蜀從之

宋會要

卷一百一十五

唐置藩鎮皆有參謀至行軍亦有之闕預軍中機密張
建封署溫造字簡與說劉濟使納忠於朝廷文四年詔
兩浙西路安撫大使許置參謀參議各一員紹興四年
詔沿江三大使司亦許置參謀參議官五年詔江東西
路湖南浙西安撫大使許置參議安撫使許置參議其參
謀參議請給依本路提舉茶鹽支破

宋會要

卷一百一十五

宋制河北河東陝西川峽皆有之以三班或內侍二人或三人充太宗至道元年九月供奉官宋元度等五人分往鎮定并等州及高陽關承受公事當言上者馳傳以聞三年二月詔知滄州西上閤門使何承矩覺祭諸路走馬承受并體量公事朝臣使臣踰違公事五月真宗即位未改元詔諸路承受公事朝臣使臣歸闕真宗聽政之初務從簡易故也真宗咸平五年八月九日帝宣諭寄班使臣即畏避不敢言早歲靈州巡檢王承境內磔人承受使臣都不以聞遂決杖降職自是無敢隱蔽因降詔戒歸之景德三年七月詔諸路不

得奏舉承受使臣初河東轉運使宋博等薦代州承受
公事王白帝曰朝廷置此職欲令親軍政察邊事况頻
入奏報固已詳其行止何假論薦故條約之 四年五
月詔朝廷比差諸路承受使臣要知逐處物情人事如
聞多敗鬻規利及役匠人製作器用什物與豪富公人
往來犯者重寘其罪閏五月詔諸路承受不得收接州
郡臣僚干求恩澤奏狀十月詔緣邊承受使臣無得受
總管鈐轄差領兵馬以圖功賞大中祥符元年正月詔
諸路承受使臣多令諸州牒報事宜謄錄入奏頗為煩
擾自今禁止之 三年三月詔諸路承受使臣每到
關須即入見訖不得遷延久住 五年六月權知開封

府劉綜言諸路走馬承受使臣到闕皆直造使坐自今
請先於前殿見訖乃詣後殿奏事從之七月二日詔諸
路走馬承受使臣到闕據齋到文字於勾當崇政殿門
使臣處納下進入如無處分亦次日入見三班使臣即
依例於閣門下榜子見餘依舊例施行 六年四月詔
諸路承受使臣自今許赴知州總管鈐轄都監會食外
無得受生料緡錢五月詔諸路承受使臣多有踰越及
受財賄事發被劾皆稱面曾聞奏因緣生姦自今合奏
公事並須明具劄子進納不得輒憑口述 七年四月
申禁諸路走馬承受使臣受諸路贈遺六月詔曰比擇
使臣承受邊奏其於戎飾素已丁寧苟無曠違亦有升

獎暨側聆於事實多不稱於選掄近河東路供奉官李
崇政西川路侍禁張仲文增減上言張皇動衆已降職
及勒歸班差遣訖其自今所差內臣三班使臣充職者
如能行止周慎奏執允平當議特記姓名優與差使增
加俸給其有明負才識深察機宜規度之間實有裨益
者亦自別有升擢 九年三月選內侍及三班各一員
充秦州沿邊走馬承受公事時曹瑋靖以本路駐泊都
監王懷信為安撫都監更迭入奏不許其請而置是職
天禧三年正月禁川峽走馬承受使臣自今往來興
販物色 仁宗天聖六年正月上封者言自今走馬承
受使臣年滿得替並具在任功過奏裁如無遺闕者與

轉一資十二月二十八日詔所差諸路走馬諸受使臣
多不得人宜令三班院今後並選曾有臣僚同罪奏舉
及曾經兵馬監押或巡檢寨主知縣不曾犯賊私罪者
充 七年五月詔諸路走馬承受使臣年滿得替改轉
後並與家役親民往程差遣 寶元元年二月詔內臣
為走馬承受代還如使臣例與改官 景祐五年中嘗
有是詔今復申明之 慶曆三年八月詔諸路走馬承
受非本職不得輒言他事 五年十月遣入內供奉官
康德用為河東路經畧司走馬承受河東舊無內臣為
承受判并州夏竦特請之 皇祐元年五月復置麟府
路走馬承受內臣一員 二年閏十一月二十六日詔

今後走馬承受如擘畫過邊上利便事件不得理敘勞績仍入內侍省選差廉謹穩審之人仍不許指射

嘉祐四年五月二十三日監察御史裏行沈起言乞今後河北陝西等處擇人充走馬承受免使勞擾州郡詔令逐路都總管經略軍馬巡檢等司今後走馬承受得替今逐州軍保明無違越事件以聞方行酬獎 五年二月十七日三班院言奉詔看詳同勾當三班院楊畋所請諸路走馬承受雖是使臣緣預聞邊要主帥機宜公事職任非輕理合慎選乞應中書制勅院訟堂五院樞密院出職人並依諸司人吏更不預揀選走馬承受差遣乞依畋請從之條制東頭供奉官并諸司人吏臣

係家僕及伎術進納人等並不許選諸路走馬承受三月罷代州駐泊司走馬承受減麟府路成都府利州路走馬承受使臣一員 英宗治平三年正月十八日樞密院言諸路走馬承受欲令三班院勘會見任官將欲年滿更展一季於九箇月已前將見在班使臣依條揀選四員仍仰主判官躬親試驗書劄各令寫家狀一本并具析遂入出身歷任功過主人數姓名連狀申樞密院進入乞點定一名從之九月十九日詔諸路走馬使臣徐係申奏機密急速文字依舊例發馬遞外其餘常程文字只發步遞以上國朝會要兩朝國史志走馬承受以三班使臣及內侍充無事則歲一入奏或邊防有

駕宣作警

驚不以時馳駟上聞 治平四年三月十七日神宗以
即位未改元詔今後走馬承受年滿齋到保明狀合該
酬獎者取旨以任滿例當遷官太優故也 神宗熙寧
三年二十一日詔自来諸路走馬承受使臣春秋赴闕
並於經略安撫司取索管下城寨平安大狀赴闕進呈
未嘗親歷自今河東陝西令躬親往逐城寨取索所到
留一日不得飲宴仍着為令 五年四月二十一日詔
鑄諸路走馬承受銅朱記所有奉使印即拘收送納諸
路走馬承受舊例皆曰某路都總管司承受公事居是
職者惡有所隸屬去總管司字冀擅其權因循已久至
是上命正其名仍鑄朱記給之 元豐元年四月十三

日詔走馬承受不得干預軍事五月十五日詔逐路走馬承受凡遇差撥軍馬出入仰常切體量人情如士卒私陪費及將官措置乖失並仰密具事申聞奏如敢不盡時聞奏致朝廷察訪得知當與所犯人均責哲宗元祐元年八月二十二日詔吏部今後選走馬承受依舊條選無過犯人仍令門下中書後省別立法以聞紹聖四年十一月二十二日詔諸路走馬承受有關令吏部具合選使臣政跡狀申樞密院先以才選次詮序歷任取旨定差元符元年六月九日詔諸路走馬承受任滿酬獎令樞密院審按任內如無違犯或侵越事依條推恩其本處保明聞奏指揮勿行十月七日詔令

後諸路走馬承受使臣闕以吏部選到人赴樞密院再
行銓量每路選使臣二人令入內侍省引見取旨定
差一名八日詔自今吏部看詳如遇出入回日許闕借
詳照若敢隱匿並徒二年不以赦降去官原減諸路安
府鈐轄司依此施行十二月十六日詔走馬承受公事
雖不係經略司屬官其邊界事宜已有指揮依舊例闕
送其官司探到事宜亦依舊例許闕借今後雖有帥臣
奏盡到時特旨處不得闕報他司事宜亦不得將走馬
承受作他司更不闕送 大觀二年十一月九日 詔
今後東南走馬李奏應有驛鋪並不得乘船違者以違
制論先是西浙西路走馬承受公事安竦乘座船赴闕

計在路四十三日江南東路走馬呂仲昌乘遞馬赴闕
即不曾乘船計在路十一日得旨安竦持衝替永不得
與走馬差遣故有是命 三年正月二十一日樞密院
言準詔諸路走馬承受公事今後取索本路封樁見在
錢物糧斛數目聞奏已申選到走馬承受使臣後續有
員闕其前闕退下之人亦聽再選二十八日詔諸路走
馬承受使臣應合遵守條貫及被受機密朝旨非專下
本官者並取索編類成冊申納樞密院仍今後依此接
續抄上二十九日秦鳳路走馬承受鄭棹言乞自今本
路兵馬出界別路承受一員隨軍從之環慶路準此
三年五月十九日詔諸路走馬二員處人給朱記一枚

令禮部鑄造頒付

徽宗崇寧二年二月十七日詔成

都府利州路瀘南路各添差內臣一員為走馬承受內
瀘南兼梓州路 四年九月八日詔邊界探報事宜依
條令實封送走馬承受看詳如在外即更不送近日經
略司或隱漏不送看詳亦無緣見得子細令經略司及
沿邊安撫司將探到事宜書號印縫封送承受如供報
不實不盡並以違制論不以去官赦降原減績據高陽
關等路走馬承受公事所入狀申未審合因季奏為復
每月或每季半年取索聞奏事今依糧草數立為每季
聞奏修立下條諸每季取索本路封樁見在錢物數聞
具聞奏諸被受走馬承受公事所取索封樁見在錢物

數供報不實不盡者以違制論不以去官赦降原減奉
詔依修定四月十四日上批向令諸路走馬因經過本
路州縣等方許取索封樁錢物大帳點檢深慮走馬使
臣不詳文意輒有用情每月每旬亂有取索除因季奏
取索傳宣撫問外餘並不得取索仰樞密院立法行下
六月二十七日詔帥府置走馬承受內臣一員武臣一
員緣東南與西北不同不可令侵紊職守應有聞見干
軍民者並具聞奏仍許入急遞唯不得干預軍民事詞
狀及擅行決罰指揮餘令依三路舊法施行江南東西
兩浙各共差走馬承受內臣一員於東西路駐劄七月
八日樞密院奏京西路走馬承受公事曾處厚申準樞

密院劄子奉聖旨本路州軍等處支給諸軍月糧許走馬承受親臨於已請出糧內取一二合令當職官封題即記走馬承受附遞呈進若走馬承受不在本路或緣假故即與將副往彼取樣封記將官關送到依例附遞竊詳州軍內有無將副去處即乞委本州都監或監押往彼取樣當職官封記前來本所依例附遞進呈從之十一月一日詔走馬承受本鎮在任不鈐束所帶人兵多請過米麥特罰銅二十斤仍令諸路走馬承受今後嚴切鈐束不得多借請給及有搔擾違者當議重行責罰先是臣僚言鎮違法將帶馬軍及縱令人兵違法借請官物等詔令本路發兵軍副使龐寅孫體量得實故

有是命 四年正月四日詔諸路州軍有走馬承受處
除邊機兵防軍期急速等自依條制外如有事出非常
稍涉要害等仰州郡合屬去處限日下關報本路走馬
承受所二月十六日樞密院言兩浙東西路走馬承受
公事呂仲昌江南東西路走馬承受公事王淵闕仵奏
伏覲大觀走馬勅每季取索本路州軍糧草文帳備錄
聞奏續奉朝旨許令取索封樁見在錢物糧斛季奏日
赴闕進呈及近奉朝旨兩浙併作一路仍依舊往還守
季臣等契勘兩路相去遼遠不下數千里於守季傳宣
取索入奏往來時無暫暇兩路帥府安得有互守之理
所奏帳狀竊慮書寫不逮遂至遲延欲將兩路州軍每

季合取糧草并封樁見在錢物糧斛帳狀等令逐州軍
如法攢造關報走馬所逐旋繳奏所貴兩不相妨所有
其餘兩路併作一路者望立法遵守看詳諸路糧草所
封錢物令走馬承受取索聞奏蓋便舉察他司今采
若止憑諸州攢造帳本所繳奏即與逐州一面申奏事
體無異所有走馬承受公事所取索聞奏自合遵依見
行條制外官司取索糧草帳雖有立定回報日限緣日
限太寬兼封樁錢物未有報限條約乞檢會增修從之
三月三十日詔諸路走馬承受公事使臣大小行人之
職耳目之任舊許風聞庶幾邊防動息州郡不法得以
上達近有陳請不實重行降黜之文例皆偷安苟簡避

罪緘哩甚失設置之意可仍舊許鳳聞言事十月八日
詔江南路走馬承受分在洪州江寧府兩處駐劄相去
遼遠凡有被受朝省文字不能互知自今後應有文字
並雙封降付兩處照會庶免闕報留滯十九日臣僚上
言東南諸路近置走馬承受公事聖聰四達周知遠邇
無壅蔽之患天下幸甚竊謂官吏貪暴民間屈抑監司
職事隳廢而走馬承受能得其實狀以聞此其所補固
不為小其或不知分守侵官紊法輒受詞狀判送州縣
移文督催過於監司喜怒任情所至受弊恐非建置之
旨伏望不以輕授而以守職循分不得有所侵紊嚴加
訓飭庶各知警詔申明行下 政和元年正月十三日

詔諸路走馬承受公事使臣每員許召募手分貼司各一名手分每月支錢六貫米一石五斗貼司減半並依舊推行重法其已差到使臣手分并軍典候募到人遣歸本處 二年正月二十五日詔北聞諸路走馬承受公事使臣近來於州軍朝拜燕集等處內有官資稍崇者多居守臣之上甚非所以重千里之寄自今後走馬承受徐州事守臣外並依雜壓敘位餘依舊例制仍著為令 三年七月十四日樞密院言勘會走馬承受自來獨員及獎員處一員入奏或差出隨軍之類其在本路人過非次替移從來並未有交割所管印記案牘人吏與是何官司收管條約欲乞立法從之 五年十二月

十五日詔諸路走馬承受耳目之寄實司按察均體使
華而邇來類皆貪賄欠通郡邑商較饋送置土物以事
權要其不職者已行澄汰宜務首公以稱任使 六年
三月二十七日樞密院言入內武翼大夫保州廣信安
肅順安軍走馬承受公事岑筌申伏覩近降指揮應諸
路監司及依監司人凡可按刺州縣者並依陝西路已
降聖旨指揮不得赴州郡筵會及收受上下馬饋送今
來上件指揮雖不該載走馬承受筌慮亦合依凡可按
刺州縣之人除所守季州軍依條赴公使筵會及收受
月例供給外即未審傳宣取索所至本路州郡合與不
合依上條不赴州郡筵會及收受受上下馬饋送若不

合赴解宇所在州郡筵會其傳宣撫問所至亦未審合與不合赴公筵一日欲望詳酌明降指揮詔諸路走馬承受傳宣撫問所至州軍管設筵會等許依舊例四
月一日臣僚上言恭覲去冬御筆誠飭走馬承受至於告以任遇之誠諭以設官之意咸使首公減私清白勉勵激昂自奮以稱任使則聖訓丁寧可謂至矣慮歲月寢久或致後來者無聞非所以上稱訓迪之意欲下諸路許令刊石於廳事昭示永遠之誠從之同日樞密院言麟府路走馬承受公事楊延宗中伏覲走馬款諸稱帥司者謂經畧安撫都總管鈐轄司麟府路軍馬渡南沿邊安撫保州信安軍安肅軍都巡檢司同又令諸

帥司被受卻前發下朱紅金字牌因季奏齎赴樞密院
送納契勘有知府州折可大并似此等處遇有躬受到
御前發下朱紅金字牌合與不合計會齎赴朝廷送納
詔並令走馬承受齎赴闕送納諸路似此去處依此
七月十三日設改諸路走馬承受公事為廉訪使者
九月四日詔諸廉訪使者稱呼所名利多不一今後
並以某路廉訪所為名 十四日詔大名府路走馬承
受于奉世奏報失實可於罷送吏部與監當差遣 七
年二月八日詔邊防謀報至重至密動繫機要間不容
髮近聞沿邊每有探報不論重輕虛實互相關報諸司
諠傳謗播增緣百出顯有揭露實於邊防有害自今探

報除聞奏外更不得報諸司謂如轉運提舉廉訪等司之類如有著令並行衝改或擅輒取索及違者論如違御筆法其後宣和三年三月二十四日因臣條上

言除去廉二字

四月十一日陝西河東河北路宣撫

使童貫奏竊見自今諸路廉訪使者凡所法禁與監司一同以至州郡飲食之會劄皆不赴但以嚴毅自守甚妨採聽似非設官之本意欲望詳酌應廉訪使者舊例筵會聚食欲乞許令依舊起赴從之五月一日江南廉訪使者李穆奏每年天寧節聖壽道場乞各於駐劄開啓建置具䟽進奉頗可恭恪可特依所奏餘路準此十四日德音比夾監司郡守全然失職坐視賦贓汙並不

舉按州縣姦賊汙吏因緣公事乞取民財率歛錢物不可勝計至或驅役良民應副私事不顧公法公人吏人相與為市不無彰露監司郡守已不廉潔懼不敢發遂使吾民陰受其弊可令廉訪使者廣布耳目覺察密具以聞重行編配仍坐此勅文出榜許人不須更厯監司郡守徑赴尚書省陳訴許令衆户生一名齎狀赴省當差御史按治六月十五日詔利州廉訪使者丁弼侵撓帥權干預邊事方行招降遽便進討虧損威信傷陷官兵兼奏報不實可特除名勒停永不收敘送永州編管仍差大使臣管押前去八月二十一日詔今年五月所降德音許諸色人實封訴事赴鄰路廉訪使者投下繳

申尚書省指揮可更不施行限指揮到日立便止絕仍仰逐路具奏即速施行二十五日樞密院言陝西河東河北路宣撫使司申勘會諸路廉訪使者之職一路事無巨細皆所按刺朝廷耳目之任寄委非輕今序位悉在通判之上緣其間有任橫行之人若非泛奉使依條序官在發運監司之上其武翼大夫以上與發運監司序官今來提舉木柅坑冶茶鹽官皆比附監司序位內有官係宣教郎之類並在廉訪使者之上不惟理有未順即未副朝廷委寄耳目之重本司今欲乞諸路廉訪使者序位在轉運使副判官提點刑獄提舉學士常平官之下內係橫行或內侍者帶直睿思殿許與提舉弓

箭手序官如廉訪使者係武功大夫已下即與提舉木
械坑冶茶鹽序官無提舉弓箭手坑冶茶鹽官路分比
類施行庶事理順而品序正以副朝廷耳目之任從之

八年正月二十八日詔諸路廉訪使者序位在通判
之上其職由接送人並依通判例仍歲支公使錢三百
貫文以係省錢充置籍支使今後本所應用動使陳設
什物之類不得於他處闕借違者以違制論二月二日
詔近降指揮廉訪使者序位在通判之上可依按察州
縣官例收受供給諸路準此五月八日準樞密院封送
到政和重修本所令諸帥司送到諸處探報關申邊界
事宜文書即時看訖實封送還已奏者非別有申明更

不再奏其附案者如有應奏之事聽備錄聞奏遇出入
回日亦聽闕借餘準上法閏九月十九日臣僚上言竊
以朝廷更置廉訪使者選委甚重俾廉訪一路全賴監
司若不優假體貌則無以表儀郡縣唯每歲使押賜衣
襖至於計會戶部請領沿路使押近乎押綱使臣竊恐
非朝廷以使者呼之之意又每到關伺候戶部製造致
有留滯累月實恐治邊不測出入有關監軍欲望朝廷
畫降指揮今後衣襖乞下吏部差使臣管押赴逐路廉
訪所交割委廉訪使者親詣逐處監散所責事體增崇
俾逐路知朝廷遣使之重詔依臣僚所言餘路依此
宣和元年八月十八日詔廉訪使者不許收接詞狀已

有著令若事涉要害或論訴他司違法之類豈容不舉
但不許予決即不為侵官可參酌立法取旨施行九月
一日臣僚上言乞應除授廉訪使者特加詢考慎擇忠
實潔白之吏仍乞自今以往若犯賊私各於本罪加等
論庶使仰體陛下責任之專而廉勤自重不為非義天
下幸甚詔仍加本罪二等十月十一日詔令諸路廉訪
所京畿武臣提刑每月并逐旬申奏賊盜狀仍將關牒
所屬不住督責捕資官須管捉獲盡絕餘依累降指揮
五月十二月九日真定府中山府路廉訪使者李約
奏伏覲政和令諸大慶大禮元日冬至發運監司官提
舉奉事提點坑冶鑄錢官司諸州長吏三衆知縣同奉

表賀舊例運使者如舊例月旦奉表參起居仍前期七
日到進奏院中散大夫刺史大將軍以上在外及武功
至武翼大夫任路分鈐轄以上準此臣契勘廉訪使者
舊隸逐路帥司走馬承受昨蒙睿旨改正名稱敘官述
職幾厠監司之列如天寧節進奉功德疏并賜宴已蒙
聖造特依所乞獨有大慶大禮元日冬至月旦奉表臣
所領職名未預其數欲望聖慈特許今後依前項令文
逐時奉表賀參起居詔依所乞餘路依此 六年三月
七日臣僚上言淮南路廉訪使者王若冲奏準勅修立
到諸司遇季奏前期報轉運司取索所部見任官職位
姓名到任年月日或事故及之官違限人類聚點檢詣

實連奏緣未有關送廉訪所條限伏望下有司脩立關
送日限及違限斷罪修法詔令諸路轉運司春於正月
下旬秋於七月下旬以前發遣到廉訪所違限者杖一
百閏三月十九日詔諸路廉訪使者不合干預茶鹽事
若州縣有罪自合按劾 七年四月二十七日詔今後
州縣等處合干人應供報文字稽違差錯鹵莽等並許
廉訪所遵依監司見行條法施行從京西路廉訪所請
也 欽宗靖康元年正月十六日詔廉訪使者並罷其
走馬承受公事依祖宗法四月一日監察御史余應求
言自古中人預軍政未有不為患者故齊寺人貂漏師
於多魚風沙衛殿而二將見獲唐用監軍每無成功此

可為後世深戒者也國家近年邊事專委童貫譚稹終成大禍幾危社稷今兵革未弭選將命帥固當委任責以成效所遣中人不過隨軍承受奏報文書而已臣竊見近者河東承受王嗣昌奏請畫一乞今日報將兵覆驗首級提點賞犒催促糧運及差發探報動息出入皆報承受所則是又預軍政矣雖名承受其實監軍也夫軍政不專於主帥而關決於承受則動有牽制進退狐疑又唐之監軍多擁精兵自衛勝則坐分功賞退則引兵先遁今嗣昌入乞以隨軍步馬各兩隊防護若近裏幹當抽摘隨行是又踵唐監軍之迹也如此豈有同心赴敵死於行陣之間哉朝廷不察其意而從之臣恐將

帥依違不能專制又慮積日累勞他時為監軍為制將
自茲始也臣又觀童貫之初用事也為熙河蘭會路承
受而已繼而措置邊事又為安撫制置使人為宣撫使
終之爵郡王職樞密譚稹之初用事也亦熙河蘭會路
承受而已繼而為幹當公事人為淮浙制置未乃為河
東宣撫使蓋其由來有漸非一日之積也今嗣昌初為
承受許預軍政安知數年之後不復為貫稹者乎陛下
方脩法度以治內命將帥以事外嗣昌首為亂階漸不
可長望追還所請以示專任將帥之意詔嗣昌奏請畫
一指揮更不施行七月二十五日詔諸路走馬承受依
祖宗法並帶某路某司走馬承受十一月十六日戶部

言諸路廉訪使者已依祖宗法改為走馬承受公事使
臣隸屬帥司難以自立一所欲並今聽監司覺察與諸
司屬官一等從之以上續國朝會要 建炎元年十二
月十二日樞密院言昨罷廉訪使者逐路依舊改為走
馬承受公事依祖宗法隸屬帥司詔今後應走馬承受
公事職事並依祖宗法如違以違制論委帥臣奏劾
二年五月二十二日詔走馬承受公事應行移帥司文
字合並用申狀其見帥臣亦合依屬官例 四年十月
八日入內東頭供奉官秦鳳路都總管司走馬承受公
事胡師回言昨降指揮應今後所差使臣充諸路走馬
承受公事每遇赴闕入奏公事許令依例將帶當直兵

士一名隨行今來邊事未息道路梗澁若止許將帶當
直兵士一名竊慮闕悞乞遇有赴闕奏事特權差當直
兵士六十八隨行管轄人在外若白直兵士不及數仍
於本路州軍差撥如沿路有疾病逃亡事故之人隨處
差填逐州交替候邊事寧息日乞依熙寧條法許帶白
直兵士隨行赴闕入奏人數施行詔遇赴闕奏事權差
四十人餘依

廢罷月日闕